

Маматқул Ҳазратқұлов

ИНТИЗОР



Ўз
Х 18

Ҳазратқулов М.

Интизор: Қиссалар.— Т.: Адабиёт ва санъат нашриёти, 1986.— 160 б.

Маматкул Ҳазратқуловнинг бу китоби унинг икки қиссасидан ташкил топди. «Интизор» қиссасида бугунгги кун, замондошларимиз образи яратилиган бўлса, «Қўёш мен томонда» қиссасида инқилоб арафасидаги ҳаёт, Саварқанд атрофидаги меҳнаткашлар кайфияти, интилишлари тасвиirlанган.

Ҳазраткулов М. Горение души: Новести.

X 4702570200—14 23—86
M 352 (04)—86

912

© Fafur Fulom nomidagi Adabiёт va san'at nashriёti, 1986 y.



ИНТИЗОР

I

«Ойимга нима дейман? Бари бир одатдагидек сўроқ қиласдилар. Аслида, яёв келмасдан автобусга тушсак бўларди. Лекин шундай тоза ҳавода пиёда юришнинг гашти бўлакча-да».

Санам ана шундай хаёл билан учинчи қаватга кўтарилиди. Эшик қўнғироғини босди. Жавоб бўлмади. Яна жиринглатди.

Ичкаридан қадам шарпаси эшитилди. Эшик очилиб, Санамни кўриши билан Карима опанинг авзойи ўзгарди.

— Ҳа, сенми? — деди Карима опа. — Қаерда юрибсан? Соат неччи бўлди?! Бор, қаердан келган бўлсанг, ўша ерга бор! — у шундай дедиую эшикни тарс ёпди.

Онасининг жаҳли тезлигини, сал кеч қолса койишини Санам биларди, аммо ҳозир... бундай дейишени кутмаганди. У нима қиласини билмай қолди. Қўнғироқни

яна жиринглатсинми? Йўқ, яхшиси бир оз кутсин-чи, эшикни онасининг ўзи очиб қолар...

У эшик олдида анча туриб қолди. Бироқ эшик қайта очилмади. Санамнинг кўзига ёш келди. У бир-бир қадам ташлаб пастга тушди. Ташқарига чиққанда қор тинган, шамол эса анча зўрайган эди. «Нима қиласай, қаерга, кимникига борай? Зафар аканинг олдига борайми? Нима дейман? Ойим уйга киритмадилар, дейинми? Зафар аканинг нима гуноҳи бор? Ахир у мажбур қилиб олиб қолмади-ку! Унинг самимий кулгиларига, ҳазил-мутойибаларига, ўйчан боқишлиарига маҳлиё бўлиб, уйга кетишни унудиб қўйган ким?»

Нима қилсан? Аммасиникига борсинми? Бемаҳалда нима деб боради? Бўлган воқеани айтса, гап-сўз кўпайиб кетади. Хотинлар бунаقا гапга муштоқ туради ўзи. Игнадай гапни туюдай қилиб бутун маҳаллага ёяди...

Айтгандай, Ҳилоланинг олдига борса-чи?! Ҳилола яхши қиз, ҳеч кимга айтмайди.

Санам жадал автобус бекати томон кетди.

Шамол увиллар, уйларнинг бурчакларига қорни уйиб ташлар эди.

II

Қатта кўприкдан ўтган такси чапга бурилиб елиб кетди. Машинанинг орқа ўринидифида ўтирган Зафар хаёл оғушида. Унинг фикрларичувалашиб кетган.

Бошига севги савдоси тушган одам хаёлчан бўлиб қоларкан. Ҳозир Зафарни ўйлашга мажбур этган ҳам севги. У Ноилани севади. Ноила-чи? У ҳам севадими?..

Зафарнинг фикрлари тоборачувалашиб борарди. У гўё денгиз тубига тушиб кетгану юзага чиқиш учун йўл тополмаётгандек эди. Хаёл уни ўз оғушидан сира чиқармасди...

— Қаерда тушасиз, оғайни? — деб сўради шофёр Зафардан.

У хаёл билан бўлиб шофёрнинг гапини яхши пайқамади:

— Бир нима дедингизми?

— Ие, оғайни, ухлаб қолдингизми? Қаерда тушасиз деяпман?

— Кечирасиз, англамай қопман.— У қор ураётган ойнадан атрофга аланглади. Машина кинотеатр олдидан ўтиб борар эди.— Шу ерда тўхтатинг.

Машина таққа тўхтади. Зафар шофёрга беш сўмлик узатди-ю, қайтимини сўрамай тушиб кетди. Шофёр аввалига унга ҳайрон бўлиб қаради. Сўнгра эшикдан бошини чиқариб бақирди:

— Ҳо-о оғайни...— Зафар орқасига қаради.— Бу ёққа келинг!

У икки қўлини пальтоси чўнтағига тиқиб, қунишганча шофёрга яқинлашди.

— Пулингиз кўп бўлса бошингизга битта телпак олинг,— дея киноя қилди шофёр.— Мана буни чўнтағингизга солиб қўйин.

— Кечирасиз, мен...

Шофёр унинг гапини охиригача эшифтади. Машина-га қаттиқ газ берди.

Кинотеатр ёнидаги тор йўлакдан ўнгга юрди. Кўчаларнинг чирофи ёнимаган, қорбўрон бўлаётганидан юриш қийин эди. «Таксидан олиб кириб қўйишни илтимос қилсан бўлар экан». Шамол ҳам тор кўчадан чиқиб кетиш учун йўл тополмаётгандай баттар чийиллар эди. Рўпарасидан бир-бирига суюниб келаётган икки йигит кўринди. «Қайфи борга ўхшайди». Уларга яқинлашгач, Зафар ўзини бир чеккага олди. Аммо йигитлар унинг йўлини тўсди.

— Чекишингдан ол! — деди улардан бири.

Бир лаҳза Зафар иккиланиб қолди-да, кейин чўнтағидан «Прима» олиб узатди.

— Нима бу?
— Сигарет. Сўрадинг-ку.
— Сигаретлигини кўриб турибман,— деди у чайқалиб.—«Прима»ми? Фильтрлигидан олиб юрсанг ўласанми?

Зафарнинг миясига бир нарса урилгандек бўлди.

— Ўзингда шу ҳам йўқ экан-ку, оғзингга қараб гапирсанг ўласанми?

Чайқалиб турган йигит Зафарга хезланди. Шериги унинг қўлтигидан олди. Зафарга кетаверинг, дегандай имо қилди. Унинг ҳаддан ортиқ мастилигини кўриб Зафар индамади. Тишини тишига босиб, йўлида давом этди.

Уйга келса, дарвоза берк. «Содиқ қаерга кетдийкан?» деб ўйладию маълум жойдан калитни олди. Хонага кириб пальтосини ечди-да, ўзини каравотга ташлади. Чуқур уҳ тортди. Гоҳ Ноила, гоҳ Санам ёдига тушар, баъзан икковини бир-биридан ажратолмай қолар эди. Каравотда ўтирганча сигарет тутатди...

Машина эшигининг қарс этиб ёпилгани эшитилди. Содиқ кириб келди. Унинг юзлари қизарган, кайфи борга ўхшар эди.

— Ҳа, дўстпм, ўзлариям энди келдиларми дейман?
Зафар индамади.

— Бу, дейман, свидания анча чўзилиб кетдими-а,— деди Содиқ ҳазил аралаш.

— Ўзларидан сўрасак?— ҳазилга ҳазил билан жавоб берди Зафар.

— Э, бизларда свидания нима қилсин, дўстим. Шаҳрингизнинг таннозлари бизга ўхшаганларни назарига илармидн? Аммо ҳозир бир қизни кўрдим,— деб гапида давом этди Содиқ.— Ўзиям жононмисан жонон эканда.— Содиқ Зафарга яқин келиб секин гапирди:— Ана шу жононни бир қучоқладим-да, оҳ-оҳ.— Содиқ лабини ялаб қўйди.

— Қандай қилиб?— ҳайрон бўлди Зафар.

— Қандай бўларди, автобусдан тушиб кетаётувди, у ёқ-бу ёқса қарасам, ҳеч ким йўқ, шартта бордиму орқасидан маҳкам қучоқлаб олдим. Лекин анойи эмаскан, бўш келмади.

— Шунаقا қилишга уялмайсизми?!

— Бунинг нимаси уятакан? Йигит бўлгандан кейин... Мана ўзингиз: ярим кечагача кўчада нима қилиб юрибсиз?

— Иш билан юрибман.

— Менам сизни бекордан-бекорга лақиллаб юрибсиз деяётганим йўқ-ку, свидания ҳам иш-да.

— Бўлди, кўп бачканалик қилманг.

— Бу дейман, сигаретни тортишингизга қараганда, қизи тушмагур хафа қилиб қўйганга ўхшайди-да?

Зафар индамади. Содиқ унга яқинроқ келиб ўтириди.

— Ўзи чиройлими?.. Айтинг, биронта дугонасини топсин.

— Бас қилинг деяпман сизга!..

— Вой-бў, жаҳлингиз чиқмасин. Топмаса топмасин, ҳе ўргилдим дугонасидан. Бизга ҳам насиб қилгани чиқиб қолар.

— Аввал биттасини эпласангиз-чи!

— Ҳе, дўстим, қизиқсиз-а? У ўз йўлига, бу ерда ҳам битта чаканаси бўлса зарар қиласдими?

Зафар Содиқнинг гапларига чидаб туролмади:

— Садқаи педагоглик кетинг! — деди.

— Ҳе, дўстим, нима десангиз деяверинг. Лекин бу дунёнинг фалсафаси шу. Чунки шундай қилишга мажбур бўласиз. Ҳали шошманг, ўзингизни ҳам кўрамиз. Биз ҳам бўйдоқлигимизда сизга ўхшаган «соғ» эдик. Биттаси айтган экан: «Мен ҳам эдим сенингдек, сен ҳам бўларсан менингдек», деб.

Зафар жавоб бермади, ортиқча гапнинг фойдаси йўқ эди.

Зафар ўқувчиларга салом бериб, журнални столга қўйиши билан учинчи қатордаги партада ўтирадиган Заҳро деган қиз безовта оҳангда деди:

— Зафар ака, ўтирунг, ўтирунг!

Зафар ҳайрон бўлиб, бир стулга, бир синфга қаради. Заҳро ўша оҳангда:

— Стул синиқ,— деди.

Зафар стулни аста қимирлатган эди, тўрт оёғи тўрт томонга ағанаб кетди. Бутун синф бирданига кулиб юборди. Зафар ҳам кулди. У тек турганча ўқувчиларга тикилди.

— Жуда яхши,— деди вазминлик билан.— Бундай ақлли фикр кимдан чиқди? Уйида яхши тарбия кўрган, мактабда аъло баҳога ўқиган болалар ўз ўқитувчисини ана шундай «совға» билан кутиб олади. Раҳмат, сизларга...

Заҳро чидаб туролмади шекилли, ўрнидан салчиб турди.

— Ҳамидулла қилди!— деди.

Заҳронинг орқасидаги партада ўтирган Ҳамидулла шу заҳоти қизнинг елкасига туртди. Заҳро ялт этиб ортига ўгирилди.

— Заҳро, ўтири,— деди Зафар. Секин Ҳамидулланинг партаси ёнига борди.— Қани, ўрнингдан тур-чи. Қаранглар-а, болалар, бўйи ҳамманлардан баланд, салкам мен билан баробар.

— Бўйи узуннинг ақли калта бўлади,— деди кимдир.

Зафар бу луқма эгасини қидириб ўтирунди, нигоҳини Ҳамидулладан узмай деди:

— Йўқ, мен бу фикрга қўшилмайман. Ҳамидуллани ақлсиз дейишга тил бормайди. Ақлсиз одам ўқитувчисига бузуқ стул қўйиши, у билмасдан ўтирганда ағанаб

тушиб, ўз ўқувчилари олдида кулги бўлишини хаёлига ҳам келтирмайди.

Бошини ҳам қилиб турган Ҳамидулла ўзини оқла-моқчи бўлди:

— Бундай қилишни менга Зоҳид ўргатди.

— Ундан бўлса,— деди Зафар,— сен чиндан ҳам ақлсиз экансан.— Ҳамидулла «Нега?» дегандек Зафарга ўқрайди.— Менга бунақа қарама, фикрингни англаб турибман. Зоҳид айтган бўлса-ю, сен ўйламай-нетмай қилаверган бўлсанг, демак сенда ақл-фаросат йўқ экан-да. Ақли жойида одам ҳар кимнинг гапига қулоқ солиб кетавермайди. Бир ишни қилишдан аввал уининг оқибати нима бўлишини яхшилаб ўйлаб кўради. Зоҳид сендан ақллироқ экан. Ўйлаган ишининг оқибати ху-нук эканлигини билиб, уни сенинг қўлинг билан амалга ошироқчи бўлибди.— Ҳамидулланинг ёнида ўтирган Зоҳид «пиқ» этиб кулди. Зафар унга важоҳат билан тикилди-ю, ўзини тийди.— Ақл ҳаммада ҳам бўла-ди. Бироқ уни нимага сарфлашни билиш керак. Зо-ҳиднинг мияси нуқул мана шунақа бемаъни зарарку-нандалик ишлари учун ишлайди. Эсиз ақл, менинг раҳмим келади.

Зоҳид қизарип кетди. Синфдошлари олдида уялгани-дан ўзини ҳимоя қилишга ўтди:

— Мен ўргатганим йўқ!— деди.— Узи айтди менга.

Зафар кулди:

— Бўлмаса, Ҳамидулла сендан кўра ақллироқ экан-да.

— Унда ақл нима қиласди,— деди Ҳамидулла.

Ҳамма баравар кулиб юборди.

Зафар кулгидан ўзини тутиб, столга яқин келди-да, Ҳамидулла билан Зоҳиддан сўради:

— Рус тили ўқитувчисининг сумкасига қурбақа со-либ қўйишни ким кимга ўргатувди?

Иккала ўқувчи бир-бирга қараб хўмрайди.

— Утири, Ҳамидулла,— деди Зафар.— Мана, синф-

дошларинг кўришди, икковинг бир-бирингдан ақлли, топқир экансизлар. Офарин. Лекин, Ҳамидулла, қиз болани туртиш, нуқиш яхши эмас, ўғил болага ярашмайди. Заҳрого раҳмат, лекин Заҳро мени огоҳлантирганда ҳам ҳеч нарса бўлмас эди. Йиқилсан йиқилардим, нима бўпти? Унинг устига ўртоғингни сотиб ўтирибсан-а! Сен-чи, Зоҳид? Сен ҳам шундай қилдинг! Яхшимас. Шумликни биргаликда қилиб, айбни бир-бирингга ағдаряпсан-а. Бу қанақа дўстлик бўлди? Дўстларингни сотманглар-да.

Бу гапдан Заҳро ҳам қизариб кетди. Буни Зафар сезди. Қизнинг кўнглинин кўтармоқ ниятида деди:

— Ёмонликнинг олдини олиш учун айтилган гап чақимчиликка, сотқинликка кирмайди. Сен кўнглингни хотиржам қил, Заҳро. Мен дўстликка хиёнат қилмаслик ҳақида гапирдим.— Соатига бир қараб олди-да, гапида давом этди:— Майли, болалар, бу гапларга энди нуқта қўяйлик, вақт кетяпти, дарсни бошлайлик. Хўш, ўтган дарсни ким айтади?— Үқувчиларга бир-бир назар солиб чиқди. Нигоҳи яна Ҳамидулла билан Зоҳидга келиб тўхтади.— Бўлмаса, дарсни синфнинг энг ақлли ўқувчиларидан сўраймиз-да. Қани, Зоҳид, сен айт-чи, ўтган дарсда қайси темани ўтувдик? Доскага чиқ, бир гапириб бер-чи.

Зоҳид ўрнидан турди-ю, аммо доскага чиқишга юраги бетламади.

— Мен ўтган дарсда жавоб берувдим-ку,— деди у минғирлаб.

— Нима бўпти,— деди Зафар кулиб,— яна айтавер. Кейин Ҳамидулла гапириб беради.— У Ҳамидуллага юзланди. Ҳамидулла ўқитувчисининг кўзига қарашга чўчигандек партага қапишиб олган эди.— Қани, чиқ доскага,— деди Зоҳидга,— вақт ўтмасин.

— Ўқиганим йўқ!— деди Зоҳид секин. Унинг бу гапида: «Жавоб бермайман, ўқимаганман, қўлингдан ниша келарди», деган оҳанг бор эди.

— Тўғрисинни айтиб, тан олганинг учун раҳмат,— деди Зафар.— Одам ўзининг ақлу фаросатини фойдали ишларга йўналтира билиши керак... Бугун дарсдан кейин иккаланг қол. Дарс борасида гаплашамиз...

...Ҳамидулла билан Зоҳид бутун мактабда ном чиқарган эди. Мактаб деразасини синдирган ҳам шулар, кимнингдир сумкасига қурбақа солиб қўйган ҳам шу иккови, икки қизнинг сочини бир-бирига боғлаб қўйган ҳам Зоҳид билан Ҳамидулла, мактаб яқинидаги ҳовлидан мева олиб қочган ҳам шулар. Ўзлаштирмовчилар ҳақида гап кетса энг олдин шу икковининг номи тилга олинарди. Уларнинг шўхлигидан, безбетлигидан ўқитувчилар ҳам безиб қолишган. Директорнинг ўзи уларни кабинетига чақириб, бир неча марта дашном берган, дўқ-пўписа, ҳатто бир сафар Ҳамидуллани бир шапалоқ урган ҳам эди. Баттар бўлса бўлишдики, аммо қуишишмади.

Зафар ҳам дастлабки кунларда бу икки ўқувчи билан тез-тез тўқнашиб турди. Эсида бор, бир куни Зоҳид жуда жаҳлини чиқарди. Зафар ўзини ҳар қанча оғир тутмасин, бўлмади. Зоҳиднинг юзига шапалоқ тортиб юборди. Айниқса, синфда, ўқувчилар олдида бундай қилиш нақадар калтафаҳмлик эканлигини билса-да, ўзини тийиб қололмади.

Ўша воқеанинг эртаси куни мактабдан чиқиб кетаётганда бешта йигит унинг олдини тўёди. Улардан бири Зоҳиднинг акаси экан. У жўжахўроздай хезланиб Зафарга пўписа қилди:

— Ўз ўқувчингни ургани уялмайсанми? Ёмоннинг кучи япалоққа етдими? Агар шу Зоҳидга яна бир оғиз қаттиқ гапирганингни эшитсан, кейин ўзингдан кўр!

Зафар бу воқеадан жуда қаттиқ хафа бўлди. «Ахир мен Зоҳидга ёмонлик истамайман-ку!»

У ўйлаб-ўйлаб, охири Зоҳиднинг ота-онаси олдига борди. Ӯшанда ҳам бу воқеа ҳақида оғиз очмади, фаяқат Зоҳиднинг ўқиши пастлиги, дангасалиги, хулқи

яхши эмаслиги тўғрисида гапирди. Отаси ҳам, онаси ҳам бамаъни одамлар экан. Зафарни яхши кутиб олиб, яхши муомала қилишди, ўғлининг ўқиши билан ўзлари ҳам жиддий шуғулланажакларини айтишди.

Уларнинг уйига кейин ҳам бир неча марта борди. Зоҳиднинг акаси билан қадғон бўлиб кетди.

Ҳамидулланинг ота-онаси билан ҳам кўп суҳбатда бўлди.

Зафар дарсни тамомлаб, танаффусда ҳовлига чиқиб сигарет тутатди. «Буларга яна нима бўлди? Бултур анча изга тушиб қолувди. Янги ўқув йилини ҳам ёмон бошлишмади. Ҳозиргача иккови ҳам асосан тўрт-беш олиб келди. Бугун бирданига ўзгариб қопти. Нима гап ўзи?»

Зафар сигарет тутунини тортар экан, шулар ҳақида ўйлар эди. «Дарсдан кейин гаплашиш керак. Улар билан жиддий шуғулланиш зарур. Яна эски ҳолига тушиб қолмасин...»

...Дарсдан кейин Ҳамидулла билан Зоҳид Зафарни синфда кутди. Зафар эшикни очдию уларга деди:

— Қани, кетдик.

Икки ўртоқ «Қаерга?» дегандек бир-бирига савол назари билан қаради.

— Кетдик, кетдик,— деди Зафар уларни шошилтириб.

— Зафар ака,— деди Зоҳид тутилиб-тутилиб,— ахир сиз...

— Бўлди, тушундим, кетдик. Паркка бориб музқаймоқ еймиз. Қанча гап бўлса, ўша ерда гаплашамиз.

Учаласи мактаб яқинидаги боққа киришди. Зафар учта идишда икки юз граммдан музқаймоқ олди. Кичкина қошиқча билан музқаймоқни эзар экан, ўқувчилари юзига қарамай гап бошлади:

— Хўш, яширмай очиғини айтинглар-чи, нима гап ўзи? Нега икковинг ҳам дарс тайёрлаб келмадинг?

Ҳамидулла ҳам, Зоҳид ҳам миқ этмади. Зафар бир-пас жим қолиб музқаймоқ ея бошлади.

— Бугун қайси фанлардан баҳо олдинглар?— деди бир оздан сўнг.

Жимлик чўқди. Кейин Ҳамидулла аста мингирилади:

— Ҳеч қайсидан баҳо олмадик. Икковимиз ҳам...

Зафар аввал Ҳамидуллага, кейин Зоҳидга қаради. Иккаласи ҳам ўқитувчисининг кўзига қарай олмади. Зафар бошқа гапирмади. У ўзича ўйларди: «Тасодифми? Ёки атай ўқимаганми? Унинг устига стул воқеаси. Нега бундай қилгиси келиб қолди? Бунақа қилиқларини ташлашган эди-ку». У зимдан ўқувчиларини кузатди. Уларнинг иккиси ҳам кўзини музқаймоқдан узмас, хижолаг бўлгани сал қизаринқираган юзидан, кипригини пириллатиб, кўзини тез-тез очиб-юмишидан яққол сезилиб турар эди.

— Биронта ўқитувчи ҳам сўрамадими ёки жавоб беролмадиларингми?

— Сўрамади,— деди Зоҳид.— Мен тарихдан, Ҳамидулла географиядан қўл кўтардик бўлмаса...

— Яна ейсизларми?— деб сўради Зафар.

— Йўқ, бўлди,— деди иккаласи бараварига.

Зафар рўмолчаси билан лабини артар экан:

— Одам нима учун ўқийди? Баҳо олиш учунми ёки билимли бўлиш учунми?— деб сўради.

— Билимли бўлиш учун-да.

— Баракалла,— деди Зафар.— Шундай экан, эртага ҳам сўрайман.— Кейин Ҳамидуллага қаради.— Сендан ҳам.

Бу гапнинг замирида чуқур маъно борлигини иккала ўқувчи ҳам тушуниб етди. Ўқитувчисининг тагдор, кинояли гапи уларга дўқ-пўписалардан кўра кўпроқ таъсир қилди. «Музқаймоқ олиб бериб боплади-ку», деб ўйлади Зоҳид. «Тавба,— хаёлидан ўтказди Ҳамидулла,— Зафар акага гап топиб бериб бўлмайди-я. Бунча гапни, одамнинг жон-жонидан ўтиб кетадиган гапларни қаердан олади? Йўлини топганини қаранглар. Бошқа ўқитувчи бўлганида синиқ стулни кўриб, роса

вайсаган бўларди. Зафар ака бўлса паркка бошлаб ке-
либ музқаймоқ олиб бериб ўтирипти-я. Тавба, қизиқ
одам-да».

Ўқувчилар бир-бирининг фикрини англағандек бир-
данига:

— Бошқа қайтарилемайди, Зафар ака,— дейиши.

Ўқувчиларининг бу гали Зафарнинг кўнглига тасалли
берди. Улар эски ҳолига қайтмаслигига энди у ишонди.
Шу холосадан кейин мамнун ҳолда деди:

— Мен сизларга ишонаман. Ахир сизлар йигит бў-
либ қолдиларинг. Йигит эса сўзидан қайтмайди!

У ўқувчилари билан самимий хайрлашди...

IV

Кутубхонада Санамнинг ўзидан бошқа ҳеч ким йўқ.
Санам янги газеталарни ўқиб ўтирибди. Бирдан «Ёш
ленинчи»да Зафарнинг шеърини кўриб қолди. Ўқий
бошлади.

Эшик ғийқ этди. Санамнинг фикри бўлинди. Остона-
да Зафар турарди. Санамнинг юраги шифиллаб кетди.
Йўқ, Санам бунақа ҳолга биринчи марта тушаётгани
йўқ. Яқин икки йилки, аҳвол шу. Ҳар галу Зафарни
учратганида юраги беихтиёр ҳаприқиб кетади. Ҳозир
ҳам худди шундай бўлди. У бир зум нима қилишини
билмай қолди. Зафар эса ҳеч нарсага эътибор бермади.
Унинг қиёфаси ўйчан, катта-катта кўзлари қандайдир
сўниқ кўринарди.

— Келинг, Зафар ака...

— Кечирасиз, Санам, сиздан бир нарса сўрагани
кирувдим.

— Нима экан?— Санам шундай деб ўрнидан тур-
ди.— Айтгандай, табриклайман, Зафар ака, газетада
шеърингиз чиқибди,— қўлидаги «Ёш ленинчи»га ишора
қилди.

— А? Қачон?

— Мана,— Санам газетани узатди.

Зафар газетага кўз югуртириди. Гарчи ичида севиниб кетган бўлса ҳам, сир бой бермади. Парвосизлик билан Санамга миннатдорчилик билдириди:

— Раҳмат.

Санам бўш келмади.

— Ювиш керак энди буни.

— Бўлти, сиз ювамиз дейсиз-у, мен йўқ дейманми.

— Ҳазиллашдим,— Санам қизариб кетди.

Зафар Санамга қўлини узатди.

— Ташланг қўлингизни, бугун ишдан сўнг янги шеърларни ўқиймиз.— Санамнинг қўлини қаттиқ қисди. Қизнинг эти жимиirlаб кетди. Узини сезмаганга олди.— Энди мен сўраган китобни топиб беринг.

— Қанақа китоб?

— «Оқ кема».

— Бор-у, уйда-да! Эртага келтириб берсам бўладими?

— Уйда ўзимда ҳам бор, ҳозир керак эди-да. Шу китобдан баъзи парчалар ўқиб бермоқчи эдим.

— Бу асар дарсликда йўқ эди шекилли.

Зафарнинг пешонаси тиришди. Нохос аччиқ нарса тишлаб олгандай афтини буришитирди.

— Уф-ф... Яна ўша гап: дарслик, дарслик! Ҳеч бўлмаса сиз айтманг шу гапни. Шу сўзни эшитсан қон босимим кўтариладиган бўп қопти.

Зафарнинг бу гапига Санам кулиб юборди.

— Ҳа, намунча дарсликни ёмон кўрмасангиз!

— Директор, педсовет у ёқда турсин, қўча-кўйда ҳам, тўй-ҳашамда ҳам мени кўрса: кўрсатма бўйича дарс ўтинг, у нарса дарсликда кўрсатилмаган, бу нарса дарсликда йўқ, деб қулоқ-миямни қоқиб олган. Ҳўш, дарсликда йўқ бўлса нима қипти? Ахир ҳамма нарсани дарсликка сифдириб бўлмайди-ку. Ундан кейин, Санам, мени кечирасиз-у, ҳамма дарсликлар ҳам талаб дараражасида эмас-да. Айниқса, русчадан таржима қилинган математика, география, физика, тарих китобла-

ри шу қадар ғализ, шу қадар ўқишиң... Ўзимиз қайта-қайта ўқиб, базўр тушунамизу бечора болалар қандай тушунишсин? Натижада, улар дарсликни ёдлаб олишга уринишади. Бу нарса — ёмон! Ўқувчиларнинг мустақил фикрлашини чеклаб қўяди. Шу жиҳатдан Ботировга ҳавасим келади. У дарсликни ўқиб бермайди. Темани ўз тили, иборалари билан тушунтириб, ўқувчиларнинг миясига қуйиб қўяди, қийин темалар бўйича конспект ёздиради. Болалардан ҳам китобда қандай ёзилган бўлса, шундай гапириб беришни талаб қилмайди. Ўтилган темани нечоғли тушунгандигини сўрайди. Шунинг учун программа ва дарслик қолипида қолиш менга хуш келмайди. Программа — иш плани, темир қонун эмас!

— Программани Маориф министрлиги тасдиқлаганда.

— Тўғри, министрлик тасдиқлаган, лекин шу программадан бир мили ҳам ташқарига чиқилмасин, программада кўрсатилмаган адабиётлар ҳақида ўқувчиларга маълумот бериш ман қилинади, деган пункти йўқку! Аксинча, партия ва ҳукуматимиз ўқувчилар билиминг кенг қамровли бўлишига катта эътибор бермоқда. Мактабларни ислоҳ қилишнинг асосий йўналишларида ҳам бу нарса алоҳида қайд қилинган.

— Бу бошқа масала...

— Худди мана шунга жаҳлим чиқади-да... Биласизми, Санам, мен сизга бир воқеани айтиб бераман.— Улар газеталар қўйилган стол ёнидаги курсиларга ўтиридилар.— Биз ўнинчи синфда ўқирдик. Мактабимизда «Савол-жавоб» қутиси ташкил этилди. Ўқувчилар ўзларини қизиқтирган саволларни ёзиб шу қутига ташлар, ўқитувчилар дарсдан сўнг саволларга жавоб беришарди. Бир куни мен ўша қутига шундай мазмундаги савол ташладим: «Деярли ҳамма ёзувчи ва шоирларнинг адабий тахаллуси бор. Шу тахаллуслар қандайдир маънога эга. Масалан, Фурқат — айрилиқ, Муқи-

мий — муқим каби. Худди шундай «Ойбек» ҳам улкан адибимизнинг тахаллуси. Ҳўш, Ойбек деган сўзнинг маъноси нима?» Мактабимизда Сатторов деган директоримиз бўлар эди. Адабиётдан дарс берарди. Саволларга жавоб бериладиган куни синфимизга ўша ўқитувчи кириб келди. (У ниҳоятда талабчан... Йўқ, кечирасиз, аниқроғи, қўпол ва баджаҳл эди.) Сатторов ўқувчиларга бир назар ташлади.

— Хўй-ўп, мана бу саволни ким сўради? — у шундай деб ҳалиги мен ёзган саволни ўқиб берди.

— Мен,— дедим.

— Сенми? — деди Сатторов менга тикилиб. — Тур ўрнингдан. Хўй-п-п, отинг нима?

— Зафар...

— Зафар деган сўзнинг маъноси нима?

Мен индамадим. Сатторовнинг қалин қовоғи баттар қалинлашиб кетди:

— Сендан сўраяпман?!

Бу сўроқдан сўнг назаримда синфдаги ҳамма болалар партага энгашиб олишди. Гўё бошини кўтариб ўқитувчига қараса, ундан сўраб қоладигандай кўзларини партадан узмайди.

Мен яна индамадим. Сатторов ёнимга келди. Унинг лаблари пирпираб кетди.

— Савол беришга тилинг бору жавоб беришга йўқми?! Гапир деяпман!

— Билмайман! — дедим титраб.

— «Ойбек» дегани ҳам худди сенинг отингга ўхшаган от. Исмнинг маъноси бўлмайди, тушундингми? Иккинчи бунаقا бемаъни савол берма! — У столи томон бораркан, қўшимча қилди: — Тавба, синфнинг, наинки бу синфнинг, бутун мактабнинг одобли, билимли ўқувчиларидан бири, деб юрганимиздан чиқсан гап шу бўлса, бошқаларидан нима умид! «Ойбек» деган сўзнинг маъноси нима эмиш. Бунинг нима кераги бор сенга? Ундан кўра дарсингни қил, китобингни ўқи.

Сездимки, мен мактабда унча-мунча обрўга эгалигим, ўқитувчилар назарида юрадиган ўқувчи бўлганим учун шу сўзлар билан кифояланниб қўя қолди. Борди-ю, бошқа ўқувчи шу саволни берганда борми, бир-икки шаналоқ ейиши ҳам ҳеч гап эмас экан!

Кўрдингизми, Санам, ана ўшалар ҳам программани байроқ қилиб кўтаришган. Энди ўйлаб кўрсам, Сатторовга ўхшаган ўқитувчиларнинг бақироқлиги уларнинг саводсизлигидан экан. Дўй-пўписалар ўзининг чаласаводлигини яшириш учун бир ниқоб экан. Шундай бақироқлар институт домлалари орасида йўқ дейсизми...

— Э, тўлиб ётибди,— деди Санам.— Биттаси анави Пошшоев-да.

— Уша Пошшоевингиз ҳам программага ўлгудек ёпишиб олганлардан...

Шу пайт қўнғироқ чалинди. Зафар ирғиб ўрнидан турди.

— Бўпти, Санам, қолган гапни кейин гаплашамиз. Дарсим тугагач, келаман. Шеърни ювгани борамиз.

Зафар чиқиб кетди. Санам остонаяча келди-да, унинг орқасидан қараб қолди. Бир оздан кейин, репродукторнинг қулоғини буради. Ашула бўлаётган экан:

Сабр қилгил,
Тун тугар, ҳижрон тугар,
Кеча-кундуз кутганинг —
Афғон тугар.

Санам тик турганча ашулани охиригача тинглади. Хонанда гўё унга тасалли берәётгандек эди. Кўнгли бўшашиб кетди, киприклари намланди. Рўмолчаси билан кўзини артиб, чойнакнинг қопқоғидек кичкина кўзгуга қаради. Оппоқ юzlари, эртапишар олчадек нимқизил лаблари, қоп-қора кўзлари яна ҳам гўзалроқ кўриниб кетди.

Улар кинодан чиқишганда енгил шабада эсиб турарди. Буултлар тарқалиб кетган, ой сутдек ёруғ. Қуруқ совуқ этни жунжиктиради. Санам кулранг пальто-сига бурканиб, шарфининг бир учини чап елкасидан орқасига ташлаган. Оёғида этикча.

Автобус бекатига етишди. Аммо Санам ҳам, Зафар ҳам автобусга чиқайлик, демади. Иккаласи ҳам ўз хаёли билан банд. Бекатдан узоқлашгач, ўнг қўлдаги торгина кўчага бурилишди.

— Кино ёқдими? — сўради Санам жимликни бузиб. Зафар парвосизлик билан жавоб берди:

— Емон эмас...

— Конкрет?

— Тўғрисини айтсам, анави қиз образи менга ёқмади.

— Нега?

— Ўзингиз тушунгандирсиз.

— Йўқ, тушунмадим.

— Биласизми, — деди Зафар вазминлик билан, — бугун бирорвга эркаланиб, бирорни эркалаб ўтирган қиз эртасига бошқа бирор билан шундай муносабатда бўлишини қандай тушунмоқ даркор?

— Ахир севган йигити уни алдаб кетди-ку!

— Ҳамма гап шунда-да! Қаранг, алдаганда ҳам шунчаки эмас, номусини оёқ ости қилди. Шундай бўлдими, ўша йигитга албатта турмушга чиқиши керак эди...

— Нима, унга осилиб олсинми?

— Билмадим...

— Фурури-чи?! Уша номард йигитнинг олдида ўзини оёқ ости қилсинми?

— Ҳозир-чи? Оёқ ости бўлмадими? Бу аҳволда буна-қа «фурур» уни қаёққа олиб боради?.. Фурури бор қиз уни ҳар бир қадамда эҳтиёт қилади.

Улар совуқقا, шамолга парво қилмай, баҳлашишар эди.

— Йигитнинг сўзларига ишонди-да,— қизиши Санам.

— Ишонч яхши. Лекин кимга ишонишни ҳам билиш керак.

— Одамнинг яхши-ёмонлиги пешонасига ёзib қўйилмаган-ку. Кимга ишонишу кимга ишонмаслик кераклигини у шўрлик қаёқдан билсин. Қолаверса, уни севади. Севгандан кейин ҳамма нарсани унутади. Севгининг кўзи кўр дейишида-ку ахир.

— Йўқ, Санам, ҳамма фикрларингизга қўшилсам ҳам севади деганингизга қўшилмайман. Агар у йигитни севса, бундай қилмасди. Севган кишисидан айрилиш шунчалик осонмас. У бўлса, сен кетсанг бошқаси йўқми, дегандек, орадан бир ой ўтмаёқ ўзга бир йигит билан танишиб олди. Яна унисини ҳам, бунисини ҳам севармиш. Ахир ўзингиз ўйланг. Қандай қилиб иккаласини бир хилда сева олиши мумкин?

— Лекин у ҳам кимгадир турмушга чиқиши керакми?

— Турмушга чиқиш ёки уйланиш билан севги туғи-либ қолмайди-ку!.. Умуман айтганда-чи, Санам, мен шу биринчи муҳаббат, иккинчи муҳаббат деган нарсани тан олмайман. Бирорни чинакам, дилдан севган одам бошқа кишини ҳам худди шундай севишига қўзим етмайди. Мен муҳаббатни ягона бир нозик туйфу, деб биламан. Уни парчалаш мумкин эмас.

Улар гап билан бўлиб анча юриши. Оппоқ нур сочиб турган ой юзини булатлар пардаси қоплади. Шамол кучайди. У қайлардандир қор учқунларини бошлаб келди.

— Майли, кинони қўяйлик, Зафар ака,— деди Санам чуқур хўрсиниб,— сиздан бир нарсани сўрасам майлими?

Негадир Зафарнинг юраги орзиқиб кетди. Бироқ ўзини тутди.

- Марҳамат,— деди у.
- Сиз бировни севасиз-а?
- Нимайди?
- Айтинг аввал.
- Ҳа.
- Қимни?
- Шартми?— деди Зафар оғир тин олиб.

Ўзим айтаман бўлмаса.— Унинг овози титраб кетди. Санам ҳозир Зафарга бу ҳақда гап очаркан, ўзи ич-ичидан эзилиб кетарди. Чунки у рақибаси номини ўзи севган йигити тилидан эшитишни сира истамасди. Аммо нима бўлса ҳам бу масаланинг ҳаммасини батафсил билгиси келарди. Унинг кўнглидагини сезгандек, Зафар ҳам ортиқча қаршилик қилмади.

- Ихтиёргиз...

— Ноила опани...— Санам «севасиз» деган сўзни айта олмади.

Санамдан бу гапни эшитган Зафарнинг ичида бир нарса узилгандай бўлиб кетди.

— Ким айтди сизга?— у Санамнинг қўлидан тортиб тўхтатди.

Шамол олдингидан ҳам зўрайиб, увиллай бошлади. Қор тезлашди.

Санам Зафарнинг кўзига қаради. Зафар ундан жавоб кутар, Санамнинг тили қотиб қолгандек айланмасди. Қизнинг тилига сўз келиш ўрнига кўзига жиқقا ёш келди. У киприк қоқса кўз ёшлари томиб кетгудек, лекин унинг киприклари ҳам тилидек қимиirlамасди.

— Айтинг, Санам,— деди Зафар секин,— кимдаи эшитдингиз?

- Санам Зафарга жавдираб тикилди:

- Ҳеч кимдан...
- Бўлмаса...

Санам чидай олмади, йиғлаб юборди.

— Мен... сизни... сизни ҳамиша кузатиб юраман. Лекин... лекин гоҳида Ноила опа билан гаплашиб турганингизни... Бир куни кинода ҳам кўриб қолдим сизларни...

Санам бошқа гапиролмади. У пиқ-пиқ йиғлар эди.

Зафар Санамни овутмоқчи бўлар, лекин тилига бирон-бир жўялироқ сўз келмасди.

Бўрон кўтарилиди. Бир зумда ҳамма жой оппоқ чойшабга ўралди. Зафар енгил кийингани учунми, совқота бошлади. Санам шамол тортқилаган шарфини қайтадан ўраб олди.

— Кечиринг мени, Зафар ака, сизни хафа қилиб қўйдим... Энди сиз кетаверинг, уйимизга яқин қолди, ўзим етиб оламан.

Зафар чурқ этмади. Шу кўйи иккови икки томонга кетди.

VI

Ҳадеганда автобус келавермади. Санам жуда совқотиб кетди. Этиқасидан сув ўтиб, оёғи караҳт бўлиб қолди. Бунинг устига бекатда ҳеч ким йўқ. Қўрқади. У оёқларини бир-бирига уради. «Ишқилиб Ҳилола уйида бўлсин-да. Агар у бўлмаса нима қиласман? Яrim кечада кимникига бораман? Ишқилиб Ҳилола бўлсин-да...»

Ниҳоят, бир автобус келиб тўхтади, шофёр олдинги эшигини очиб сўради:

— Қаерга борасиз, синглим?

— Институт ётоқхонасигача олиб кетинг, жон амаки, жуда совқотдим.

Шофёр бир олдинга қараб олди-да, «чиқинг», деди.

Автобуснинг охирги ўриндиғида бир йигит билан бир қиз ўтиради. Қиз йигитнинг пинжига кириб кетган. Рӯпарада ўтирган йигит уларга тикилиб борарди. Санам чиқиши билан ҳалиги йигит унга кўзини қадади. Санам унга ортиқча эътибор бермади. У қор ёпишиб қол-

ган деразадан ташқарига қараганча ҳар хил нарсалар ҳақида ўйлаб кетди. Негадир ҳозиргина онаси билан бўлган воқеани эмас, Зафарни ўйларди. «У мени севмайди, севгани бор. Ноила опани севади... Қандай баҳтили-я, Ноила опа!.. Баҳтили? Баҳтлимикан? Йўқ, шошилма, Санам. Ноила опа чинакам баҳтили эмас. Зафар ака уни севгани билан баҳтили бўла қолмайди-ку!

Зафар... Зафар ака унга уйланармикан? Ота-оналари унашармикан? Бўйдоқ йигит болали жувонга уйланармиш... Тавба!.. Наҳотки, шундай бўлса! Наҳотки, Зафар акадай ақлли, мулоҳазали йигит шундай қилса? Лекин севади-да. Шу ҳақиқий севгимикан?.. Наҳотки одамнинг ғуруридан, иззат-нафсидан, ор-номусидан муҳаббат кучли чиқса! Кучлимикан-а? Ҳа, кучли! Кучли бўлмаса, нега ўзим Зафар акани Ноила билан «юришини» била туриб севаман. Нима учун бугун Зафар акага сизни севаман деб айтдим? Бордию Зафар ака: «Сенга уйланман, Санам», деса, «Йўқ, сиз Ноила опа билан юргансиз, сизга турмушга чиқмайман!» дея оламанми? Мутлақо! Кошкийди Зафар ака шундай деса!»

Автобус қаттиқ тормоз бердию Санам олдинга қалқиб кетиб, хаёли бўлинди.

— Сиз ҳам шу ерда тушасизми, синглим? — деди шофёр.

— Ҳа. Раҳмат, амаки,— деб ҳақини тўлаб тушиб кетди.

Қор ҳамон уриб турибди. Санам тўғридаги ётоқхона томонга югуриб кетди.

Шу маҳал забардаст қўллар унинг елкаси оша маҳкам қучоқлади-ю, қўйворди. Санам дарҳол орқасига ўгирилди. Ортида беўхшов тиржайғанча бир йигит турарди.

— Жаҳлингиз чиқмасин, жонон қиз.

Сумкаси билан унинг юзига урганини Санамнинг ўзи ҳам билмай қолди:

— Аблаҳ!

Йигит дарҳол сумканинг изи тушган жойга кафтини

босди. Ўнг қўли билан Санамни силтаб тортди. Санам яна сумкасини кўтарди. Лекин у юзига урилган қаттиқ шапалоқ зарбидан ўзини ўнглолмай қорга йиқилиб тушди. Санамнинг кўзидан ўт чиқиб кетди, қулоғи остида нимадир узоқ вақтгача шанғиллаб турди.

Йигит бошқа индамади. У кетаётганда «ифлос» деганини Санам аниқ эшилди.

Санамнинг жуда хўрлиги келиб кетди. «Бугун чап ёнбошим билан турувдимми, нима бало!» Йиғлаб юборди. Ўнга йигитнинг урганидан ҳам кўра ҳақорати қаттиқ таъсир қилди.

У пальтосининг қорларини қоқиб, йўлга тушди.

Санам ётоқхонага кириб боргандা ўзини тутиб олган эди. Фақат бир нарса уни ташвишга соларди. «Ҳилола бўлмаса нима қиласман? Ўзи бўлмасаям дугонаси бордир хонасида...»

Ётоқхона эшиги олдида турган хотин: «Киритмайман, кеч бўлди, ҳамма ухлади энди», деб кўп тихирлик қилди. Санам ялинди-ёлворди. Лекин кўндиrolмади. Охири ҳозирги воқеани айтиб берди. Бундан қоровул хотиннинг раҳми келди шекилли: «Қўймадинг, қўймадинг-да. Майли, кира қол» деди.

Ҳилола дугонаси билан иккинчи қаватда яшарди. Санам уларнинг эшигини астагина чертди. «Ким?» деган овоз эшишилди. Бу Ҳилоланинг товуши эди. Санам севиниб кетди.

— Ҳилола, бу мен, Санамман.

— Вой, Санам! Тинчликми?— деди Ҳилола эшикни очиб.

— Тинчлик, тинчланинг, Ҳилола.

VII

Қарима опа аччиқ кўк чойдан бир-икки пиёла босиб босиб ичди. Бир оз ҳовуридан тушгандай бўлди. «Эшикни очсаммикан?» хаёлидан ўтказди. «Озгина турсин,

иккинчи қилмайди, сабоқ бўлади. Қеч келгани... хўп, майли. Индамадим шунча пайт. Бегона йигит билан қўлтиқлашиб юргани нимаси? «Қўшнижон, қизингиз бир суксурдай йигит билан қўлтиқлашиб келяпти. Бир-бирига бирам ярашилти...» Қўшнидан, яна Ҳожардан бу гапни эшлиш осонми менга. Ӯзи-ку мени узиди олишга баҳона тополмай юрувди. «Ҳаммани гапирасану ўзингни қизинг нима қилиб юрипти?» дегани эмасми бу. Қўшиб-чатиб бутун маҳаллага ёди энди... Эҳ, Санам-а! Наҳот-ки юзимни ерга қаратсанг».

Хаёлни чалғитиш учун телевизор қўйди. Хоккей бўляпти экан. Қарима опанинг ёмон кўргани — футбол, хоккей. Ўчирди. Қейин аста бориб эшикни очди. Санам йўқ. У ёқ-бу ёқни қаради. Қўринмади. Чакирди:

— Санам, ҳо Санам...

Жавоб бўлмади. Эгнига пальтосини ташлаб пастга тушди. Ташқарида осмон ун элаяпти. Санам йўқ. Ӯйланниб қолди: «Биронта қўшниникига кирдимикан? Йўқ, кирмайди. Унинг ўжарлиги бор».

Вазмин қадамлар билан юқорига кўтарилди. Ӯйга толди. «Қаёққа кетдийкин? Оббо тентаг-эй!»

Карима опа ўз қилмишидан ўзи пушаймон бўлди. Шу совуқда, ярим кечаси қаерга боради шўрлик қиз? Нима бўлганда ҳам уйга кирилса бўларди. Ҳар қанча гапи бўлса кейин гапиради. Ҳеч шу феъли қолмади-да.

Турли хаёллар гирдобида қолди она. Бечора Санам ҳозир қайси кўчаларда тентираб юрган экан? Минг килса ҳам она — она экан-да. Санамни ўйлаган сари дили хижил бўлар, ўзини ўзи койирди. Санам Карима опанинг ёлғиз фарзанди. Фақат ёлғиз қизи бўлса ҳам майли эди-я, ёлғиз суюнчиғи, овунчоғи, ҳатто ҳамдарди. Санам эндинигина той-той бўлганда отаси машина ҳалокатига учраб қазо қилган. Ӯшандада Қарима опа ҳам бир ўлиб тирилганди. Одамлар марҳумдан кўра Кари-

ма опанинг аҳволига кўпроқ ачинишган эди. Бечора икки кунда озиб, ранглари сомондай бўлиб қолувди. У эрининг тобутини қучоқлаб: «Руҳингизни ранжитмайман, мана шу полопондай қизингиз ҳаққи ишонинг!»— деб йиғлаганди. Карима опанинг додлаганини кўрганлар орасида кўзига ёш олмаган қолмаган эди.

Санам йигирма иккига кирди. Карима опа эрининг тобутини қучоқлаб айтган гапларини, бир кун бўлсин, эсидан чиқармади. Бошқа турмуш қуришни хаёлига ҳам келтирмади. Ўзини ишга урди. У ЗАГС мудираси. Бу йиллар давомида қанча-қанча янги оиласарни кўрди. Ёш келин-куёвларга никоҳ қоғози топшираётганда ўзи ҳам ёш боладай севиниб кетади, аммо юрагининг алла-қаерини нимадир ўртаб ўтади. Гоҳида кўзида ёш қалқса, буни севинчдан деб, ўзига-ўзи тасалли беради. Ўзининг баҳтини мана шу келин-куёвларда, ёлғиз қизи — Санамда кўради. Санамни ҳам келин либосида кўришни орзу қиласди. Аммо унинг кимнингдир уйига келин бўлиб тушишини, уйда ўзининг ёлғиз қолишини ўйласа — юраги увишиб кетади. Лоақал биронта ўғли бўлмаганидан ич-ичидан эзилади. Ўғли бор дугоналарига астойдил ҳаваси келади.

Бу туйғуларини ўзидан бошқа ҳеч ким билмайди. Кўринган одамга дардини дастурхон қилиб ёзадиганларни Карима опа ёқтирмайди. Ўзи эса бирон кишига кўнглини ёрмайди. Дугоналари: «Бунинг ичи қудуқ — одам тушса ҳам йўқ бўлиб кетади», деб ҳазиллашади. Баъзилари эса: «Эри бўлмасаям бирон-бир нарсадан ҳасрат қилганини эшитмадим-а», деб унинг иродасига қойил қолади. Бўлмаса, Карима опанинг ичлари эзилиб кетган кунлари оз эмас. Йиғлайвериб кўзларида ёш ҳам қолмади. Кўз ёшини ҳам ҳеч кимга билдирамади, кўрсатмади. Тунда кўрпага бурканиб йинглар эди. Аста-секин ҳаммасига кўникди, зерикканида, юраги сиқилганида ёлғизи билан овунди. Санам ҳам эсини танигандан бошлаб онасининг аҳволини тушунди. У

онасини жудаям яхши кўради, нима қилиб бўлса-да унинг кўнглини олгиси келади, онасининг хафа бўлишини сира истамайди. Санам балоғатга етгач, онасининг маслаҳатчисига айланди. Карима опа яхшию ёмон — ҳамма гапни қизи Санамга айтади, у билан бир дўсти каби гаплашади, қизидан ҳам ҳеч нарсани яширмасликни талаб қилади. Санамнинг оқиласигидан, ақл-фаросатидан Карима опа мамнун, бироқ буни қизига билдирмайди...

Карима опа шуларни бир-бир хәёлидан ўтказиб жуда диққати ошди. Увиллаётган шамол, бўралаб ёғаётган қор унинг кўнглини баттар эзарди. Назарида Санамнинг ёлғиз ўзи кимсасиз кўчада бораётгандай, кучли бўрон унинг юришига халақит берётгандай туюларди. «Қаерга кетдийкан?— ўйларди Карима опа.— Аммасиникига бордимикан?» У шу ўй билан ўрнидан турдию қайнинглисига қўнгироқ қила бошлади. Карима опа телефон номерини тераркан, кўнглида, «ишқилиб ўша ерда бўлсин-да», деб ўйлар, юраги гуп-гуп ураги эди. Трубкани қайнинглисинг кичкина ўғли олди. «Санам опанг бордими?» деб сўраган эди, «йўқ», деб жавоб берди. У бошқа гапирмай трубкани жойига қўйди. Юраги яна ҳам тезроқ ура бошлади. Хаёлига турфа фикрлар келди. Уларнинг баъзилари кўнглига таскин берса, айримлари юрагини ўйнатиб юборар эди.

Анчагача Карима опанинг кўзига уйқу келмади. Санамнинг қаерга кетганини, ҳоли не кечганини ўйлаб тоңг оттириди.

VIII

Ноила ўғлини ухлатди-да, ўзи эртанги дарслар конспектини ёзишга ўтириди. Лекин қўли ишга бормади. Хаёлига бот-бот Зафар келаверди.

Зафар ажойиб йигит. Унинг ширин сухбатлари, одамларга муносабати Ноилага ёқиб қолди.

Ноиланинг хаёлига ўзининг турмуши, ёшлиги тушки. Унинг отаси баджаҳл одам эди. Уни кинога, театрга боришга ҳам қўймасди. Ноиланинг уй-рўзғор ишларидан боши чиқмасди. Бироқ ўқишини ташламади, ҳар қанча қийналса ҳам ўқиди, сиртдан бўлса-да, институтни ҳам битирди.

Аммо турмуши турмуш бўлмади. Эри ҳадеганда тер-гар, ураг, ўтируса ўпоқ, турса сўпоқ, деб ҳақорат қиласди. Ноила бор дардини ичига ютар, арзини ҳеч кимга айттолмасди. Отасига бу ҳақда сўз очиб қолгудек бўлса, «оиланинг тинч-нотинчлигига аёл сабабчи», деб қўя қолар эди. Отасидан ўтиб бир нарса дейишга онаси журъат этмасди.

Кунлар шу тариқа ўтаверди. Бироқ бу куни ҳам ортиқчалик қилди. Эри зотилжам касалига мубтало бўлди. Охири шу касал уни олиб кетди. Ёлғиз ўғли отасиз қолди. Ўшанга ҳам тўрт йил бўлди. У ёқ-бу ёқдан одам келганда ота-онаси ҳам, бошқа таниш-билишлар ҳам: «Ёш умрингни хазон қилма, ўлим ҳамманинг бошида бор, турмушга чиқ», дейишди. Ноила унамади. У турмушга чиқишини ўйлаганди, бир андиша юрагини мушукдек тирнарди: гулдек боласини кимнинг турткисига қолдиради?

Зафар билан танишидию Ноиланинг турмуш ҳақидаги тушунчалари анча ўзгарди. Бўйчан, буғдоиранг, қўй кўзлари доимо чақнаб турувчи бу истараси иссиқ йигит Ноиланинг кўзини очгандай, лойқаган фикрларини тиндиргандай бўлди.

Ноила Зафарни биринчи марта мактаб комсомолларининг йиғилишида ёқтириб қолганди. Ўшанда Ноила нима сабабданdir мажлисга кечикиб келди. У залга кирганди, мактабга яқинда ишга келган ёш ўқитувчи нутқ сўзларди. Бу Зафар эди. Ноила эшикни очганди, ҳамма унга қаради. Мажлисга раислик қилувчи Ноила-

га ўтириңг, деб имо қилдию Зафарга қараб, гапиравенинг, деди. Зафар секин, шошилмай сўзида давом этди:

— Мен бу мактабда янги одамман,— деди у.— Ҳали мактабнинг паст-баландини унча яхши билмайман. Лекин мактаб комсомоллари ҳақида шу қисқа вақт ичида олган тасаввуримни айтмоқчи эдим. Бу ерда сўзга чиққан ўртоқлар комсомолнинг вазифаси, бурчи ҳақида жуда яхши гапларни айтишди. Аммо уларнинг ҳаммаси ўз нутқларида комсомолнинг энг асосий вазифаси, деб, взнос тўлашни кўрсатдилар, шу нарсага кўпроқ эътибор бердилар. Менимча, масалага бундай бир ёқлама қарап тўғри эмас. Ахир ўзингиз ўйланг, комсомолнинг бурчи фақат взносни ўз вақтида тўлашдан иборатми?! Наҳотки, ўқувчи-ёшларга шундай таълим берсак! Йўқ, бундай қилиш мутлақо нотўғри! Чунки бунинг оқибати ёмон бўлади. Бир мисол келтирмоқчиман. Ҳаммангиз яхши биласиз, бир ойча илгари мактабимизнинг бир неча ўқувчиси комсомол сафиға қабул қилинди. Ўша қабулдан бир-икки кун олдин мен бир гуруҳ ўқувчиларнинг суҳбатини эшишиб қолдим. Бир бола яқинда комсомолга ўтиши ҳақида хурсанд бўлиб гапиради. Шу маҳал бошқа бир ўқувчи унинг гапини бўлди:

— Э, қўйсанг-чи комсомолни, нима қиласан бошингни оғритиб. Мана, мен ўтганимга бир йил бўлди, взнос олишдан бошқа иши йўқ. Қайтанга дарсга кечикиб келсанг ёки бирон ножӯя иш қилсанг, «қанақа комсомолсан», деб қулоқ-миянгни қоқиб олади.

Кўрдингизми, ўртоқлар! Айрим ўртоқлар комсомолнинг ишини, фаолиятини, бурчини қандай тушуняпти. Шунинг учун комсомолнинг ролини ошириш керак! Қаранг, мактабимизда эски, дидсиз ишланган бир фотомонтаждан бўлак на биронта тузукроқ деворий газета, на стенд бор. Буларни ким қилиши керак? Комсомоллар! Хуллас, мана шу ва бошқа ташкилий-амалий ишларнинг йўлга қўйилишида комсомоллар жонбозлик

кўрсатишлари даркор. Биз уларга коммунистларга ишонгандай ишонишимиз лозим.

Зафарнинг гапи кўпчиликка таъсир қилди, айниқса Ноилага. Ўшандан кейин бу йигитга Ноиланинг ҳурмати ошди. Бора-бора улар бир-бири билан жуда яқин бўлиб кетишиди. Уларнинг дунёқараши, фикрлари кўпинча бир жойдан чиқарди.

Шуларни яна эслаганда Ноиланинг кўнглига алла-қандай ширин туйғулар югурди, дили равшан тортди. У Зафар ҳақида тун бўйи ўйласа ҳам зерикмасди. Ҳаёл чимматига ўралиб қолиб конспект ёзмагани учун Ноила ўзидан ўзи ранжиди. Энди ёзгиси келмади. Ширин ҳаёл оғушида ўринга кирди. Кўрпа унинг оппоқ баданларига муздай тегди. Шу маҳал ёнида Зафар бўлишини истади. Лекин ўзининг бу хаёлидан ўзи уялиб, майин жилмайди-да, юзини бекитиб олди.

IX

Зафар Содиқнинг ғўнғир-ғўнғир овозидан уйғониб кетди. Туш кўриб ётган экан. Қишлоғида юрган эмиш. Қишлоғи шундоққина тоғнинг этагида жойлашганмиш. (Туш қизиқ нарса-да, бўлмаса Зафарларнинг қишлоғи қаердаю тоғ қаерда.) Авжи баҳор эмиш. Зафар, бир ёнида Ноила, бир ёнида Санам билан лола, равоч териб юрганмиш. Ноила ҳам, Санам ҳам тоққа сира чиқмаган, лоланинг ҳам, равочнинг ҳам қандай ўсишини мутлақо кўрмаган экан. Зафар уларга тоғ табиатини, ажойиб манзараларини кўрсатиб юрганмиш. Қизларнинг кучоги тўла лола эмиш. Улар тепаликка кўтарилганлари сари лоланинг, равочнинг яххисини топармишлар. Бир-бирини қувлашиб, талашиб-тортишиб лола теришармиш. Бир маҳал Зафар битта жуда чиройли, нақ пиёладай келадиган лола топиб олибди. Қизлар «мен-

га-менга!» деб Зафар томонга югуришибди. У бундай гўзал, чиройли лола топганидан ғоят севинармиш. Зафар лолани баланд кўтариб Ноилага қараб чопибди. Шу вақт у катта бир тошга қоқилиб оғзи билан ерга урилибди, қўлидаги лола эса уч қадамча нарига учиб кетибди. Санам югуриб келганмиш-да, ҳалиги лолани олиб бағрига босганимиш. Ноила Зафарга ҳам қарамай: «Менга бер, бу менинг лолам!» дермиш. Санам эса: «Йўқ, ким олдин олган бўлса шуники, бермайман!» деб лолани баттар бағрига босармиш.

Зафар уйғонди, остидаги кўрпачалари оғиб каравотнинг темири оёғига ботиб кетибди. Содиқ ўзича ғинғиллаб ашула айтиб соқол олишга ҳозирланадётган экан. Зафар кўзини очиши билан жаврай кетди:

— Зафар, турдингизми? Менга қаранг, жўра, жуда ажойиб ашулалар кўчайиб кетяпти-да. Шу шоирларга ҳам ҳайронман-да, бу гапларни қаердан топиб ёзишар экан, а?

Зафар индамади. Лекин Содиқ уни ҳол-жонига қўймади:

— Ахир бирон нарса десангиз-чи? Мунча шоирларга ўхшаб... Э-ҳа, дарвоқе, ўзлари ҳам шоир-ку...

Содиқнинг очиқ кўнгиллиги, чўрткесарлиги Зафарга ёқар, аммо бачканा қилиқлари баъзан унинг жигига тегар эди. Зафар бир неча бор: «Кўп бачканалик қилманг, Содиқ, уялмайсизми? Дуппа-дуруст педагогсиз, ахир», деб танбеҳ берса-да, у парво қилмади. Қейинги пайтларда унинг гапига унчалик эътибор бермай қўйди. Ҳозир ҳам индамади. Зафарнинг хаёли кўрган тушида. Содиқ ҳамон бидирларди:

— Бу дейман, қизи тушмагур кеча сизни ростдан ҳам хафа қилган экан-да. Еки ўзингиз бирон нарса дингизми? Ҳа, сизам анойи эмассизку-я...

Зафарнинг жаҳли чиқиб кетди:

— Бўлди деяпман сизга! Намунча эзмалик қилмасангиз.

— Хўп, тақсир, хўп,— деди Содиқ илжайганча қўлини кўксига қўйиб.— Тавба қипмиз. Мунча дўқ қилманг, айтдим-а, бир балоси бўлмаса, шудгорда қўйруқ на қилур, деб, кайфиятингиз бекордан-бекорга бузилармиди.

Зафар нонушта ҳам қилмай ишга жўнади. Содиқ унинг орқасидан «Хой Зафар, бирон бурда нон-пон еб олинг, яна дарсда силлангиз қуриб, гапиролмай қолманг», деганича бақириб қолаверди. Зафар миқ этмай чиқиб кетди. Содиқ ўзича: «Тавба, жуда ғалати йигитда», деб ғулдираб қўйди.

X

Зафар ётоқхонада яшаб қурилишда ишлади, институтни битиргач, мактабга ишга ўтди. Ҳозир мана шу ҳовлида ижарада туради. Ҳовлининг эгаси марказдаги кўпқаватли уйларда яшайди. Содиқ ҳар сессияда Зафарнинг ёнига келади. Бунга иккаласи ҳам ўрганиб қолган. Ҳозир ҳам Содиққа сессия бошланган, Зафарнинг олдига келиб, у билан бирга турибди.

Содиқ дарсга хоҳласа боради, хоҳламаса йўқ. Зафар кетгандан сўнг у ҳафсала билан соқолини олди. Унгача электр чойнакдаги чой ҳам қайнади. Содиқ «уҳ-уҳ»лаб юзига атир сепдию чой дамлади. У чой ича туриб ўйлади: «Ўқишга борсаммикан ёки бормасаммикан? Э, бориб ҳам нима қилдим, ундан кўра уйда ётиб китоб ўқинганим фойдалироқ». У шу қарорга келдию каравотга ётиб китоб ўқий бошлади. Лекин миясига ҳеч нарса кирмади, кўз ўнгига кечаги қиз гавдаланаверди. Унинг чиройли қадди-қомати, совуқдан сал қизарган оппоқ юзлари кўз олдидан кетмасди. «Эҳ,— деди Содиқ китобни столга ирғитиб,— дунёда яшаганга яраша ўшана-қа қизлар билан яшасанг-да. Аҳ!— у кафтларини бир-

бирига ишқади.— Шаҳарликларга маза-да... Бизларга қийин. Бу қишлоқ деганингда бирон нотаниш қиз билан шунчаки гаплашсанг ҳам ҳар хил гап тарқатиб юбори-шади-я,— Содиқнинг хаёли тобора чигаллашиб, уни аллақандай сирли самоларга олиб чиқарди.— Ё тавак-кал қилиб шартта шаҳарга кўчиб келсаммикин?— У ўй-ланиб қолди.— Бўлмайди! Бу гап айтишга осон, иккита думни етаклаб қаерга ҳам борардим. Ундан кейин, ким менга жой тайёрлаб ўтирипти. «Мана, мулла Со-диқ, кела қолинг», деб. Қишлоқда томиримиз жуда мус-таҳкамлашиб кетган.— Унинг миясига ажойиб фикр келгандай яна ўйланиб қолди.— Шошма! Хотинни ҳам, бола-чақани ҳам ташлаб келсам-чи? Ўзи хотиним бугун бу, эрта у деб минғиллаб, қулоқ-мияни қоқиб олган-ку! Мана, фиринглассанг тоза фирингла десаму ҳаммасидан воз кечсам!..»

Содиқ гарчи чапани, борди-келдининг фарқига унча эътибор бермайдигандек кўринса-да, бир ишни қилишдан олдин обдон ўйлаб кўрар, шу ишдан озгина бўлса-да, манфаат келсагина уни қилишга киришарди. Ҳозир ўйлаган фикрларини ҳам роса тарознга солиб кўрди.

«Йўғ-э,— деди у ўзига-ўзи,— бундай қилиш унча яхшимас. Хотин, бола-чақани ташлаб, ҳайт деб шаҳарга келсам-у, бу ерда хор-зор бўлиб юрсам... Ҳозирча ўша эски аравани ҳайдаб тураверайларлик-чи, кейин бир гап бўлар».

Орадан кўп ўтмай Зафар келди. Унинг барвақт кел-ганидан Содиқ ҳайрон бўлди.

— Ҳа, жўра?..

Зафарнинг кулиб турган кўзларидан, майин жилма-йишидан кайфияти яхши эканлиги зоҳир эди.

— Ие, нега дарсга бормадингиз?

— Э, қўйсангиз-чи, жўра, шу мижғов ўқитувчиларин-гизнинг дарсига бориб нима қиласман.

— Тўғри айтасиз,— деди Зафар, пальтосини ечиб каравотга ташларкан,— айрим домлаларнинг лекцияси-

ни эшитгандан кўра кампирларнинг эртагини тинглаган маъқул.

Содиқ ётган жойидан ирғиб туриб стулга ўтириди-да, Зафарга тикилди.

— Хўш, энди у-бу гапни қўяйлик, жўра, ўзларидан сўрасак, кайфлари чоғ кўринади?

— Э, тавба,— деб кулиб юборди Зафар,— ўзи сиз қанақа одамсиз? Кишининг кайфияти ёмон бўлсаям қўймайсиз, яхши бўлсаям. Ахир одам бўлгандан кейин гоҳ хурсанд, гоҳ хафа бўлади-да. Одамзоднинг бошида ҳар куни минг хил савдо. Сурат эмасманки, ҳамиша бир хилда тиржайиб тураверсам.

Зафар Содиқ билан гаплашиш асносида кийимини алмаштириди. Оқ нейлон кўйлаги билан галстугини ечиб, свитер кийди, соч ёғидан кафтига ишқалаб сочига сурди. Содиқ Зафарнинг бошқатдан кийинаётганини кўриб ҳайрон бўлди.

— Ҳа, жўра, яна йўл бўлсин? Свиданияга кетяпсизми дейман-да. Лекин шуни ҳам айтайки, ўлгудек эгоист боласиз, ўзингиздан бошқани ўйламайсиз. Биз бечорани бирон марта у ёқ-бу ёққа олиб борай демайсизам.

Зафар унинг гапидан завқланиб кулди ва кечроқ қайтишини айтиб жўнади.

XI

Зафар янги дарсни ўтиб бўлди-да, «саволлар борми?» деди. Учинчи қатордаги партада ўтирган Қомил қўлини кўтарди.

— Дарсдан ташқари савол бўлса ҳам майлими?

— Марҳамат,— деди Зафар унинг саволига қизиқсиниб.

— Самарқанд, Бухородаги миноралар, мадрасалар нечанчи асрда қурилган?

— Булар ҳаммаси бир вақтда қурилмаган. Бири тўқизинчи асрда қурилган бўлса, бири ўн иккинчи асрда барпо бўлган. Кўпчилиги ўн тўртинчи-ўн бешинчи асрларда қад кўтарган.

Комил «айтайми-йўқми» деган маънода ёнида ўтирган шеригига қараб олди. Буни сезган Зафар:

— Тортинма, айтавер, нима демоқчисан? — деди.

— Тарих ўқитувчимиз айтган эдики,— деб сўзида давом этди Комил.— Илгари замондаги одамлар, қадимги авлод-аждодларимиз жуда қашшоқ яшашган экан. Шундай бўлса, ўша минораларни, мадрасаларни қандай қилиб қуришган?

Зафар ўйланиб қолди: «Айтсаммикан, булар менинг фикримни тўғри тушунишармикан?»

— Тарих ўқитувчингдан сўрамадингми?

— Сўрадим.

— Нима деди?

Комил яна ёнидаги шеригига қаради. Шу маҳал орқада ўтирган бир қиз:

— Ҳеч нарса демади, қайтанга бунақа саволингни йигиштири, деб Комилни уришиб берди,— деди ҳозиржабоблик билан.

Комил ҳам Зафарга қараб «шундай», дегандек бошини қўмирлатиб қўйди.

— Бўлмаса эшиш,— деди Зафар.— Аввало бунақа миноралар, мадрасалар Самарқанд ёки Бухородагина эмас, Хевада ва бошқа шаҳарларда ҳам бор. Уларнинг ҳаммаси халқимизнинг ўтмишдаги маданий мероси ҳисобланади. Халқимиз фақат тарихий ёдгорликлари билан эмас, жуда улкан олимлари, шоирлари билан ҳам дунёга машҳур. Беруний, Ибн Сино, Улуғбек, Навоий, Бобурларни биласизлар. Бу сиймоларнинг илмий-ижодий мероси кўплаб мамлакатларда ўрганилади.

Ўқувчилар минқ этмай тинглашар, Зафар эса иштиёқ ва илҳом билан сўзларди:

— Ўтмишдаги аждодларимизнинг қандай яшаганлиги ҳақида гапирадиган бўлсак, тарихдан яхши маълумки, XIV—XV асрларда бизнинг ўлкамизда феодализм тузуми мавжуд бўлган. Бундай жамиятда барча халқ бир хилда яшамаганлиги, бойлар, катта ер эгалари роҳат-

да-ю, меҳнаткаш халқ оч-яланғочликда умр кечирган-лигини айтмасам ҳам бўлади.

Тарихий ёдгорликларнинг қурилиши эса бошқа мазала. Ўша замондаги мадрасаларда асосан диний таълимот ўргатилган. Тўғри, уларда ҳамманинг боласи ҳам ўқий олмаган. Фақат бойларнинг фарзандлари таҳсил қўришган. Меҳнаткаш халқнинг кучи, моли эвазига қурилган бўлишига қарамай, бу мадрасаларда сабоқ олиш уларнинг ўғилларига насиб этмаган. «Айшни нодон суриб, кулфатни доно тортадур», деган-ку Фурқат. Темур даврида, ундан кейинги замонларда ҳам аҳвол шунаقا кечган.

Даврлар ўтиши билан бу ёдгорликлар халқ мулкига айланган. Ҳар қандай кашфиёт ҳам, улкан иншоот ҳам маълум бир гурӯҳ ёки айрим шахслар бошчилигida меҳнаткаш халқ меҳнати билан яратилган. Йиллар ўтгач, улар халқнинг моддий-маданий мероси бўлиб қолган. Шунинг учун ҳам Улуғ Октябрь инқилобидан кейиноқ доҳиймиз Владимир Ильич Ленин тарихий ёдгорликларни муҳофаза қилиш ҳақида маҳсус декрет қабул қиласди. Партия ва ҳукуматимиз бу масалага ҳозирги кунда қанчалик катта эътибор берадиганлигини ўзларингиз яхши биласизлар...

Зафар гапиришдан тўхтаб, болаларга разм солди. Улар партага михлаб қўйилгандек, қимирламай ўтиришарди.

— Саволингга қисқача жавоб шу. Бу масалалар тўғрисида гапираман десак, суҳбатимиз жуда чўзилиб кетади. Қоловерса, кейинчалик, мактабни битириб, институтга кирсанглар, буларни атрофлича ўрганасизлар.

Ўқувчилар ўқитувчидан кўзини узмай, диққат билан қулоқ солиб ўтиришарди. Шу топда уларнинг қалбидаги институтга кириш иштиёқи туғилди. Айниқса, Комил, студент бўлишни жуда ҳавас қилди.

Ўқувчилар ҳолатини сезган Зафарнинг хаёлига шун-

дай фикр келди: «Аслида биронта тўгарак очиш керак. Ушанда ҳозиргидек турли саволларга бемалол жавоб бериш мумкин бўлади. Бу ишга балки тарих ўқитувчиси ҳам ёрдам берар».

Зафар бу фикрни болаларга айтган эди, улар, «майли, жуда яхши бўлади», деб чапак чалиб юборишиди.Faқат биринчи партада ўтирган Қосимжон чапак чалмади. У қўлини кўтариб, бақирди:

— Ҳай, ҳай, болалар! Намунча ҳовлиқасанлар? Тўгарак нимага керак? Шундогам эртадан кечгача дарс. Минорани кўргиларинг келса, борларинг. Мана, ман бориб кўриб келганман, нимаси қизиқ? Фиштдан қуррилган бир столба-да...

— Тўгарак очилса, фақат минора ҳақида гаплашмаймиз-ку,— деди Комил.— Адабиёт, тарих, яна бошқа фанларга оид қизиққан нарсаларимизни сўраймиз. Зафар акам гапириб берадилар.

Қосимжон беписандлик билан орқасига суюнди.

— Эй, менга керак эмас тўгарак. Ҳаммасини ўзим биламан.

Бутун синф ўқувчилари баравар қийқиришиди:

— Сени ҳеч ким мажбур қилаётгани йўқ! Келмасанг келма, бизга керак тўгарак!

— Мажбур қилиш қўлингдан келмайдиям-да!— деди Қосимжон яна манманлик билан.

Бу суҳбат Зафарни ажаблантириди. «Қосимжон отаси катта лавозимда ишлашини яхши билади-да. Уннинг ота-онаси билан ўғилларининг хулқи хусусида суҳбатлашишим керак».

Зафар хаёл билан ўқувчиларнинг тўполонига, тортишувларига эътибор бермай қўйди. Қўнғироқнинг жарангига унинг хаёлини бўлди.

— Болалар, тортишувнинг фойдаси йўқ. Тўгарак — дарс эмас, шунинг учун унга қатнашиш мутлақо ихтиёрий,— деди.— Кимнингки билими ошиб-тошиб кетган бўлса, нафақат тўгаракка, дарсга ҳам келмаслиги мум-

кин.— Қосимжон ўқитувчисига хўмрайиб қаради-да, унинг чиқишини ҳам кутмай, менсимаган кўйи ўзини эшикка урди.

...Зафар танаффусга чиқдию яна ўша тўгарак ҳақида ўйлаб кетди. «Дарҳақиқат, мактабда шунаقا бир тўгарак очиш керак».

Дарсдан кейин Зафар мактаб директорининг ҳузурига кириб, тўгарак масаласини айтди.

— Ҳм... тўгарак очаман денг? — директор савол назари билан Зафарга тикилди.— Ким айтди бу гапни сизга?

— Ҳеч ким айтгани йўқ, ўзим шундай фикрга келдим. Ҳар ҳолда ёмон бўлмасди, ўқувчиларнинг билими ни чуқурлаштиришда ёрдам бўлиши мумкин.

— Оғримаган бошингизни оғритиб нима қиласиз, ука. Оч қорним, тинч қулоғим, деб юравермайсизми. Ундан кўра уйланиш ҳақида ўйласангиз-чи.

Директорнинг бу гапидан Зафарнинг жаҳли чиқди. Аммо ўзини босиб, вазмин гапирди:

— Уйланиш— менинг шахсий ишим. Унга аралашибга ҳеч кимнинг ҳақи йўқ. Болалар билан турли мавзуда сухбатлашиш, савол-жавоб қилиш эса мен учун қизиқарли. Бундай иш учун ҳар қанча вақтимни аямайман.

— Демак, ўзингизни ўйлаётган экансиз-да,— деди директор қизишиб.— Мен айтдим-а, бунча жонкуяр бўлиб қолдингиз деб.

— Бу нима деганингиз? Ахир мен...

— Бўлди! Ҳеч қандай тўгарак очилмайди. Борди-ю, шу нарса зарур бўлса, ўйлашиб кўрамиз. Бу ишга бош қотирадиган сиздан кўра тажрибалироқ, билимлироқ ўқитувчилар бор.

— Бунинг нимасини маслаҳатлашиб ўтириш керак?

— Бемаслаҳат иш қилинмайди бизда, ука. Адабиётчи бўлсангиз ҳам ҳалқ ижодини яхши билмас экансиз, маслаҳатли тўй тарқамас, деган мақолчи эшитганми-

сиз? Ҳа, ундан кейин, коллектив деган гап бор. Коллективнинг юзига оёқ қўйиб, ҳар ким ўз билганини қилиб кетаверса, оқибати нима бўлади?.. Бизда якка ҳокими-ятчилик аллақачон тугаган...— Зафар директорга термилиб ўтиаркан, ажабланарди: бу гапларни якка ҳо-кимиятчиликка нима дахли бор?— Ҳа, айтгандай, Азларов масаласи нима бўлди?— Зафар индамади. Ҳозир у директорга қараб ўтирибди-ю, аслида уни кўрмасди, сўзларини эшитмасди. Гўё ҳайкалдек қотиб тураг, ҳатто киприк ҳам қоқмасди. Директор ҳайрон бўлди.— Ҳа, Зафаржон, сизга нима бўлди?— Зафар юзига илкис бирор совуқ сув сепгандай сесканаб кетди. Директор сал жилмайди.— Тинчликми ўзи?— Хижолатдан Зафарнинг юзлари қизаринқиради. «Йўқ, ўзим, шундай», деди. Директор яна бояги саволини қайтарди:— Бу, Азларов масаласи нима бўлди, ука?

— Ҳеч нарса бўлгани йўқ.
— Шуни тўғриланг, ука,— деди директор хиёл буйруқ оҳангидা.

Зафар бамайлихотир гапирди:

— Маслаҳатлашиб кўрамиз.

— Ким билан?

— Коллектив билан. Ахир коллектив деган гап бор.

Директор тутоқиб кетди. Унинг йўғон, калта бўйни, дум-думалоқ юзлари, ҳатто деразадан тушиб турган қуёш шуъласида ялтираб кўринган бошигача қизариб кетди.

— Кечирасиз, Турсун Ғиёсович, қаттиқроқ гапириб юбордим чофи.

— Йўқ, сиз қаттиқ гапирмайсиз, сиз жуда одобли, маданиятлисиз... Сиз...

Зафар индамади, директорнинг кинояларидан хижолат чекди.

— Катталарни ҳурмат қилишни биласизми ўзи? Нега бир гап айтганда, хўп демайсиз?

— Кечирасиз, Турсун Ғиёсович, қайси айтган ишингиизни қилмадим? Ахир...

— Бўлди,— унинг гапини бўлди директор.— Арзимаган битта баҳо деб қачондан бери ади-бади айтишамиз. Яна, «қайси айтган ишингизни қилмадим», дейсиз-а.

Зафар маънодор жилмайиб, директорга боқди.

— Турсун Фиёсович, нимаики қил десангиз қила-ман...

— А, боракансиз-ку,— директор қувониб кетди.— Одамни шунча қийнамай, хўп дея қолсангиз нима бўларди?

— Лекин Азларовга беш қўёлмайман-да. Чунки бу арзимаган иш эмас. Бир инсон тақдири деган гап.

Зафарнинг бу гапи директор ўчун ўчаётган оловга керосин сепишдай бир гап бўлди. У яна қизишиб кетди.

— Нега? Нега қўйиб беролмайсиз?

Энди Зафар ҳам ўзини босолмади:

, — Турсун Фиёсович, нима қиласиз ўзингизни ҳам, мени ҳам қийнаб. Ахир сабабини ўзингиз яхши биласиз-ку. Бу ерда ҳеч қандай сир бўлмаса. Билими бешга арзимаган болага қандай қилиб беш қўяман?

— Арзимайди денг?— киноя қилди директор.— Қаранг-а...

Зафар ўзини әркин қўйиб юборган, фикрларини тортишмай, яширмай, очиқ-дангал айтар эди.

— Ҳа, шундай. Мен ўқитувчи сифатидаям, комсорг сифатидаям у болани яхши биламан. Беш қўйишга сирайм арзимайди. Биз ҳозир суриштирмай унга беш қўйиб бераверсак, оқибати нима бўлади? Келажагнга масъулият билан қарайдими у? Ахир ҳамма фанлардан аъло баҳога ўқийдиган бола бошқаларга билими, хулқи, жамоат ишларида қатнашиши ва ҳоказо-ҳоказолар билан ўrnak бўлиши керак-ку! Азларов қайси хислати билан намуна бўлади? Зўравонлиги, болаларни, ҳатто ўқитувчиларниям менсимаслиги биланми? Шундай болага беш қўйсак бўладими? Виждонингиз қабул қиладими?

«Бу боланинг ичи гапга тўлиб кетган экан-ку», деган маънода Зафарга термилиб ўтирган директор гўё мұҳим бир гап айтаётгандай салмоқлаб сўзлади:

— Азларов шунчалик бўлиб кетган бўлса, бунинг учун ким айбдор? Албатта, бизу сиз! Тарбиялашимиз керак. Тушунарлимиз? Тарбия-ла-ши-миз ке-рак!

— Турсун Гиёсович,— чуқур уҳ тортди Зафар,— тарбиялаш, бу арзиса-арзимаса беш қўйиб беравериш деган гапмас-ку ахир! Ундаи бўлса Макаренкони, Суҳомлинскийни, уларнинг методини ўрганиб нима қила-миз?

Эшик аввал астагина тақиллади, кейин очилиб, илмий бўлим мудири Анвар Обидов кирди.

— Мумкинми? Кечирасизлар, сухбатларингни бўлмадимми? Мен бир минутга, Турсун Гиёсович.

Директор унинг гапини бўлди:

— Йўқ-йўқ, сираям. Келинг, Анвар Обидович, ўзи ҳозир сизни чақиришмоқчи бўлиб турувдим.

— Тинчликми?

— Ҳалиги Азларов масаласини гапирияпман.

Мудир Зафарга қаради.

— Ҳакимов нима дейди?

Директор очиқдан-очиқ киноя қилди:

— Бу киши беш қўймасмешлар. Арзимасмиш. Жасоратни қаранг!

Чўкаётган одам ҳасга ҳам оснлади деганлариdek, Зафар умид билан Обидовга термилди.

— Бунақа соҳтагарчлиникнинг нима кераги бор ахир, Анвар ака? Кимга фойдаси тегади буни? Хўп, бугун беш қўяйлик. Келаси йили ҳам. Борингки, ҳамма синфи ни аъло баҳо билан битириб, олтин медаль ҳам олсин. Хўш, кейин нима бўлади? Олтин медалини кўтариб бирон институтга борса-ю, ҳеч балони билмаса — яхши бўладими шу? Бундан кимга наф, ким обрў топади? Мактабимиз шаънига ҳам яхшимас-ку бу! Буни қайси

чаласавод ўқитгану қайси «доно» олтин медаль берган демайдими?

— Унинг институтга кириши тўғрисида сиз ташвиш чекиб ўтирманг,— деди директор энсаси қотиб.— Керак бўлса имтиҳонсиз ҳам кириб кетаверади.

— Ундай бўлса аъло баҳолару олтин медалнинг нима кераги бор унга?

Илмий мудир гапга аралаши:

— Чинданам шунчалик имконияти зўр бўлса, биз нимага бош қотириб ўтирибмиз?

— Тушунсангиз-чи, Анвар Обидович, у Усмон Қодировичнинг ўғиллари. Қолаверса, мактабимиз обрўси.

— Мактабимиз обрўсини ўйласак, бошқа болалар ҳам бор,— чўрт кесди Зафар.

— Ҳе, ука, ким арзиш-арзимаслигини мактаб раҳбарлари яхши билишади. Сиз бу ишларга аралашмасдан, айтган ишни қилаверсангиз-чи.

— Турсун Фиёсович, бундай қилиш яхши эмас. Ахир предмет ўқитувчиси рози бўлиши керак.

Директор қўли билан ҳавони кесиб гапирди:

— Предмет ўқитувчининг хоҳишига қараб ўтирамизми!

— Ундай бўлса шунча вақтдан бери асаббузарлик қилиб ўтиришимизнинг нима кераги бор эди? Мендан сўрамасдан қўйиб юборавермайсизми?!

— Қарашга мажбурмиз. Ҳакимов предмет ўқитувчи-си сифатидаям, комсорг сифатидаям рози бўлиши керак.

Директор ўз фикрини тушунтиrolмаётганидан хубоб бўлди.

— Менга қаранг, Анвар Обидович, сиз ҳам ёш болага ўхшайсиз-а, борингки, ўша Азларов бешга ҳозир арзимасин ҳам, дейлик. Лекин унга бу йил ёки келаси йил бермаймиз-ку олтин медални. Мен демоқчиманки, ҳозирдан аъло баҳо қўйиб, кўнглини кўтариб борсак, унинг талантини тарбиялаган бўламиз.

— Унда талант нима қиласди? — деди Зафар.

— Сиз кўпам катта кетаверманг. Талант дегани пинҳоний бўлади, билсангиз.

— Шошманглар, ўртоқлар,— вазмин гапирди Обидов.— Мен бир нарсага тушунолмаялман. Қосимжоннинг баҳоларини беш қилиб беринглар, деб дадаси илтимос қиласми?

— Қизиқсиз-а, Анвар Обидович, Усмон Қодирович катта одам бўлсалар, биздан шу арзимаган нарсани илтимос қиласдиларми?

Зафар луқма ташлади:

— Балки Усмон Қодировичнинг ўзи бу гапларга қаршиидir.

Зафарнинг бу гапи директорнинг иззат-нафсиға тегди. Аммо ўзига сув юқтирумай, билмаганга олди.

— Ҳамма сизга ўхшаган ботир бўлгандами...

— Шу масала бўйича мен Усмон Қодировичнинг ўзи билан бир гаплашиб кўраман,— деди Зафар.

Оғир жиноят қилиб қўлга тушган одамдай директорнинг қўллари титраб, ранги оқариб кетди. Шахт ўридан туриб, оғзидан тупук сачратиб Зафарга бақирди:

— Эсингиз жойидами ўзи? Нималар деётганингизни биласизми? — Обидовга термилди.— Қанақа бола ўзи бу? Шу гапларни Усмон Қодировичга айтиб бўладими? Нақ эртагаёқ ҳаммамизнинг изимизни қуритадилар-а!

— Унчаликка бормас. Усмон Қодирович тушунадиган одам, сиз ўйлаганчалик эмас ҳар ҳолда,— деди Анвар Обидов.

Зафар шахдам қадамлар билан чиқиб кетди.

XII

Ноила ёлғиз. Ўғли боғчада. У Зафар келиши олдиндан столга турли ноз-неъматлар қўя бошлади. Уннинг

қраги ҳаприқар, қандайдир қувончлими, қайғулими нарса бўлишини кутаётгандек ҳаяжонланар эди.

Столни чиройли қилиб безатди, ҳамма нарса тахт. «Зафар ҳозир келиб қолар,— ўйларди Ноила.— Тезроқ келсайди». У дeraзадан ташқарига қаради. Қор ёғмоқда. Ноила деразанинг дарчасини очиб юборди. Муздай тоза ҳаво кирди. У тўйиб-тўйиб нафас олди. Ноила бинолар пештоқига, дараҳтларга худди капалакдек секин қўнаётган қорга тикилиб, қишининг жамолига маҳлиё бўлиб қолди.

Эшик қўнғироғи жиринглади. Ноила «ҳозир» дедиую югуриб келиб эшикни очди. Зафар.

— Вой, келдингизми,— деди Ноила севиниб.

— Қелдим,— деб Зафар майин жилмайди.— Кимлар бор?

— Гапингиз қизиқ-а, Зафар, ким бўларди, боя нима девдим сизга.

Зафар қўлидаги қоғозга ўралган нарсани Ноилага узатди.

— Овора бўлиб, нималар кўтариб юрибсиз?

— Овиласи бораками.. Орзу-ниятларингиз, ишларингиз вақти-соатида бўлсин, деб соаг олиб келдим.

— Раҳмат!— деди Ноила.— Мен ҳозир...— У ошхонага кириб кетди.

Зафар Ноиланинг орқасидан бир қараб қўйди. Унинг битта қилиб ўрилган билакдай йўғон сочи орқасига ташланган, устида ҳаворанг гулдор халат. Унинг қадиқомати, тип-тиниқ юзи Зафарга жуда чиройли кўриниб кетди.

Зафар Ноиланинг уйига биринчи марта келиши. У уйнинг безакларини, мебелларини бир-бир кўздан кечирди.

Чой кўтариб Ноила кирди-ю, унинг диққати бўлинди.

— Зерикиб қолмадингизми? Олиб ўтиринг. Аслида

эртага келганингизда меҳмонлар билан гаплашиб ўти-
рардингиз.

— Зарари йўқ. Эртага келиш қандайдир ноқулай.

Ноила чой қўйди.

— Қани, марҳамат, дастурхонга қаранг. Мановилар-
ни очинг.

Зафар фужерларга шампан қўйди.

— Ўзингизга конъякдан.

— Нега ўзимга, аввал мана буни ичайлик, кейин
бир гап бўлар... Қани олинг-чи, туғилган кунингизда
менинг истагим шуки, ҳамма ниятларингиз рӯёбга чиқ-
син, юзингиздан қувноқлик, лабингиздан табассум ари-
масин! Сизга ўшаган покдомон одамларнинг кўпайиши,
чинакам севгининг барқарор бўлиши учун ичайлик!

— Раҳмат...

Ичишди.

— Ҳалиги гап нима бўлди, Зафар?

— Қайси гап?

— Директор билан борди-келдиларинг-чи.

— Ким билади дейсиз,— деб кулди Зафар.— Зўр
бўлса РайОНОга бориб айтар ёки мени ишдан бўшатиб
юборар... Мен қилаётган ишим тўғри, деб ўйлайман.

— Албатта-да. Ахир мактабда тўгарак очилса, нима-
си ёмон-а?

— Тўгаракни гапирасиз. Ҳали буниси ҳолва. Бошиқа
машмаша чиқиб турипти.

— Яна қанақа ғалваси боракан?

— Азларовнинг чораклик баҳосини беш қилишим
керак экан.

— Азларови ким?

— Саккизинчи «Б»даги олифта, маҳмадона бола
бор-ку.

— Ҳа. Анаву олифтами? Беш қилишга нима зарурат
туғилипти? Директорга алоқаси борми?

— Йўқ. Олтин медаль олиши керакмиш. Усмон Қо-
дировичнинг ўғли-да.

— Ҳм-м. Гап бу ёқда денг. У саккизинчида ўқиса, олтин медалга...

— Олтин медаль берилаётганда саккизинчи синф баҳосига ҳам қаралади-ку. Ҳозирдан замин тайёрлаб бормоқчи-да.— Зафар чўнтағидан сигарет чиқарди.— Майлими чексам?

— Бемалол, ёш бола йўқ-ку. Нима қилмоқчисиз?

Зафар сигарет тутунини босиб-босиб тортди.

— Иложи йўқ. Қўёлмайман беш... Тавба, билмадим бундай қилишнинг нима қизиги бор экан. Ахир ўша боланинг ўзигаям зарар-ку...

— Энг ёмони— болани бузади, талабчанликни йўқотади. Яхши билмасам олтин медаль берармиди, деб ўзига ортиқча бино қўйиб юборади... Хуллас, директор билан муносабатларинг яна ҳам кескинлашар экан-да.

— Нима бўлса бўлар. Мен фикримдан қайтмайман.— Зафар сигарет қолдигини кулдонга босиб эзғилаб ў chirди-да, яна шампан қўйди.— Келинг, шунга ҳам бош қотириб ўтирамизми, туғилган кунингизни ҳам педсоветга айлантириб юбормайлик. Олинг. Ишларимиз доимо ўнгидан келсин!— Шартта ичиб юборди.

Зафар Ноиланинг тимқора кўзларига термилди. Термилиб жим тураверди.

— Зафар,— деди Ноила орада юз бераётган қандайдир ўзгаришни ҳис этиб,— менга бундай қараманг. Кўнглингиз ҳар ёққа кетмасин. Сизни ўзимга яқин олишимнинг сабаби фикрларимизпинг бир жойдан чиққанлиги...

Ноиланинг сўзларини тинглар экан, Зафарнинг хаёлидан турли фикр кечарди. «Ахир мен уни севаман-ку! У-чи? Севмайдими?»

— Ноила,— Зафарнинг овози титраб чиқди.— Мен сизни...

— Бўлди, Зафар, унақа деманг. Ҳаммасини биламан. Лекин сиз ўйлагандек бўлмайди. Эримнинг руҳига хиёнат қилмайман. У ким, қандай одам бўлмасин барим

бир ўғлимнинг отаси эди-ку. Бундай ишларга менинг виждоним йўл қўймайди.

— Нега хиёнат бўлар экан?— деди Зафар ялинган оҳангда.— Ахир эри вафот этган ёки турмуши бузилган аёллар камми? Дунёнинг иши шундай бўлса сизу бизнинг қўлимииздан нима келади?! Бир умр дунёдан тоқ ўтиш керакми?

— Агар янги турмуш қурса, бу хиёнат эмас.

— Шундай экан, нега энди сиз...

Ноила уининг гапини бўлди:

— Мен сизга турмушга чиққаним йўқ-ку! Бу ҳақда гап ҳам очилган эмас-ку?! Бунақа гапни мен хаёлимга ҳам келтирганим йўқ.

Зафар оғир сукутга чўмди. Энди Ноиланинг юзига қарай олмасди. Ноила ҳам жим бўлди. Хона узра залварли жимлик қанот ёйди.

Ноиланинг пўлат иродали эканини Зафар билар эди. Аммо ҳозир, шу ҳолатда ўзини бу қадар вазмин тута олганн уни ҳайратга солди. У аёлларнинг иродасига, сабрига, мулоҳазалилигига тан берди.

Ноила бир пиёла иссиқ чой қуиб Зафарга узатди, ўзига ҳам қуиди.

— Мен сизга анчадан бери бир нарсани айтмоқчи бўлиб юардим. Бугун мавриди келди, айтсам майлими?

Зафар пиёлани столга қўяркан, «майли» дегандек Ноилага қаради.

— Сиз мени севасизми?

Ноиланинг бу саволидан Зафар гангигб қолди. Юзи қизариб кетди. Юраги гуп-гуп ура бошлади. Аммо тили калимага келмади.

— Сизни эса бошқа бирор севади. Қимлигини била-сиз-а?

Ноила Санамни назарда тутаётганлигини Зафар билса ҳам, ўзини билмаганга олди.

— Йўқ! Ким экан?

— Ўзингизни гўлликка солманг, биласиз. Санам! Мактабимизнинг кутубхонасида ишлайди-ку.— Ноила-нинг авзойи бир хил бўлиб кетди. У бу ҳолни Зафарга билдирамаслик учун чой ҳўплади.

— Ахир мен уни севмайман-ку!

— Дунёнинг иши шунаقا-да,— деди Ноила зўрмазўраки жилмайиб.

— Сиз буни қаёқдан биласиз?

— Биламан. Ўзим сезиб юрардим. Унинг устига бир куни ўзи келди менинг олдимга.

Бу гапдан Зафар ҳайратга тушди.

— Ўзи келди? Нима деди?

* * *

Кечқурун Ноила телевизор кўриб ўтирганди, эшик қўнғироғи жиринглади. «Ким бўлди экан?» Эшикка яқинлашаркан, овоз берди: «Ким?» Жимжит. Ҳайрон бўлди. Болалар қўнғироқни босиб қочишдимикан? Яна сўради: «Ким?» Эшик орқасидан қиз боланинг «Мен» деган товуши келди. Ноила овоз эгасини танимади, эшикни очди.

— Санам...

— Кутмаганимдингиз?— қизаринқиради Санам.

Чиндан ҳам Санамни кутмаган эди. Нега келди экан?

— Нимага қараб турибсиз? Ичкарига киринг.

— Раҳмат.

Ноила телевизор овозини пасайтириб қўйди. Ҳолаҳвол сўрашдилар.

— Кутимаган меҳмон нега келди, деб ҳайрон бўлаётгандирсиз-а, Ноила опа?

Мезбон сир бой бермади.

— Йўқ, нега ундай дейсиз. Ахир бир мактабда ишласак... Бир-биримизникига йўқлаб борсак ёмонми?

Мен ҳозир,— Ноила чой қўймоқчи бўлиб ўрнидан қўзғалди.

— Овора бўлманг, Ноила опа. Ҳеч нарсанинг кераги йўқ. Мен ҳозир кетаман.

— Овораси борми? Бир пиёладан чой ичайлик.— Ноила чойнакни олиб ошхонага чиқиб кетди. Санам ўйланиб қолди: «Сўрасаммикан? Нима деб ўйлайди? Бордию ростанам яхши кўрса-чи? Олдига солиб қувласа-я. Ё кўнглига оғир олармикан? Ётиғи билан сўрайман...»

Мезбон чой дамлаб кирди.

— Бекор овора бўлдингиз-да, Ноила опа.— Ноила узатган чойни олди.— Раҳмат... Ноила опа,— у тутилиб-тутилиб гап бошлади,— сиздан бир нарсани сўрагани келувдим.

— Марҳамат,— деди унга диққат билан тикилиб ўтирган Ноила.

— Фақат мени тўғри тушунинг, илтимос. Сизни жудаям ҳурмат қиласман. Шунинг учун ҳаддим сиғиб олдингизга келдим.

Ноила кулди.

— Марҳамат, Санамхон. Тортинмай сўрайверинг.

— Сиз Зафар акани биласиз, а?

Зафарнинг номини эшишиб Ноиланинг юраги шигиллаб кетди. Санам нима мақсадда келганини бир оз англағандай бўлди.

— Ҳа, биламан.

— Янгишмасам, анча яқинсизлар, эҳтимол сизга дилидаги гапларини ҳам айтар.

— Хўш, нимайди?

— Сиздан илтимос, мени тўғри тушунинг, қанақа енгилтак қиз экан, деб ўйламанг, Ноила опа.— Унинг лаблари пирпирав, икки юзи қип-қизариб кетган, Ноиланинг кўзига қараёлмасди.— Мабодо сиз билмайсизми, Зафар аканинг юрадиган қизи борми?

Ноиланинг юраги шувиллаб кетди, ичидан бир нарса

узилгандай бўлди. «Нималар деяпти бу қиз ўзи? Мени масхара қилмоқчими? Ёки синааб кўрмоқчими? Ким ўргатди бундай қилишни? Ҳар қалай бу фикр унинг ўзидан чиқмаган?» У ўзини тутишга, сир бой бермасликка ҳаракат қилди.

— Билмадим, Санамхон, билмадим... Биз бу тўғрида у билан ҳеч гаплашмаганмиз. Менга ҳеч нарса дегани йўқ. Билмадим, билмадим, билмадим.— Ноила ўзини босишга қанча уринмасин иложини қилолмади. Икки тирсагини столга қўйиб, бошини кафтлари орасига олганча калласини силкитарди. Унинг бутун гавдаси силкинарди.

— Мени кечиринг, Ноила опа, кечиринг... Демак, демак... эшигнларим рост экан.— Санам йиғлаб юборди.

— Бас қилинг!— Ноила ўрнидан сакраб турди. Телбалардек гандираклаб дераза томонга юрди. Деворга суюнганча ташқарига маъносиз термилди. Унинг киприклари нам эди.

— Илтимос сиздан, Санам, мени холи қолдиринг. Гапларимга хафа бўлманг, бу тўғрида кейин гаплашамиз. Лекин ҳозир мени ёлғиз қўйинг.— Ноила ҳамон ташқаридан кўз узмас, Санамга қарагиси келмасди.

Санам совқотган одамдай дағ-дағ титрар, кўз ёшларини тиёлмасди. Нам бўлиб кетган оппоқ рўмолчаси билан юз-кўзларини артарди. «Нима қилиб қўйдим? Мен аҳмоқ нимага келдим ўзи? Бу қандай бемаънилик? Энди унинг юзига қандай қарайман? Зафар акага-чи?»

Санам ана шу хаёллар оғушида бир-бир босиб уйдан чиқиб кетди.

* * *

Ноила Зафарга бу гапларнинг ҳаммасини айтмади. Айтгиси келмади. Қисқа қилиб қўя қолди.

— Қизиқ-ку,— деди Зафар ўйчан.

— Бир ажойиб қиз сизни яхши кўрса, бунинг нима-

си «қизиқ?..» Мен сизни ҳам, уни ҳам тушунаман. Шунинг учун, очигини айтсам, икковингизга ҳам ачинаман, ёрдам бергим келади. Лекин начора, иложим йўқ. Қўлимдан келадигани — маслаҳат бериш холос.

Оғир ўйга толиб сигарет тутатиб ўтирган Зафар Ноилага жавдираб термилди.

— Мен-чи? Мен нима қилай? Қўлимдан нима келади?..

— Йўқ, Зафар, сиз унақа деб ўйламанг. Санам яхши қиз. Унинг севгисига ишонса бўлади. У менга ёқади. Лекин у мени қандай тушунади, бунисини билмайман. Мен эса сизни фақат ҳурмат қиласман.—«Севмайман», дея олмади Ноила.

Кечга томон Зафар кетди. Ноила уни кузатиб қайтгач, диванга ўтириб ўйга толди. У Зафарга айтган гапларидан гоҳ қувонар, гоҳ юрагининг аллақаери зириллаб кетарди. «Ростданам уни севмайманми? — ўйларди у — Нега бўлмаса ҳар кўрганимда кўнглим ғалати бўлиб кетади. Балки муҳаббат деганлари шудир?»

Шуларни ўйлаган сари унинг кўз ўнгига марҳум эри, жажжи ўғли келаверади. «Йўқ! Уни севмайман! Мен ҳеч кимни севмайман! Севолмайман!» У бу сўзларни баланд овозда айтди, айтдию ҳўнграб йиғлаб юборди. Унинг кўз ёшлари фоят аччиқ, аламли эди.

XIII

Ҳилола Санамнинг аҳволини кўриб қўрқиб кетди. Унинг ранги бўздай оқарган, соchlари рўмоли остидан тўзғиб чиқиб туради. У бўри чангалидан қутулган қўзичноқдек титради.

— Нима бўлди сизга, Санам? — деди Ҳилола ташвиш билан. — Бемаҳалда қаерларда юрибсиз?

— Ҳеч нарса, ҳеч нарса бўлгани йўқ, Ҳилола,— Санам ўзини босиб олишга уринар, аммо эплолмасди.— Кинога борувдим, кечроқ қолдим.

Унинг гаплари ёлғонлигини Ҳилола сезиб турар эди.
«Бордию шу гапи рост бўлса ҳам нега уйига бормаган?»
Ҳилола бу фикрни ўзича ўйлади-ю, аммо Санамга айтмади.

— Майли, зарари йўқ. Утинг, ўтиринг. Мен битта чой дамлаб келай.

— Йўқ, овора бўлманг, Ҳилола.— Санам ҳозир тезроқ ухлашни, бўлиб ўтган воқеалардан бир оз бўлса да, холи бўлишни истарди. Ҳилола унинг гапига қулоқ солмади. Санам ўйланиб қолди. «Нима дейман? Қандай айтаман?.. Айтмасам ҳам бўлмайди, бари бир бир кунмас-бир кун эшигади. Кейин хафа бўлиши мумкин. Ундан кейин Ҳилолага айтмасам, бошқа кимга ҳам айтаман дардимни?»

— Ҳа, Санам, хаёл суриб қолибсиз?— деди чой дамлаб кирган Ҳилола.— Тинчликми ўзи? Мендан яширадиган сирингиз борми?

— Йўқ, Ҳилола, сиздан сир тутадиган гапим йўқ. Фақат кеч бўлганда сизни ҳам безовта қилмай девдим.

Ҳилолага бўлиб ўтган воқеани гапириб берди. Иккаласи ҳам жим қолди.

— Шунаقا, Ҳилола, энди уч-тўрт кун уйга бормасаммикан, дейман.

— Агар менинг гапимга кўйсангиз,— деди Ҳилола бир оз ўйлаб тургач,— эртага албатта уйга боринг. Минг қилса ҳам она-да. Онангиз сизни ёмон бўлсин, демайди. Сиздан хавотир олади. Ёлғиз қизи бўлсангиз, сизга суюнади-да! Дарду ҳасратиниям, қувончиниям сизга айтмай кимга айтсин? Унинг ҳам аҳволига қарааш керак, баъзан ишхонасиданми, кўча-кўйданми кайфияти бузилиб келиши мумкин.

— Сиз шундай дейсиз-да. Хоҳ эрта борай, хоҳ кеч борай — бари бир эшикдан киришим билан «Мунча кеч», дейдилар. Ахир мен ёмон йўлга юрмасам, бетгачопарлик қилмасам...

— Гапингиз тўғри, Санам! Аммо Қарима холам

сизнинг ҳам отангиз, ҳам онангиз. Эрта-индин ўзимиз ҳам она бўлсак, болаларимизга балки шундай муюмала қиласмиш,— деди Ҳилола кулимсираб.

— Ҳеч-да... Ҳеч шунақа қилмаймиз. Ҳамма оналар ҳам шунақа эмас, фақат менинг ойим шунақа қиладилар.

— Ҳай-ҳай, Санам... Онангиз-ку ахир, нима бўлса ҳам боринг уйга. Ўзи ҳам сизни киритмаганига минг пушаймон қилиб ўтиргандир шўрлик онангиз.

Ҳилола мулоҳазали қиз. Санам у билан биринчи курсда танишган эди. Санам ҳам кундузги бўлимда ўқир эди. Иккинчи курсдан кечкига ўтказиб, кундузи боғчада ишлай бошлади. Улар яқин бўлиб қолишганди. Санам унинг ётоқхонасига, Ҳилола Санамларникига тез-тез келиб туар эди. Санам Ҳилолани ҳурмат қиласар, нима дарди ҳасрати бўлса унга айтар, у билан масла-ҳатлашар эди.

— Шунақа қилинг, Санам,— деди Ҳилола чойдан ҳўплаб,— ота-онанинг қадрига етиш керак...

Санам Ҳилоланинг сўзини камдан-кам қайтаради. Ҳозир ҳам унга қарши «йўқ», дея олмади. Чой ичib бўлишгач, ўринларига кириб ётишди. Санам анчагача ухлаёлмади. Хаёли уни ҳар томонга бошлади. Зафар билан суҳбатлар, онасининг қилиғи кўз ўнгидан бирмабир ўтаверди...

Улар институтнинг кечки бўлимида ўқишарди. Санам иккинчи, Зафар эса тўртинчи курсда эди. Санам Зафарни олдин ҳам бир неча марта кўрган эди. Бир куни нима ҳам бўлиб, иккала курсга биргаликда дарс ўтиладиган бўлиб қолди. Шунда тасодифан Зафар билан Санам ёнма-ён ўтиришди. Зафар ўқитувчининг лекциясига қулоқ солмай нималарнидир ўқир эди. Санам унга бир-икки қараб қўйди, аммо Зафар эътибор бермади. Охири Санам унинг дафтарига нима ёзганини ўқий бошлади. У шеър эди.

«Нима бало, шонрми бу?.. Бир сўраб кўрай-чи», де-

ган хаёл билан шапалоқдай қофозга: «Сиз шоирмисиз?» деб ёэди-да, Зафарнинг олдига суреб қўйди. Зафар қофозни ўқидиу ҳайрон бўлиб Санамга қаради, кейин «Йўқ» деган маъниода бошини қимирлатди. Санам қофозга яна алланималар ёзиб унга узатди. Зафар кўз юргутирди: «Бўлмаса, дафтариңгизда ёзилган шеър кимники?» Зафар бир кулиб қўйди-ю, индамади. Санам савол назари билан қараб турар эди. Қўнғироқ чалиниб қолди. Ҳамма ўзини эшикка урди. Санам билан Зафар ҳамон гаплашиб ўтираси эди.

— Ўзимники,— деди Зафар.

— Бўлмаса нега шоир эмасман дейсиз?

— Шеър ёзган одамнинг ҳаммаси шоир бўлаверадими?

— Бўлмасам-чи!?

Зафар жилмайиб қўйди. Унинг узун-узун киприклири, маънодор кўзлари кулса, яна ҳам чиройли бўлиб кетарди. Буни Санам ҳам сезди.

— Биласизми,— деди Зафар,— фақат шунчаки шеър ёзиб юрганларни эмас, шеърлари газета-журналларда босилиб турадиган қаламкашларнинг ҳам ҳаммасини чинакам шоир дейиш қийин.

— Нега энди?— ҳайрон бўлди Санам.

— Нега бўларди, ҳаммага маълум гапларни вазнга тушириб, қофиялаш билан шеър бўлавермайди-ку! Шеърда янги фикр айтилиши лозим.

— Сиз жуда ҳам қаттиққўл экансиз-ку,— деди Санам кулиб.

Зафар ҳам кулиб юборди.

Улар гап билан бўлиб танаффус тугаганини ҳам билмай қолдилар.

Шундан кейин улар тез-тез суҳбатлашиб турадиган бўлишди. Зафар китоблардан, спектакль ва кинофильмлардан олган таассуротларини Санамга гапириб берарди. Бора-бора Санам унинг суҳбатларини қўмсайдиган бўлиб қолди. У Зафар ишлайдиган мактабга кутубхона-

чи бўлиб ишга келдию уларнинг дўстлиги тағин ҳам мустаҳкамланди. Санам Зафарни кўргиси келар, у билан гаплашиши ёқтиарди...

Санам кўзини очса тонг ёришиб қопти. Ҳилола йўқ. У ўрнидан туриб сочини тузатаётган эди, стол устидаги қофозга кўзи тушди. Ўқиди: «Санам! Сизни безовта қилгим келмади. Ўйғонганингиздан сўнг чой дамлаб ичинг, тумбочкада ҳамма нарса бор. Сизни кутмай кетиб қолганим учун узр. Калитни вахтёрга бериб кетарсиз. Кечаги гапларимни эсингиздан чиқарманг. Акс ҳолда сиздан қаттиқ хафа бўламан. Ҳозирча хайр, Ҳилола».

XIV

Карима опа ишдан келса, стол устида бир парча қоғоз ётибди. «Ойи, мен ўқишига кетдим. Дарсдан чиқиб келарман. Санам».

Карима опа креслога ўтириб ўйланиб қолди: «Нега энди «келарман» дейди, «келаман» эмас? Ёки келмайман деб ўйлаган эканми? Бечора қизим, кеча тоза хафа бўлган кўринади.— Унинг хаёли чалғиб кетди.— Хафа бўлса нима қилай. Мен уни ёмон бўлсин, дейманми?» «Келарман» эмиш! Келмасанг келмай қўя қол!»

Бир оз ўтириди-да, овқат қилиш учун ошхонага кирди. Қозоннинг қопқофини кўтарса, ичидаги овқат бор экан. Ҳали иссиққина. Санам ишдан келиб, қозонга шўрва солиб кетган эди. «Шўрлик қизим,— ўйлади Карима опа,— овқат ҳам қипти-я. Қизига раҳми келиб кетди. У ўзига-ўзи шивирлади: «Ке қўй, ҳали келса у-бу, деб яна таъбини хира қилмай. Бечора шундаям ўзи сиқилиб кетгандир».

Карима опа овқатдан сўнг бирров гаплашиб келай, деб қўшниникига чиқиб кетди...

Санам йўлда келаркан, ўйларди: «Ойим яна минғир-минғир қиласа-я. Майли, нима деса ҳам индамайман, ўзиғапириб-гапириб тинчиб қолар». У эшикнинг тугмачаси-

ни босди. Ҳеч ким жавоб бермади. Яна босди, яна жимжит. Ойиси йўқлигига қаноат ҳосил қилгач, ёнидаги калит билан эшикни очди. Ичкарига кирса, чироқ ёниқ. «Ухлаб қолган бўлсалар керак», деб ўйлади. Онасининг хонаси очиқ экан, у секин мўралади. Кўринмади. Мехмонхонани, ошхонани қаради. Йўқ. «Демак, қўшниникига чиққан».

Санам ювениб бўлиб, энди овқат сузаётганда ойиси кириб келди.

— Ҳа, келдингми?— деди Карима опа.

Санам секингина «ҳм» деб қўя қолди. У овқат еб бўлгунча Карима опа газеталарни варақлаб ўтириди.

Орадан ярим соатлар ўтгач, Карима опа уни чақириди. Санам миқ этмай чиқиб келди.

— Кечакимни кимни кириб бердим?— деб сўради Карима опа.

«Бошланди сўроқ». Санам индамади. Онаси унига қараб турди-турди-да, жавоб беравермагач, яна сўради:

— Гапир, кимни кириб бердим?

— Ҳилоланинг олдида эдим,— деб пичирлади Санам.

— Шу бўронда-я?

— Шу бўронда кўчада ётайми бўлмаса,— деди Санам онасига қараб.

— Кетиб қолмасанг, уйга киргизмасмидим?

— ...

Карима опа жим бўлиб қолди. Бир дамдан кейин:

— Ахир одатимни биласан-ку! Мени энди кўряпсанми?! Ишдан кайфиятим бузилиб келгандир балки...

— Аламини мендан оласизми? Қеч қолган бўлсан, дарсда эдим... Ҳаво бунаقا бўлса... ҳадеганда автобус келавермади...

— Дарсда?— деди Карима опа салмоклаб. Унинг бу

гапида бошқа маъно борлигини Санам ҳис қилди. Ялт этиб онасига қаради.

— Бўлмаса қаерда эдим?

— Ким у йигит?

Санамнинг юраги шифиллаб кетди. Ранги оқардими, қизардими — билолмайди, аммо юзлари қизишганини ҳис қилди.

— Қайси йигит? — деди ўзини билмаганга олиб.

— Мени алдайман деб ўйлама, ҳаммасини била-ман.

Карима опа жуда сезгир, ер тагида илон қимирласа биладиганлардан эди. Санамнинг ҳозирги ҳолатидан, довдираб қолишидан қўшниси Ҳожарнинг кечаги гапла-ри тўғрилигига ишонч ҳосил қилди.

— Сизга етказган одам унинг кимлигини ҳам айт-мадими? — деди Санам ёлғон гапириб эплолмаслигига кўзи етга.

— Қўни-қўшнидан шунаقا гапларни эшитишим қо-лувдими энди?! Яна кимдан — Ҳожардан. Сал-пал би-рон нимани ўйлайсанми ўзи? Тузук-тузук жойлардан одам келди, йўқ дединг. Бунаقا гапларни эшитиб юриш яхшими? Менинг аҳволимни ҳам тушунгинг-да.

Санам нигоҳини бир нуқтага қадаб сукут сақлади. «Демак, кеча шунинг учун шунаقا қилган экан-да. Ай-ниқса, Ҳожар опадан эшитгани ёмон бўпти-да... У қаерда кўрган экан-а. Тавба. Одамларга ҳам тушуммайсан. Ўз ҳоликга қўймайди. Гап кавлаштириб, гиди-биди қилиб юришдан бошқа иши йўқми, нима бало».

— Ким эди? — деб яна сўради Карима опа.

Санам бошини кўтармай оҳиста жавоб берди:

— Бир мактабда ишлаймиз... Шу томонда турадиган ўртоғиникига келаётган экан.

Карима опа чуқур уҳ тортди.

— Одамларни билмайсан, оғзи билан юради. Балки сен тўғриликча бирга келгандирсан, лекин бу гапга ким ишонади?

— Бироннинг ишониши шартми? Сиз тушунсангиз бўлди-да.

— Бўлди!— Қарима опа қизиши.— Гапни чўзма! Одамлар билан ҳисоблашмай иложинг борми? Гапира-верасан-да сен... Ўзингга эҳтиёт бўл, қўшнингни ўтри тутма. Шунинг учун аввало ҳар гал гап-сўзлар чиқишига йўл қўймаслик керак. Эл оғзиға элак тутиб бўлмайди.

Санам ҳам, онаси ҳам бошқа гапирмади. Қарима опа пиёладаги чойни охиригача ичди-да, индамай кириб ётди.

«Тавба,— ўйларди Қарима опа,— қилғиликни қилиб қўйиб, яна гап қайтаради-я. Аслида айб ўзимда. Эрка қилдим, нима деса йўқ демадим, отасизликни сезмасин, деб раъйини қайтармадим... Ишқилиб ўзига инсоф бер-син-да».

«Ойимнинг шу одати қолмади-қолмади-да,— деб ўйларди Санам.— Ишхонасидан жаҳли чиқиб келса, ала-мини мендан олади. Гуноҳим нима? Гуноҳим — айтган ишини вақтида бажарганим, нима деса сизники маъқул деганимми! Қайсаарлик қилсам, бетгачопар бўлсам, яхши кўринармидим?» Санам бу ёнига ағдарилиб, яна хаёл суриб кетди: «Ойимга ҳам қийин. Мени деб ёш умрини ҳазон қилган, қайта турмушга чиқмаган. Майли, нима бўлсаям хафа қилмайин».

XV

Янги йилни Санам уйда кутди. Қарима опа уни байрамларда, айниқса Янги йил байрамида ҳеч қаёқقا юбормайди. «Ўртоқларингни уйга таклиф қил, шу ерда кутинглар Янги йилни», дейди.

Бу йил ҳам шундай бўлди. Ҳилола келди, бир-иккита қўшнилар чиқишиди.

«Зафар ака ҳозир қаерда экан? Балки Ноила опа билан утиргандир! Ҳаёлига иш фикр келиши билан Санамнинг кўнгли ғалати бўлиб кетди, юрак уришп тезлашгандай бўлди. У индамай ўрнидан турдию ўзининг хонасига кириб кетди. Кўз ўнгидаги ҳамон Зафар унинг ёнидаги Ноила. Ноиланинг ўтирганда ерга тўшалиб турадиган қалин, қоп-қора сочларини Зафар меҳри төвланиб силайди, кўзларига термилиб эркалайди.

Санам буларни ўйлаган сари асаби таранглашарди. Илгарилари кўпинча Ноилага унинг ҳаваси келарди, Зафардай йигитнинг муҳаббатига сазовор бўлгани учун унга ҳаваси келарди. «Ноила опанинг ўзиям чиройлида! Оҳунникидек тиниқ, катта-катта кўзлари ҳар қандай йигитни ҳам мафтун қиласди. Ҳечам болалик жувонга ўхшамайди-я. Унинг устига ақли, одоби ҳам ҳавас қиласа арзигулик», деб ўйларди Санам. Ҳозир қалбida Ноила-га нисбатан ғазаб уйғонди.

Санамнинг кўзлари филт ёшга тўлди.

Шу пайт телевизордан Тошкент курантининг жарангиги эшитилди.

— Санам! — деди Карима опа. — Каердасан, бу ёққа келсанг-чи! Тезроқ...

Санам кўз ёшларини артдию хонага сал илжайиб кирди. Ҳилола унга бир фужер шампан узатди.

— Нима қилиб юрибсиз шу пайтда, Санам? Мана буни олинг.

Санам онасининг олдида мутлақо ичмаган, тўйларда, кечаларда ўртоқлари қисташса оз-озгина шампан ичарди...

...Утириш унча чўзилмади. Қўшнилар уй-уйларига чиқиб кетишиди. Стол устидаги нарсаларни йингишириб олгач, Карима эла ўз хонасига, икки дугона эса Санамнинг хонасига кириб ётишиди.

Ҳадеганда Санамнинг уйқуси келавермади. Дам у ёққа, дам бу ёққа ағдарилар, «үф-үф», деб хўрсинарди. Ҳилола анчагача унга ҳеч нарса демай ётди. Охири чидай олмади.

— Санам,— деди секин.

— Ҳа?—«Ҳали уйғоқ экан-да», ўйлади Санам.

— Нима бўлди, бирор жойингиз оғрияптими?

— Йўқ.

— Нега бўлмаса унақа қиляпсиз?

Санам индамади. Ҳилола гапини давом эттириди:

— Ҳилола,— деди у бир оздан кейин,— бордию сиз биронни яхши кўриб қолсангиз, лекин у бошқани севса нима қиласдингиз?

— Билмадим... Нима эди, кимни яхши кўриб қолдингиз?

Санам индамади. Ҳилола гапини давом эттириди.

— Зафар аканими?

— Ҳа-а,— деди Санам ўйчан.

— У кимни яхши кўрар экан?

— Уми?.. У ҳалиги Ноила дегани бор-ку, танийсизми, ўшани?

— Уни турмушга чиққан дейишувди шекилли.

— Ҳа. Боласи ҳам бор. Ҳозир эри йўқ экан, ўлганмиш...

— Қизиқ,— деб қўйди Ҳилола.

— Биласизми, Ҳилола, мен Зафарга жудаям ачинаман, раҳмим келади унга.

— Нега?

— Ахир у Ноилага уйланолмайди-ку... Менимча, Ноила унинг бошини айлантирган бўлса керак.

— Ўлар! Институтни битирган, шунча йилдан бери шаҳарда юрган йигит бир жувонга бошини айлантириб қўйса!

— Сиз уни яхши билмайсиз-да, Ҳилола. Шунча нарсаларни кўргани билан жуда содда йигит, ҳаммага ишонади.

— Қайдам.

Хонага жимлик чўкди. Қўрпага бурканиб олган Санамнинг юзлари, аъзойи бадани шампан таъсиридан қизишаради. Астагина устини очди. Уй қоронги бўлгани учун буни Ҳилола сезмади ёки билса ҳам, индамади. Санам кўзини юмди. Қизғиш-қорамтири пардалар орасидан аллақандай нуқтачалар жимирилаб кўринди. «Дунёнинг ишлари ғалати-я. Ҳамма нарса чалкаш, мураккаб».

Аллақаердан йигит-қизларнинг шодон қулгиси эши-тилди. Бу Санамнинг қулоғига чақмоқдай урилиб, сергак тортди. Назарида Зафар билан Ноиланинг қийқириғи эшитилгандай бўлди. Бошини ёстиқдан кўтариб, диққат билан қулоқ солди. Қорбўрон ўйнашгани ҳовлига чиққан йигит-қизларнинг овози экан. Кўнгли бир оз хотиржам бўлиб, яна ёстиққа бошини қўйди. Ҳилола томонга қаради. Унинг бир маромда оҳиста «пиш-пиш» қилгани ухлаб қолганидан далолат берарди.

Санам девор томонга ўгирилди-да, ғужанак бўлганча қўрпага ўраниб олди...

XVI

Бугун учинчи чоракнинг биринчи куни. Зафар тиқилинч автобусда ўтиаркан, ўйларди: «Янги йил. Умрдан яна бир йил ўтди. Кунлар, ойлар, йиллар ўтиб кетгаини билмай қоламиз. Янги йил кириши билан ҳамма нарса янгиланиб, бошқача бўлиб қоладигандай. Ҳаёт ўзида, бир маромда давом этмоқда».

«Мактаб» бекатида автобусдан тушди.

— Салом, Зафар ака. Янги йиллар билан!

Зафар ялт этиб ёнига ўгирилди. Саккизинчи синфда ўқийдиган Комил иршайиб келар эди.

— Ҳа, Комил, қалайсан? Раҳмат, ўзингни ҳам Янги йил билан табриклайман! Байрамларни яхши кутиб олдингми? Бир ёшга улғайиб келяпсанми? — деди.

Улар ёнма-ён кетишди. Бекатдан мактабгача анча юриш керак.

— Зафар ака,— деди Комил,— энди тўғарак очасизми? Янги йилдан кейин девдингиз-ку.

— Ҳа-а, тўғарак дегин.— Зафар бир оз ўйланиб қолди.— Кўрамиз, агар раҳбарлар рухсат беришса, очамиз.

— Нима, бу жуда қийин ишми? — деб ҳайрат билан сўради Комил.

Зафар чуқур хўрсинди.

— Ким билади дейсан, Комил. Бу ишларнинг ҳам ўзига яраша машмашаси бўлар экан-да...

Зафар ўз ўқувчиси билан ёнма-ён борар экан, унга, унинг синфдошларига ваъда бергани — тўғарак ҳақида, уни қандай қилиб очиш ҳақида ўйлар эди: «Нима қилсан экан? Анвар ака билан маслаҳатлашиб кўрсаммикан? Ёки директор айтгандай, оч қорним, тинч қулоғим, деб юраверайми?.. Йўқ, бу бўлмайди. Ҳамма ўз тинчини ўйлайверса, болаларнинг тақдири нима бўлади. Ахир мана бунга ўҳшаган ўқувчиларнинг келажакда ким бўлиши кўп жиҳатдан бизга боғлиқ-ку. Партиямиз ўқитувчининг жамиятдаги ўрнини, ролини, обрў-эътиборини оширишга доимо катта аҳамият бериб келмоқда. Нега энди биз фақат ўзимизнинг тинчимизни ўйлашимиз керак?..»

...Шу куни Зафар мактабдан қушдай енгил бўлиб қайтди.

Эртасига мактабнинг катта залида қўйидаги мазмунда эълон пайдо бўлди:

«Барча ўқувчилар диққатига!
Эртадан бошлаб мактабимизда адабиёт тўгараги ўз
машғулотларини бошлайди.

Машғулот ҳафтанинг ҳар чорсанба ва шанба кун-
лари кеч соат олтида бўлади. Тўгаракка мактаби-
мизнинг адабиёт ўқитувчиси Зафар Ҳакимов раҳбарлик
қилади.

Қизиққанлар марҳамат!»

Эълонни кўрган ўқитувчилар, ўқувчилар ўртасида
шов-шув тарқалди. Баъзилар: «Яхши бўпти, шунаقا
тўгараклар керак», деса, айрим ўқитувчилар: «Бу Ҳа-
кимовнинг ўзбошимчалиги, ўзини кўрсатиш учун қил-
ган», дерди. Тарих ўқитувчиси Шоқосимов на у фикр-
га, на бу фикрга қўшилди. Унинг пешонаси тиришди,
илкис қалампир чайнаган одамдай афтини буриштириб,
директор хонасига кириб кетди.

— Мактабимизда тўгарак очилипти, муборак бўл-
син, Турсун Гиёсович,— деди Шоқосимов киноя билан.

Директорнинг юраги шифиллаб бутун вужуди муз-
лаб кетди.

— Бу нима ҳазил, ўртоқ Шоқосимов?

— Ҳазил бўлса ана кўринг, эълон коридорда осиғлиқ
туритти. Кўрга ҳассадай қилиб ёзиб қўйинти.

Эълонни бориб кўришга директорда хоҳиш ҳам, ма-
дор ҳам йўқ эди. Зафар Ҳакимов ўз сўзидан қайтмага-
нига унинг ишончи комил эди. «Тирранча, ўзбошимча-
ликни сенга кўрсатиб қўяман ҳали».

— Йўқ, бунга бепарво қараб бўлмайди,— деди ди-
ректор жаҳл билан.— Бу масалани педсоветда бир ёқ-
ли қиласиз!

...Педсовет йиғилиши давом этмоқда.

— Ўртоқлар!— деди директор.— Энди охириги маса-
лага ўтсак. Бу, тартиб-интизом, ўқитувчиларнинг хул-
қу одоби ва унинг ўқувчиларга таъсири ҳақидадир.—
Турсун Гиёсович пиёладаги чойдан бир ҳўплаб, сўзида

давом этди:— Маълумки, интизом меҳнат унумдорлиги-нинг асосий мезонидир. Қаердаки, меҳнат интизоми бўшашдими, тартиб-қоидага риоя қилинмадими — ўша ерда иш орқага кетаверади, унум бўлмайди. Бу нарса мактабда айниқса, катта аҳамиятга эга. Чунки биз педагоглармиз. Болаларга билим ва тарбия беришимиз учун аввало ўзимиз билимли, тарбия кўрган, одобли, интизомли бўлишимиз керак. Бетгачопарлик, қайсарлик биз педагогларга ярашмайди. Бинобарин, ўқувчилар билимни ҳам, одобни ҳам, хушмуомалаликни ҳам, интизомни ҳам биздан ўрганадилар. Ахир биз устозлармиз. Бу табаррук номга дод туширмаслик ҳар биримиз-нинг асосий бурчимиз. Лекин, минг афсуски, колективимизда қўпол, бетгачопар тартиб-қоидага амал қилмайдиганлар бор. Раҳбарларни, бинобарин, бутун коллективни ҳурмат қилмаслик, натижада манманликка берилиш, ўзгаларни назар-писанд қилмаслик ҳоллари мавжудки, бундан кўз юмолмаймиз. Аксинча, бунақа кўнгилсиз ҳолларга ўз вақтида барҳам беришимиз даркор. Акс ҳолда, ўқувчиларнинг тарбияси бузилиб, билим олиш савияси пасайиб кетади.

Бир чеккада оёқларини чалиштириб ўтирган озгин, новчалигидан яна ҳам озғинроқ кўринадиган, лекин нимаси биландир бир қараашдаёқ суҳбатдоши диққатини тортиб оладиган физика ўқитувчиси Ботиров луқма ташлади:

— Конкрет гапиринг. Кимлар экан ўшалар?

Директор луқма ташлаган одамни қидирди шекилли, ўтирганларга бир-бир нигоҳ ташлаб чиқди. Ҳамма Ботировга қаради. Бундан луқма ташлаган Ботиров эканини директор ҳам билди. Гапини йўқотиб қўйган одамдай бир оз чайналиб қолди.

— Конкрет гапирсак... Хўш, конкрет гапирсак. Гапирамиз конкрет. Марҳамат, мисолларга ўтаман. Ҳеч кимдан сир тутмаймиз, ҳеч кимдан чўчимаймиз ҳам. Зеро,

бундай кўнгилсиз ҳолларнинг содир бўлишида биз ҳам маълум даражада айбормиз. Чунки биз либерализмга йўл қўйганмиз. Ўртоқлар ҳали ёш, тушуниб қолишар, деб нотўри ўйлаган эканмиз. Энди чидай олмаймиз бундай ҳолга...

Ботиров қизишиб кетди. Шарт ўрнидан турди:

— Ўртоқ Ғиёсов, биз ҳам чидай олмаймиз бу гапларнингизга. Боядан бери умумий гаплар билан шунча одамнинг вақтини олиб ўтирибсиз.

Аравани қуруқ олиб қочувчиларни Ботиров жинидан баттар ёмон кўрарди. Бу хилдаги ўқувчилар билан ҳам, касбдошлари билан ҳам келишолмасди у. Унинг бу одати ҳаммага, жумладан директорга ҳам маълум эди. Шунинг учун индамади, унга қарши гапирмади. Ботировга бир ёвқарашиб қилдию сўзида давом этди:

— Кўп шошилаверманглар, ўртоқлар. Айтамиз, ҳаммасини айтамиз. Хўш, энди мисолларга ўтсак. Мактабимизнинг адабиёт ўқитувчиси Зафар Ҳакимовни олайлик.— Ноила беихтиёр Зафарга қаради. Уларнинг нигоҳлари учрашди. Бу қарабашда: «Нима гап? Тинчликми?» деган савол — ажабланиш бор эди.— Ўртоқлар, шахсан мен бу йигитни ҳурмат қиласман, ўз фанига қизиқади, ҳаракатчан. Лекин буларнинг ўзи камлик қиласди совет педагоги учун. Биз ўртоқ Ҳакимовни одобли, ақлли, тартиб-интизомли ўқитувчи деб ўйлагандик. Лекин, афсуски, у кишидан кутган умидларимиз пучга чиқаёттир. Мисолга ўтаман: бирон марта конспектни тўлиқ ёзганини кўрмадим. Бу нима десам, конспект тезислари дейди. Қаранг-а, тезислар эмиш. Оббо азамат-ей. Нега бундай қиласиз десам: «Бир дафтарни тўлдириб ёзиш шартми, дарсни ўтсам бўлди-да, гап конспектда эмас-ку», деб ақл ўргатади. Бу ҳақда олдинги педсоветларда ҳам қизим, сенга айтаман, келиним, сен эшит қабилида тушунтирган эдим. Шахсан ўзим унинг дарсига бир неча марта кириб ўтирдим. Кўпинча дарсдан ташқари нарсалар

ҳақида гапиради. У кишининг фикрича, китобдаги нарсаларни ўқувчиларнинг ўзлари ҳам ўқиб олармиш. Шунинг учун дарсликда йўқ нарсалар ҳақида маълумот бериш керак эмиш. Йўқ, ўртоқлар,— салмоқлаб гапиради директор,— бундай қилиш бизнинг программализга, ўқитиш методимизга тўғри келмайди... Майли, буларнинг ҳаммасини шу вақтгача кечириб келдик. Ҳали ёш, секин-аста изга тушар, деб ўйладик. Йўқ, аксинча, борган сари баттар ўз нағмасини кўрсатяпти! Мана, бир мисол: ҳамма кўргандир бу киши чиқарган эълонни. Энди мактабда адабиёт тўғараги очармишлар. Бу нима деган гап ахир, ўртоқлар? Бугун бу киши адабиёт тўғараги очса, эртага мана бу киши тарих тўғараги очса, яна бирор биология, география, химия... Ҳар ким билган ишини қиласверса... Нима бўлади унда?! Тўғри, буларнинг ҳаммаси керак. Лекин уни ўзбошимчалик билан қилиш яхшимас-да. Коллектив деган гап бор, ахир. Маслаҳатли тўй тарқамас, дейдилар. Шунинг учун, истардикки, кимда қандай ташаббус туғилса келсин олдимишга, маслаҳатлашайлик. Маъқул бўлса амалга оширамиз, бўлмаса, ўйлашиб кўрамиз. Аммо ўзбошимчаликка ўрин бўлмаслиги керак.

Зафар директорнинг гапларини тинглаб ўтириб, қулоқларига ишонмасди. Наҳотки, шу гапларни директор айтяпти? Наҳотки, мен у кишининг олдига маслаҳатга кирмаган бўлсам? Одамнинг кўзига қараб туриб ёлғон гапиришдан уялмайди-я. Яна педагог, мактаб директори...» Зафар негадир Анвар Обидовни қидирди. Аммо у кўринмасди. «Қаерга кетди экан? У киши бўлса, ёрдам берармиди...»

— Ўлайманки,— директор сўзини якунларди,— менинг фикрларимдан хулоса чиқариб, бу масалани бир ёқли қиласизлар.

Шундан кейин сўз тарих ўқитувчиси Шоқосимовга берилди. У паст бўйли, гавдасига нисбатан анча семиз, оппоқ юзли, тепакал эди. Шоқосимов эркакларнидан

кўра кўпроқ аёлларнига ўхшаб кетадиган ингичка товуш билан бидирлаб кетди.

— Турсун Фиёсовичнинг ҳамма гаплари тўғри. Мактабимизда тартиб-интизом бир қадар бўшашиб кетган. Энг ёмони, ўқитувчилар ўртасида ўзаро ихтилоф пайдо бўлаётир. Бундай нотинч атмосфера, шубҳасиз, ўқитувчиларнинг тарбиясига салбий таъсир кўрсатади. Ўртоклар! Ҳурматли директоримиз Ҳакимовнинг айrim ўзбoshимчаликлари ҳақида гапирдилар. Мен бу фикрларга қўшилган ҳолда, Ҳакимовнинг яна бошқа қилиқлари тўғрисида ҳам гапирмоқчиман. Ҳакимов қилаётган ишлар бизнинг методикамизга мутлақо хилоф. Бу киши комсомол ташкилотининг секретариман, деб кўп бемаънигарчиликлар қилмоқда. Ҳатто ўқитувчиларнинг обрўйини тўкиб қўймоқда. Қайси куни саккизинчи синфга кириб, мени ёмонлапти, саводсизга чиқарибди.

— Ёлғон! — деди Зафар.

— Эшитмасам, гапирмайман, тарих фактга суюнади, мен тарихчиман, — деб сўзини давом эттириди Шоқосимов. — Мени ёмонлашдан олдин шу синфда жияним ўтирганини билиб олсангиз бўларди.

Саккизинчи синфда Шоқосимовнинг жияни ўқишини Зафар биларди. Лекин унинг бунақа гап ташиш одати борлигини хаёлига ҳам келтирмаганди. Дарвоҷе, бирорга етказадиган гап ҳам бўлмовди-ку. Тарих ўқитувчилари саводсиз деб айтмаганди-ку.

— Хўш, ўша жиянингиз нима деди? Қани чақираильик, мен сизни нима деб ёмонлапман?! — деди Зафар алам билан.

Директор қўлида ўйнаб ўтирган ручканинг орқасини столга урди.

— Ўртоқ Ҳакимов!.. Бир камимиз педсоветга ўқитувчиларни чақиришимиз қолувдими?.. Давом этинг, Шоқосимов.

Шоқосимов директорга миннатдорчилик билдириб, сўзида давом этди:

— Ўқувчиларга аллақандай кераксиз нарсалар хусусида гапирипти. Самарқанду, Бухородаги мадрасаларми-ей, нима балоларни гапирипти-да, хуллас.

Бу гаплардан Зафарнинг боши гангид қолди. «Нималар бўляпти ўзи? Наҳотки, гап шу даражага айланиб кетса. Тавба, тушунолмай қолдим-ку... Яхшиямки, Шоқосимовга ўшаганларнинг даври ўтган».

— Яна ким гапиради?.. Марҳамат, ўртоқ Алимов.

Турсун Фиёсовичнинг гапидан Зафарнинг хаёли бўлинди. У ялт этиб Алимовга қаради. «Қани, бу киши нима дейдилар? Қайси хатоларимизни очиб ташлар эканлар».

— Ҳурматли директоримизнинг гаплари ҳам, Шоқосимовнинг фикрлари ҳам тўғри, жуда тўғри, ўртоқлар. Мен жисмоний тарбия ўқитувчиси бўлсам ҳам, тарихий китобларни ўқиб тураман. У мадрасалар ҳақидаги гап нима керак ўқувчиларга? Агар зарур бўлса программа-га киритишарди-да. Программа тузувчиларнинг ҳам Ҳакимовча калласи ишлар ахир!.. Яна бир гап. Бу киши жисмоний тарбия дарсини менсимасмиш. Ваҳоланки, жисмоний тарбия саломатлик гарови. Бу ҳақда партия-хукуматимизнинг қарори ҳам бор.

— Ислот керак! Миш-мишларни нима қиласиз гапириб. Бу ер сизга стадион эмас-ку, ахир ўйинни билсангиз-бильмасангиз коптокни у ёқдан-бу ёққа тепиб юрсангиз.

Ботировнинг бу луқмасидан ўтирганлар ўртасида енгил кулги кўтарилди.

— Ўзи-ку ёмон кўргани кўрган, болаларнинг ҳам ихлосини совитиб юбормоқда стадиондан,— деб сўзида давом этди Алимов.— Шунинг учун Ҳакимовга ўшаган ўқитувчиларнинг орамизда бўлиши колективимиз учун обрў келтирмайди.

Алимов «қойил қилдимми?» дегандек ҳаммага бир-

бир қараб чиқди. Лекин ҳеч ким миқ этмади. Бир на-
фаслик оғир сукунат чўқди. Зафар нигоҳини бир нуқтага
қадаганча, қўлларини мушт қилиб жим ўтиради. У ҳо-
зир нима дейишини, ўзини қандай ҳимоя қилишни бил-
мас, чувалашиб кетган фикрларини йиғиштириб олол-
май қийналарди.

— Икки оғиз гапирсак мумкинми?

Бу асабий ҳолатдан ташқарида ўтиргандек, директор
бирмунча бамайлихотир кўринарди. У: «Нима гапингиз
бор?» дегандек Ботировга қаради. Ботиров унинг ижо-
затини ҳам кутмай, ўрнидан турди-да, иложи борича
ўзини босишга ҳаракат қилиб, вазминлик билан гапира
бошлиди.

— Интизом яхши нарса, албатта. Ҳар бир ишда
тартиб бўлгани маъқул. Бироқ тартиб-интизом ҳақида
гаплашамиз, деб бошқа ёққа ўтлаб кетдик чўмамда.
Интизом ниқоби остида Ҳакимовни муҳокама қилиб
қўлдик-ку! Бундай қилишга нима зарурат туғилди?
Бирон асос борми ўзи? Хўш, инсоф билан айтганда,
Ҳакимовнинг қайси иши нотўғри? Адабиёт тўғараги оч-
моқчи бўлса, шуни танқид қилиш керакми? Дарсликда
йўқ адабиётлар хусусида гапириб берса, бунинг нимаси
ёмон?! Бу билан у нима қилмоқчи? Менимча, ўқувчи-
ларга чукӯр билим беришдан, уларнинг дунёқарашини
кенгайтиришдан, тарбиясини яхшилашдан бўлак нияти
йўқ! Эртаю кеч ўйлагани мактаб, ўқувчилар. Бунинг
нимаси бизнинг методикамизга хилоф? Баъзи ўқитувчи-
ларга ўхшаб қўнфироқ чалинишини пойлаб ўтиrsa ях-
шими? Яшириб нима қиламиз, сабаби тирикчилик
учунгина дарс ўтадиган ўқитувчиларимиз ҳам бор-ку!
Ким билмайди буни ахир?! Дарсга мудраб кириб, муд-
раб чиқадилар.

— Отангиз темирчи ўтмаганми мабодо, ўртоқ Боти-
ров? Бир марта мудраб қолган бўлсан, шуни гапириб
юрасизми энди?— деб тўнғиллади Шоқосимов.

Ҳамма Шоқосимовга қаради. Танбур торларидай аса-

би таранг бўлиб турган Зафарнинг негадир кулгиси қистади... «Гап эгасини топади, деганлари шудир-да». Қизарип кетган Шоқосимов рўмолчаси билан юзларини, йўғон бўйини артарди.

— Тўғри, улар программадан четга чиқишмайди,— деди Ботиров Шоқосимовнинг луқмасига эътибор бермай.— Лекин бунақа расмиятчилик учун ўтилган дарснинг кимга кераги, нимага фойдаси бор?! Үртоқ Алимов, мени кечирингу бирорни танқид қилишдан олдин ўзингизга бир назар солинг. Болаларнинг қўлига коптакни бериб қўйиб, ўзингиз эринмай шахмат ўйнайсиз.

— Ёлғон! Бўҳтон!— деди Алимов.

— Қизишманг! Қечагина охирги соатда буфетчи билан шахмат сурини ўтирган ким эди? Болалар бўлса шу совуқда, қорга беланиб тўп тепиб юришипти. Сиз эса иссиққина буфетга кириб олиб...

— Қишики спорт зали бўлмаса нима қилай?— деб унинг гапини бўлди Алимов.

— Қишики зал бўлмаса ким айбдор? Маълум маънода сиз. Сизнинг фанингиз учун керак бўлгандан кейин югарасиз-да. Директорга айтинг, завучга айтинг. Булар гапингизни эшитишмаса райОНОга боринг. Ҳакимов жисмоний тарбияни менсимайди дейсиз. Ўзингизчи? Борди-ю, сиз ўз фанингизни севсангиз, ҳурмат қиласангиз бунақа иш тутмасдингиз. Болаларнинг қўлига коптакни бериб қўйиш учун олий маълумотли ўқитувчи бўлиш, унга маош тўлаш шартми?!

Алимов ўрнидан иргиб турди.

— Турсун Фиёсович, мен бу гапларга қаршиман! Бу киши мени муҳокама қиляптими?

Директор ўзини ўнглаб олиб гапиргунча Ботиров сўзини давом эттириди:

— Бу ерда ҳеч кимнинг масаласи муҳокама қилинадётгани йўқ. Интизом, педагог масъулияти ҳақида гап боргандан сўнг ҳар биримизнинг яхши-ёмон томонларимизни айтишга ҳаққимиз бор. Назаримда, сиз ўз вази-

фангизни аниқ ва чуқур тушунмайсиз. Яна Ҳакимовни танқид қиласиз, мадрасалар хусусида гапиради, дейсиз. Шу тарихий ёдгорликларни сақлаш ва таъмирлаш учун ҳукуматимиз қанча маблағ ажратмоқда, ҳатто бу ҳақда давлатимизнинг маҳсус қонуни бор. Ана шу ёдгорликлар, мадрасаю миноралар хусусида гапириб бериш, нафакат гапириб бериш, балки экскурсиялар уюштириш, болаларга улар тўғрисида чуқурроқ маълумот бериш аслида сизнинг вазифангиз эмасми, ўртоқ Шоқосимов?! Бу йигит оз бўлса-да, сизнинг ишингизни қилса-ю, сиз уни ифвогарга, бадбинга чиқариб ўтирангиз-а.

— Мен бирорининг ёрдамига муҳтож эмасман,— деб ўтирган жойида пўнгиллади Шоқосимов.

— Ҳар бир ўқитувчи ўқувчилари қалбida ўз фанига нисбатан қизиқиш уйфота олиши керак. Бўлмаса унинг педагоглиги бир пул. Бу жиҳатдан ҳам мен Ҳакимовга тан бераман. Мана мисол: Қаримов Зоҳид, Носиров Ҳамидулла деган ўқувчilar бор. Шу болалар мактабда энг шўх, ялқов, қолоқ ўқувчи сифатида ном чиқарган. Буни ҳаммамиз биламиз. Яширмайман, улар менинг фанимдан ҳам яхши билмайди. Кўп гапирдим, кўп ўргатдим, бўлмади. Охири бир кун уларниң бошқа фанлардан олган баҳоси билан қизиқдим. Ҳамма фандан ҳам ўртача экан. Лекин адабиётдан тўрт, беш олган. Кейин Ҳакимов билан шу ҳақда гаплашдим. Баҳолар юзаки эмасмикан, деган хавотирда эдим. Йўқ, суриштирсан, ҳалиги иккала бола ҳам адабиёт фанига қизиқувчилардан экан. Шунда, рости, Зафаржонга ҳавасим келди. Қимки ўқувчida ўз фанига нисбатан қизиқиш уйфота олса — марра ўша ўқитувчиники. Лекин шуни ҳам айтиб қўяй, ўша болалар икки-уч йил олдин адабиётдан ҳам паст ўқиган. Ҳакимов улар билан очиқ-часига, дилдан суҳбатлашибди, ота-онаси билан гаплашибди. Хуллас, иккала ўқувчининг ҳам кўнглини топибди. Учаласи паркда музқаймоқ еб, гурунглашиб ўтирганини кўрганман. Яшириб нима қиламиз, кўпчилигимиз

ўқувчилар билан дилдан, самимиň гаплашишни билмаймиз, аниқроғи, ўзимизни улардан юқори тутамиз. Оқибатда, болалар биздан ўзини олиб қочади, кўнглини ёзиб, дардларини айттолмайди. Ҳозир ўша Зоҳид ҳам, Ҳамидулла ҳам анча одобли, тартибли бўлиб қолди. Буни ҳаммамиз биламиз-ку...

— Комсомол ташкилотининг секретари бўлгандан кейин ишласин-да болалар билан,— деб луқма ташлади Алимов.

— Ишлаяпти! — деди Ботиров кескин.— Мен ҳам ишлаётганини айтяпман. Аммо битта-иккита одамнинг ишлагани етмайди. Бу ишни ҳамма баравар олиб бориши, барча бир хilda жон кўйдириши керак. Ўқитувчи наридан-бери дарс ўтиш билан кифояланмай, ўқувчиларнинг тарбияси билан ҳам жиддий шуғулланиши зарур. Бугунги педагогнинг вазифаси ана шундай. Ёшлиарни коммунистик ахлоқ руҳида, ватанпарварлик, меҳнатсеварлик руҳида тарбиялаш керак, деган гапларbekорчи, шунчаки айтилаётган гаплар эмас. Партиямиз педагоглар зиммасига ана шундай масъулиятли вазифаларни юкламоқда. Ҳакимов қалб қўри билан шу шарафли ишни адo этишга киришяпти. Биз бўлсак уни муҳокама қилиб ўтирибмиз-а. Шахсан мен Ҳакимовга ўхшаган ўқитувчиларимиз кўпайишини истайман.

Ботиров гапини тугатиб ўтириши билан ҳамма қарсак чалиб юборди. Зафар фавқулодда лотореяга машина ютган одамдай саросимага тушиб қолди. Икки юзи қизариб кетди. У хижолатданми, бошини кўтараолмасди.

Ботировнинг нутқи мажлис руҳини ўзгартириб юборди. Лекин кўпни кўрган Турсун Ниёсович унча-муичага ўзгариб кетадиганлардан эмасди. Қайтанга Ботировнинг гапларига унинг ғаши келди. «Худди мактаб директоридай тутади-я ўзини. Жуда ақлли бўлиб кетипти». У ўрнидан ҳам турмасдан сўради:

— Яна гапирувчилар борми?

Ноила ён-атрофга қаради-да, ўзидан бошқа сўзга чиқадиган йўқлигига ишонч ҳосил қилиб, қўлни кўтарди.

— Мумкинми?

Директор Ноилага қаради. Унинг бу қарашида: «Бу хоним нима деркинлар шу пайтда?» деган норозилик бор эди.

— Марҳамат. Фақат қисқароқ бўлсин, илтимос, вақтимиз кетяпти.

— Менимча, Ҳакимовнинг қилаётган ишлари методикадан сира чиққан эмас. Ўқувчиларни адабиётнинг шу кундаги вазифаси билан танишириш, қандай ёш ёзувчи ва шоирлар кириб келаётганлиги, Иттифоқ адабиётida қандай янги асарлар яратилганлигидан хабардор қилишининг нимаси заарли! Бунинг қаери бизнинг методикамизга хилоф?! Тўгарак масаласи. Ахир тўгарак очишни ким таъқиқлайди? Қайси мактабда тўгарак йўқ? Шундай экан, Ҳакимовни муҳокама қилиб, уни танқид остига олишимизнинг ўзи кулгили бир гап. Ҳолбуки, уни бу ташаббуси учун табриклишимиш керак.

Шоқосимов сапчиб ўрнидан турди.

— Йўқ! Раҳимованинг гапи мутлақо нотўғри. Мен биламан у нима учун Ҳакимовнинг ёнини олаётганлигини. Уларнинг алоқаси бор, у Ҳакимовга дон сепиб юради.

Зафар чидаб туролмади. Унинг аъзойи бадани титраб кетди.

— Виждонсиз!— деди у Шоқосимовга паст товуш билан.— Садқаи педагог кетинг!

Ноила ялт этиб Шоқосимовга қаради. Аммо гапи ролмади. У бўшашиб, оёқ-қўлидан дармони кетиб, стулга ўтирди.

Директор ўрнидан турди. Унинг бароқ қошлари яна ҳам қуюқлашиб кетганди.

— Қизишманглар, ўртоқлар,— деди у.— Бу ер мактаб. Унинг директори бор, завучи бор. Кимки нима қил-

са дирекτор ёки завучдан сўраши шарт. Ҳар ким ўз билганини қилиб кетаверса, мактабнинг карвон саройдан фарқи қолмайди. Гап шу: ҳозирча тўгарак очмайсиз, ўйлашиб кўриб, натижасини айтамиз. Ҳакимовнинг ахлоқидан мен мутлақо бехабар эдим. Буни текширамиз, аниқлаймиз. Шу билан бугунги мажлисимиз тамом.

Зафар тўгарак ҳақида Анвар Обидович билан гаплашганини айтмоқчи эди, бўлмади, ҳамма ўрнидан туриб қолди.

Ноила эшикдан чиқдию бўш синфга кириб кетди. Зафар ҳайрон бўлди. У пальтосини олди-да, Ноиланинг орқасидан кирди. Ноила партага ўтириб олиб, пиқ-пиқ йиғларди. Зафар унинг ёнига ўтирди.

— Ноила, йиғламанг, йиғламанг.

— Энди қайси юз билан юраман. Ўқувчилар эшитса нима бўлади?

— Эшитмайди ўқувчилар, хафа бўлманг.

Ноила баттар йиғларди. Зафар унинг бошини кўтарди.

— Мени деб сиз ҳам галга қолдингиз,— деди Ноила.

— Унақа деманг, Ноила, унақа деманг. Аксинча, мен учун сиз бўхтонга учрадингиз-ку. Туринг, Ноила, кетамиз, туринг.

Ноила оппоқ рўмолчаси билан юз-кўзларини артар, Зафарнинг юзига қарай олмасди.

Улар ҳовлига чиққанда, мактабда ҳеч ким қолмаганди. Иккови ҳам унсиз, оғир қадам ташлаб борар эди.

Ботаётган қуёш нурлари кеча ёққан қалин қор устида жилва қиларди.

XVII

Зафар эрталаб мактаб ҳовлисида Санамни учратди. Унинг юзлари сўлғин, ранглари бир ҳол эди.

— Ҳа, Санам, кўринмайсиз?

— Билмадим, сал шамоллаб қолдим. Ўзингиз яхши юрибсизми, Янги йилни яхши кутиб олдингизми?

Санам бу гапни сўрашдан мақсади — Зафар Янги йилни қаерда, ким билан кутганини билиш эди.

— Раҳмат. Қишлоққа бориб келдим.

Санам бу гапдан жуда севиниб кетди. «Демак, байрамда Ноила опа билан бирга бўлмаган», ўйларди у ўзича.

— Айтгандай, тўғарак ташкил қилибсиз, ҳали эълонга кўзим тушиб қолди.

Зафар чуқур хўрсиниб қўйди.

— Ҳа, бир шунаقا ният қилувдик, ғалваси ортиқча бўляпти.

— Қанақа ғалва? Тўғарак очишга қарши одамлар бор эканми?

— Бу ишни мактаб раҳбарлари билан бамаслаҳат қилмаганимиз чакки бўлганга ўхшайди. Яқинда бу мактаб билан хайрлашамиз шекилли,— деди Зафар жилмайиб.

— Йўғ-э.

Зафар педсоветда бўлган гапларни Санамга қисқача тапириб берди. Лекин Ноила билан ўзи ўртасидаги гапларни айтгиси келмади. «Шахсий гапларни ҳаммага айтавериш яхши эмас».

Санам Зафарнинг гапларини тинглаб, директорнинг шу даражага боргандигидан ҳайратда қолди.

— Энди нима қилмоқчисиз?— деди Санам ниҳоят.

— Нима қилардим, ўз билганимдан қолмайман. Чунки бунинг ҳеч қандай ёмон томони йўқ. Тўғарак машғулотини бошлайвераман. Агар яна у-бу дейишса мен ҳам қараб турмайман. РайОНО бор, улар бир нарса дейишар.

— Шундай дейсизу,— деди Санам ачинган оҳангда,— улар сиздан олдин юқорига чиқиб, битта гапни ўнта қилиб айтиши мумкин-да. Гапга қулоқ солмайди, ўз билганидан қолмайди, деб сизни ёмонотлиққа чиқариб қўйишиша нима бўлади?

— Бир гап бўлар. Жуда шу даражага бориб етса,

ишдан кетарман. Аввало шунгача бориб етмаса керак.

— Қайдам... Ишқилиб ҳаммаси яхши бўлсин-да.

Шу маҳал Ноила келиб қолди. Санам уни кўрдию бир хил бўлиб кетди. Буни Зафар сезди.

— Майли, Зафар ака, мен борай.— Санам шундай деди-да, югуриб кетди.

Зафар унинг орқасидан қараб қолди. Ҳозир негадир унга ачинди.

— Салом, Зафар,— деди Ноила.

— Салом.

Ноиланинг қовоқлари шишган, кўзларининг ости салқиган, афт-ангари узоқ ётган касалга ўхшарди.

— Зафар, бугун дарсдан кейин кетиб қолманг, сизда икки оғиз гапим бор,— деди Ноила жиддий қиёфада.

Зафар ҳайрон бўлди.

— Нима гап? Тинчликми ўзи? Бугун тўгаракнииг биринчи машғулоти бор эди-ку.

— Шунақами? Майли, ундай бўлса ишингиз тугагандан кейин бизникига бирров кириб ўтиш, хўпми, илтимос.

Зафар «хўп» деган маънода бош иргаб қўйди.

...Зафар куни билан нима қилганини, қандай дарс ўтганини яхши билмайди. Хаёлида Ноиланинг гапи чувалашиб юрди. «Нима гап экан? Нега унинг кайфияти ёмон, ранг-рўйи бунаقا? Нима бўлдийкин?»

XVIII

Зафар келганда Ноиланинг бир ўзи ўтиради.

— Үғлингиз қаёқда?— деб сўради Зафар.

— Ойимникида... Сиз билан бемалол гаплашиб олай, дедим.

— Шунаقا жиддий гапми?

— Ҳа,— деди Ноила Зафарни ичкарига бошларкан,— киринг, ўтиринг.

Зафар стулга омонатгина ўтириди-да, «қулоғим сизда», дегандек Ноилага қаради.

— Сизга малол келмасин, Зафар, сиз билан очиқчасига гаплашиб олмоқчиман,— деди Ноила ва кўзларини бир нуқтага тикиб сўзида давом этди:— Кечаке кечаси билан ўйлаб чиқдим. Мен бир баҳтсиз аёл эканман. Ёшим ҳам йигирма олтидан ошди. Шу пайтгача ҳеч кимни севмадим, балки мени ҳам ҳеч ким севмагандир. Севмасам ҳам турмушга чиқдим, болалик бўлдим. Шу ҳолда турмушим давом этаверсаям кошкийди. Бу ҳам кўплик қилди...

— Ахир мен сизни севаман-ку, Ноила,— деди Зафар секингина.

— Балки сиз мени севарсиз. Менга уйланмоқчи бўлганини из ҳам эҳтимол ростдир. Лекин бундай бўлмайди, бўлиши мумкин эмас.

— Нега? Нега энди мумкин эмас? Бунақалар камми?

— Балки бордир шунақалар. Лекин мен... мен бундай қиёлолмайман... сизга турмушга чиқолмайман...

Ноила йиғлаб юборди. Зафар унга жуда-жуда ачишиб кетди. У аста ўрнидан туриб Ноиланинг ёнига -- диванга ўтириди.

— Йиғламанг, Ноила, йиғламанг, нима бўлганда ҳам сиздан воз кечмайман.

Ноила бошини беихтиёр Зафарнинг кўксига қўйиб, баттар йиғлаб юбордн. Зафар унинг юз-кўзларини, соchlарини силар, унга далда беришга ҳаракат киларди.

— Ахир қандай қилиб сизнинг баҳтингизга завот бўламан. Бунга менинг виждоним йўл қўймайди. Ўйлаб-ўйлаб шу қарорга келдим. Сиз мени... Мени унутинг... Қийна манг ўзингизни... Сиз Санамга уйланинг, у сизни яхши кўради. Биламан, севади сизни. У бечора ҳам зор

қақшамасин. Бахтли бўлинглар. Сиз бахтли бўлсан-
гиз — мен шундан хурсандман.

— Ноила... Мен...

— Бўлди, бўлди,— деди Ноила Зафарнинг гапини
бўлиб,— бошқа гапирманг, бари бир мен фикримдан
қайтмайман. Ахир сизнинг ҳам ёр-биродарларингиз
бор, ота-онангиз, қариндош-уруғларингиз бор. Менга
уйлансангиз, уларнинг олдидагандай қилиб бош кўта-
риб юрасиз? Мен қандай қарайман уларнинг юзига?
Биламан, ўшанда ҳам ҳамма мени нафратлайди, Зафар-
нинг бошини айлантирган, дейди.

— Ноила мен... ўзим...

— Йўқ, Зафар, мен бари бир рози бўлмайман.

Зафарнинг тили калимага келмади. У нима дейиши-
ни, нима қиласини билмай қолди. Назарида шу соат,
шу дақиқадан бошлаб Ноила учун бегонадек эди. Ноила
икки кафтини юзига босиб, пиқ-пиқ йиғлар, йиғининг
зўридан кўзлари, қовоқлари шишиб кетганди. Зафар
уни юпатмоқчи, эркалаб овутмоқчи бўлди, лекин ҳозир
бунинг ўрни эмаслигини, ҳамма гап-сўзлар фойдасиз
эканини тушунди. У индамай ўрнидан туриб, эшик то-
мон юрди. Ноила ҳамон ўша ҳолда ўтирас, Зафарга
қарамасди. Зафар пальтосини кийдию Ноилага узоқ
термилиб қолди.

— Хайр,— деди ниҳоят.

Ноила оғир ётган бемордек беҳоллик билан жойидан
турди. Уларнинг нигоҳлари тўқнашди. Ноила Зафарнинг
киприклири намланганини сезди, лекин ўзини тутди,
бир оғиз ҳам гапирмади. Бир дамдан сўнг унинг лабла-
ри секин пичирлади:

— Хайр...

Зафар эшикни секин, жуда эҳтиётлик билан ёпди-да,
гўё зинани санаётгандай бир-бир босиб тушиб кетди.
Унинг қадам товушлари анчагача Ноиланинг қулоқлари
остида эшитилиб турди.

Бугун якшанба. Зафар ёлғиз ўзи китоб титкилаб, охири зерикди. «Содиқнинг бўлганиям яхши эди,— ўйлади у — одамни зериктирмай ўтиради. Содиқ қизиқ бола-да, дунёни сув босса тўпифига чиқмайди. Содиқقا ўхшаб ҳамма нарсага қўл силтаб яшайвериш керакка ўхшайди...

Зафар хаёлини чалғитиши учун қўлига яна китоб олди. Паст товуш билан ўқий бошлади:

Иўлии йўқотса одам — муҳаббатга суюнгай,
Ғуссага ботса одам — муҳаббатга суюнгай.
Чорасиз қотса одам — муҳаббатга суюнгай,
Мен кимга суюнгайман, биринчи муҳаббатим,
Фақат эслаб ёнгайман, биринчи муҳаббатим.

Китобни ёпди-да, ўзича пичирлади: «Мен кимга суюнгайман, биринчи муҳаббатим. Фақат эслаб ёнгайман, биринчи муҳаббатим». Кўзларини юмиб ўйга толди. Кўз ўнгига Ноила гавдаланди.

Нопла билан бўлган гаштли суҳбатларни, шаҳар атрофига чиқиб, сайр қилганларини эслаб кетди. Айниқса, тоққа чиқишгани Зафар учун ажойиб бир хотира бўлиб қолди...

Ўшанда иккинчи май эди. Ноила ўғлини ойисига қолдирию Зафар билан тоққа чиқди.

Автобус одамлар билан тирбанд. Йўловчиларнинг кўпчилиги шаҳардан лола тергани тоққа кетишаپти. Ҳаво иссиқ. Автобусда тер аралаш атири ҳиди анқийди.

— Бу ёқларга олдин чиққанмисиз?— деб сўради Ноила

— Йўқ, биринчи марта келишим.

Автобус тобора юқорига кўтарилиб боради. Йўлнинг икки чети хокандозлаб чўғ солингандай қип-қизил лола-қизғалдоқ билан қопланган. Ҳамма табиатнинг чиройига маҳлиё бўлиб бормоқда. Фақат орқа ўриндиқда

ўтирган бир йигит ёнидаги қизга нималар ҳақидадир куйиб-пишиб гапиради. Улар на одамларга эътибор беришади, на далаларнинг чиройига.

Ниҳоят манзилга етишди. Йўловчилар дупур-дупур автобусдан тушишди. Икки томон баланд тоғ, ўртада орқасидан бирор қуваётгандек шиддат билан тоғ дарёси оқади. Ҳув нарида ГЭС кўринади.

Одамлар бир зумда ҳар томонга тарқалиб кетишли. Зафар билан Ноила ўнг томондаги қирга кўтарнилди. Ҳар хил мевали, манзарали дараҳтларнинг салқин сояси кишини ўзига чорлади.

— Зафар, мана бу ерга ўтирасак-чи? — деди Ноила ўрикнинг соясини кўрсатиб. — Довучча ҳам ёнгинамизда бўлади.

— Майли.

Газета тўшаб ўтиришди.

— Марҳамат, — деди Зафар, — бизнинг баҳмал кўрпачаларда ўтириб ҳордиқ чиқаринг.

Иккаласи бу гапдан маза қилиб кулди. Ноила кула-кула газета устига ўтиреди. Сўнгра унинг ёнидан Зафар жой олди. Ноила рўмолчаси билан оппоқ бўйини, иссиқдан қизаринқираган юзларини артди.

— Уф, бирам иссиғ-е, — у газета олиб елпинди.

— Қани бўлмаса, бир нонушта қилиб олайлик.

Тўрхалталарни очишиб сомса, помидор, бодринг, нон олишди.

— Зафар, пичоқ олганмисиз?

— Пичоқ совуқ қурол ҳисобланади. Шунинг учун ёнда олиб юриш ман этилган, — деди Зафар.

— Бўлмаса буларни нима билан тўғраймиз?

— Тишлаб-тишлаб еяверамиз, маёвканинг қизиги шунда-да...

Улар ширингина нонушта қилиб олишди. Сўнгра лола тергани тоққа чиқиб кетиши. Лола унча кўп эмасди. Аммо тоғнинг ҳавоси, гўзал манзараси жуда ёқимли. Улар кун пешиндан оққунча айланишди. Охири

чарчаб, дам олгани ҳалиги «бахмал кўрпача» солинган жойга келишди.

— Тоғ маза-да,— деди Ноила.— Ҳавосини қаранг тозалигини. Одамнинг чарчагани ҳам билинмайди... Битта шеър ўқимайсизми, Зафар?

— Ростдан ҳам шеър эшигингиз келяптими?

— Бўлмасам-чи?

Зафар шеър ўқиди...

— Ажойиб шеър экан,— деди Ноила жимликни бузиб.— Ўзингизникими?

— Узумини енгу боғини сўраманг...

XX

Обидов ўқитувчиларнинг конспектини кўриб ўтирибди. У охирги дафтарни ёпди-да, сигарет тутатди. Ўрнидан туриб дераза ёнига борди. Сигарет тутунини босиб-босиб тортаркан, ҳовлидаги дараҳтларга, гулларга разм солди. Баҳор ҳам кеп қопти. Дараҳтлар сичқоннинг қулоғидай барг чиқарипти.

Эшик тақиллаб Обидовнинг фикри бўлинди.

— Марҳамат, киринг,— деди эшик томон ўгирилиб. Қия очилган эшикдан Зафар кўринди.

— Э-э, Зафаржон, бормисиз, ука? Жуда соғинтириб қўйдингиз-ку.— Кўришиб, ҳол-аҳвол сўрашдилар.— Қани, марҳамат, ўтиринг-чи, бир суҳбатлашайлик. Хўш, тинчликми? Соғайиб кетдингизми? Сал танқидгаям касал бўлаверасизми? Оббо сиз-эй.

Зафар хижолат бўлгандай Обидовга қарашни ҳам, кўзини ундан олиб қочишни ҳам билмай қолди. Обидов сигарет қолдиини кулдонга эз菲尔аб ўчирапкан, сўзида давом этди:

— Эшигдим, Зафаржон, ҳаммасини эшигдим. Афусски, ўша куни тобим қочиб, педсоветга келолмадим. Тузалиб ишга чиқсан, сиз йўқиз.

— Анвар ака,— деди Зафар,— ҳозир мен сизнинг олдингизга бир хушхабар билан келдим.

Обидов бир қадар сергак тортди. «Бетоблигида ҳам тинч ётмайди бу бола», деган фикр ўтди хаёлидан.

— Хўш, хўш?

— Мени табриклишингиз мумкин. Ҳозир ўртоқ Азларовнинг қабулидан келяпман.

— Азларовнинг?— Обидов икки бошли бузоқ кўрган одамдай ҳайратда қолди.— Усмон Қодировичнингми?

— Ҳа, Анвар ака,— Зафар ичидан жўшиб келаётган ҳаяжонини босиб, иложи борича вазминлик билан гапиришга ҳаракат қиласарди.— Худди ўша кишининг қабулида бўлдим. Роса ярим соат ўтиридим. Жуда ажойиб одам эканлар.

— Оббо сиз-еї... Оббо азамат-еї,— дерди Обидов нима дейиншини билмай.

* * *

Гилам тўшалган мармар зиналардан тўртинчи қаватга чиқиб бораркан, Зафар ўйларди: «Нима деркин Усмон Қодирович? Тўғри тушунармикан фикримни?..»

Зафар қабулхонага кирди-да, хипча бел, нозик-ниҳол котибага ўзини танишитирди. Усмон Қодирович билан телефонда гаплашганини, қабулига чақирганини айтди. Котиба ҳам анои эмаскан, «Ҳозир сўраб кўраман», деб бигиз пошналарини ойнадек ялтираб турган паркетга қарс-қурс уриб Азларовнинг хонасига кириб кетди. Котиба қиз қайтиб чиқди-да, Зафарга қарамай:

— Киринг,— деди.

Зафар қора дерматин қопланган икки қават эшикни очиб ичкирига кириши билан бир он ўзини йўқотиб қўйди. Узун хонанинг икки четига қатор қилиб стул қўйилган, эшикдан кирганда ўнг томондаги жавонлар китобга тўла. Полдаги чўғдай қип-қизил гилам кўзни қамаштиради. Хонанинг тўрида «Т» шаклида қўйилган стол ортида Усмон Қодирович ўтирибди. Унинг орқа томонидаги деворда Ленин портрети. Хонанинг баҳайбатлиги-

дан ўша катта стол ҳам кичкина кўринади. Зафар Азларовни турли йиғилишларда, телевизорда кўп кўрган, аммо ҳеч қачон яқиндан учрашмаган, юзма-юз келмаганди. Сочига оқ оралаган бўйдор одам экан. Зафар кириши ҳамоно у ўрнидан туриб:

— Марҳамат, келинг,— деб мулозамат қилди.

Эшикдан то Усмон Қодировичнинг олдига боргунча Зафарнинг назарида анча вақт ўтгандай, юриши унмагандай туюлди. Азларов Зафарга қўл узатди. Кўришиди. Усмон Қодирович ўз ўрнига, Зафар эса унинг рўпарасидаги юмшоқ курсига ўтиреди. Азларовнинг маънодор кўзлари Зафардан узилмас, гёё уни таъқиб қилаётгандай эди. Азларов столи устидаги календарга (шунга Зафарнинг исм-шарифини ёзиб қўйган бўлса керак) бир қараб олди-да, Зафарга юзланди.

— Хўш, Зафаржон, нима янгиликлар бор? — деди.

Азларовнинг бир қадар бемалол ўтириши, гапига расмий тус бермасдан мурожаат қилиши Зафарга ўзини сал тутиб олишга, эркинроқ, тортиномай гапиришга имкон берди. «Гапни чўзиб, вақтини олиб нима қиласман. Бор гапни очиқ, дангал айтиб қўя қоламан».

— Мен Сизнинг олдингизга ўғлингиз масаласида келувдим.

— Ўғлим?

— Ҳа, домла, ўғлингиз... Биласизми...

Зафар мактаб директори билан бўлган тортишувни, Қосимжон ҳақидаги ўзининг фикрларини қисқа, лўнда қилиб Усмон Қодировичга айтиб берди.

— Охири ўйлаб-ўйлаб сизнинг қабулингизга киришга, ўзингиз билан бир маслаҳатлашиб кўришга журъят этдим. Албатта, мени тўғри тушунарсиз, деб ўйлайман.

Усмон Қодирович уч-тўртта қаламни кафтлари орасига олиб ғилдиратиб ўтиаркан, ўйланиб қолди. Зафар унга ўқтин-ўқтин қараб қўяди-ю, аммо ўзининг гаплари қандай таъсир қилганини англолмайди.

— Менинг олдимга келишни сизга ким маслаҳат берди?— деб жимликни бузди Азларов.

— Ҳеч ким... Ўзим шундай фикрга келдим.

— Яхши... Маъқул... Энди гап бундай, Зафаржон,— Усмон Қодирович оҳиста, салмоқлаб гапиради.— Қайси ўқувчининг қандай ўқиши, албатта, сиз — педагогларга кўпроқ аён. Жумладан, менинг ўғлимнинг ўқишлари ҳам. Тўғриси, Қосимжоннинг ўқишини суриштириш учун менда вақт ҳам йўқ. Баъзида ҳатто бир ҳафталаб кўрмайман. Борди-ю, у аъло баҳо қўйишга арзимас экан, зўрма-эўраки ёпиштиришнинг нима кераги бор. Сиз тўғри йўл тутгансиз, Қосимжон ўқишига қобилияги бўлмаса бирор касб-ҳунар эгаси бўлар. Олтин медални тақиб институтга киролмай юрганидан кўра, яхши ишчи бўлгани тузук эмасми?!— Усмон Қодирович ўрнидан туриб Зафарнинг ёнига келди-да, унинг елкасига қўлини қўйди.— Яшанг, раҳмат сизга, Зафаржон, чинакам педагог экансиз,— Зафар ҳам ўрнидан турди. У ҳозир Усмон Қодировичнинг гапларини эшитаркан, қулоқларига ишонмас, Турсун Фиёсовичнинг Азларовнинг чораклик баҳосини беш қилинг, деб куйиб-пишгани кўз ўнгидан кетмасди. Усмон Қодирович хайрлашиш учун Зафарга қўл узатди.— Хайр, соғ бўлинг, ишингизда омад... Ҳа, дарвоқе, сиздан бир илтимосим бор, фақат мени тўғри тушунинг. Иложи борича Қосимжонга ёрдам беринг, кўнглида адабнётга қизиқиш уйғонса ёмон бўлмасди. Чунки адабнётни севган киши одамларни ҳам, ҳаётни ҳам севишни билади.

Зафар бу маҳобатли хонадан қандай чиққанини билмайди. Ҳозир унинг учун ҳамма одам яхши, ҳамма нарса гўзал эди. Боя ўзига бир оз менсимай қараган котиба қиз ҳам ҳозир жуда меҳрибон, ҳақгўй, адолатли бўлиб кўринди. Мармар зиналар эскалатор каби ўзи олиб тушиб қўйгандай туюлди. Эрта баҳорнинг одамни бўшаштирувчи иссиғи ҳам унинг учун ёқимли эди.

* * *

— Оббо Зафаржон-эй, хўб ажойиб иш бўптида-а,— деди Обидов.

— Кўрдингизми, Анвар ака, биз бекордан-бекорга тортишиб, асабийлашиб юрибмиз.

— Тўгарагингиз машғулотлари қандай кетяпти?

— Уч-тўрт марта йиғилдик. Болаларда қизиқиш кучли. Ҳатто катта синфга сифмаяпти. Бу орада тобим қочиб қолди, ишга чиқсан давом эттираман.— Менга қаранг, Анвар ака, мен бир нарсага тушунмаяпман. Нега Турсун Фиёсович тўгарак очишга бунча қаршилик қиласди?

Обидов маънодор жилмайди. Сигарет олиб тутатдида, ўта сирли бир нарсани айтиётгандай, оҳиста гап бошлади:

— Эй, Зафаржон, сиз ҳали ёшсиз, бу ердаги кўп гаплардан хабарингиз йўқ. Мактабимизда тўртта тўгарак очиш учун маблағ ажратилган. Билмадим, сиз биласизми-йўқми, тўгарак олиб борувчи ўқитувчига ҳар ойда ўн беш сўмдан қўшимча ҳақ тўланади. Турсун Фиёсович ана шундан қўрқади.

— Нега? Бунинг нимасидан қўрқади?— деб ҳайрон бўлди Зафар.

— Гап шундаки, тўртта тўгарак учун олтмиш сўм ажратилган бўлса, шундан ўн беш сўмини Ботиров олади, холос. Қолганини директор Шоқосимовга, Алимовга, яна биология ўқитувчиси бор-ку, Халилова, ўшанга ёзиз қўйган. Уларни тўгарак раҳбарлари, деб кўрсатган.

— Анвар ака, наҳотки бунга ҳеч ким индамаса? Масалан, сиз?

Обидов сигаретни чуқур-чуқур сўриб, деди:

— Биламан мен. Бир неча марта айтганман, тортишиб ҳам қолганмиз. Агар сезган бўлсангиз, муносабатларимиз унча яхшимаслиги ҳам шундан. Уларни юномига ўtkазиб қўямизу коллектив ишига ишлатамиз,

мукофотга қўшиб берамиз, меҳмон-пеҳмон келганда кепрак бўлади», дейди. Шундай дегандан сўнг нима дейсиз? Ҳадеб гапираверсангиз иғвогарга чиқаришади... Сизнинг тўғарак очиш ҳақидаги фикрингизга қарши чиққани ҳам шундан. Сир очилиб қолишидан қўрқади... Ҳа, дарвоқе, мен ҳам сизга бир хушхабар айтишим мумкин. Уч-тўрт кун олдин комиссия келди мактабимизга, Маориф министрлигидан. Ўқитишиш ишлари, кабинет системаси, кўргазмали қуроллар масалалари, тўғараклар борйўқлиги, ҳандай ишлётгани каби кўп масалалар билан қизиқди. Мактаб ислоҳоти бўйича амалга оширилган конкрет ишларни атрофлича текшириди. Физика тўғараги машгулотида қатнашди. Ботировга раҳмат айтди. Шоқосимов, Алимов ва Халиловадан тўғараклар машгулоти ҳақидаги ҳисобот дафтарларини сўраган эди, улар бу ёқда қолиб Турсун Фиёсовичнинг ранги оқариб кетди. Шоқосимовнинг усталигини қаранг: «Мен тўғаракни яқинда ёш ўқитувчимиз Ҳакимовга топширганман, ҳозир у киши бетоб, ҳамма дафтар-журналлар ўшанда», дейди.

— Ие, бу қанақаси бўлди энди?

— Шунақаси ҳам бўларкан-да, Зафаржон. Лекин касални яширсанг иситмаси ошкор қиласи деганларидек, яшириб бўлмади. Ҳаммасини борлигича, рўй-рост ёзив бердик. Шундан бери Турсун Фиёсовичнинг ётартурарида ҳаловат йўқ. Ишгаям гоҳ келиб, гоҳ келмай юрибди... Аммо нима бўлгандаям яхши бўлди. Ким хабар қилган бўлсаям яшасин.

— Нима, биронтаси хабар берган дейсизми? — қизиқсинди Зафар.

— Бўлмасам-чи? Министрлик қаёқдан билади бирор айтмаса?

Зафар ўйланиб қолди.

— Чатоқ бўпти, Анвар ака.

— Нега? Нимага чатоқ бўлади?

— Турсун Фиёсович мендан кўради энди. Унинг усти-

га Усмон Қодировичнинг олдига чиққаним қўшилиб... Номим иғвогарга, думалоқ хат ёзувчига ўтади энди.

— Ташвиш тортманг, Зафаржон. Сиз бунақа иш қилмаслигингизни ҳамма билади-ку.

Зафар хаёлга ғарқ бўлди: «Ким айтган бўлиши мумкин? Ким? Ноилами? Эҳтимол, ўша хабар берган-дир. Директорнинг қалбаки ишларини у билармикан? Билса менга бу ҳақда сира гап очмаганди-ку. Ёки кейин эшитганмикки?»

Телефон жиринглади, Зафар хаёlinи йифиштириб олди.

— Бўпти, Анвар ака, мен кетдим бўлмаса. Ҳали по-ликлиникага ўтишим керак. Агар врач рухсат берса, эртага чиқаман ишга.

У баҳор нафаси уфуриб турган кўчадан шошилмай борар экан, мактабдаги бу ишлар ҳақида министрликка ким хабар берганини хаёлан излар, уни топишга ошиқарди.

XXI

Бутун атрофга табнат яшил гиламини ёйган. Зафарнинг назарида баҳор ҳаммага севинч, шодлик олиб келгани бундан фақат у бебаҳра қолгандай эди. Чунки у энг қадрдан суҳбатдошидан айрилганди. Ноила билан тил учидагина саломлашиб қўярдилар.

Ишга тушганига ҳам бир ҳафта бўлди. Ҳамон ўша ўша юзаки ҳол-аҳвол сўрашиш. Олдингидай узоқ-узоқ суҳбатлар, дардлашишлар йўқ, Зафар эса буни жуда қўймасайди. Усмон Қодировичнинг қабулида бўлгани, мактабга министрликдан комиссия келгани хусусида на Зафар, на Ноила сўз очди. Бу гаплардан Ноиланинг хабари борми-йўқми — Зафар буни ҳам билмайди. Шунинг учун унинг кайфияти ёмон, дили хуфтон. Ҳам-каслари, Санам бир неча марта бунинг сабабини сўраганида у бетобликка йўйди.

Бир куни (май байрами арафаси эди) Зафар Ноиланинг уйига бормоқчи бўлди. У дарсини тугатдию уйига келиб соқолини олди, сочини силлиқ ғараб кўчага чиқди. Ўёл-йўлакай магазинга кириб, Ноиланинг ўғлига у-бу нарса олди. Кечга томон тўрхалтани кўтариб Ноиланикига кириб борди. Ноила Зафарни кўриб, кўнгли бир хил бўлиб кетди.

— Келинг.

— Байрам билан табриқлаб кетай дедим,— Зафар парсаларни Ноилага узатди.

— Раҳмат. Бекор овора бўпсиз-да.

Зафар ичкарига киришини ҳам, кирмаслигини ҳам билмай қолди.

Ноила худди шуни сезгандай уни ичкарига таклиф қилди.

— Киринг уйга.

Зафар ўзига таниш, қадрдон уйга кирди. У диванга, Ноила эса рўпарадаги стулга ўтирди.

— Ишларингиз қалай, Зафар? Тузалиб кетдингизми?

— Раҳмат, тузукман. Ишлар ҳам ёмон эмас. Тўгарак машғулотларини давом эттиряпман. Мен бетоблигимда мактабга комиссия келибди.— Зафар министрликка сиз айтдингизми, деб сўраёлмади.

— Ха,— деди Ноила,— министрликдан комиссия келди. Бир иш билан Тошкентга борувдим, ўшанда Маориф министрлигига ишлайдиган ўртоғимни кўриб қолиб, ундан эшитувдим комиссия келишини. Лекин унчалик ишонмовдим. Министрликдан келиб текширадиган даражада нима гап бор экан бизнинг мактабимизда, деб ҳайрон бўлувдим. Бирор ёзиб берган бўлса керак-да.

Мактабдаги гаплар хусусида министрликка Ноила айтган, деган фикр тўғри эканлигига энди Зафарда шубҳа қолмаганди. «Уша ўртоғига ўзи айтган», деб ўйлади Зафар. Аммо буни Ноилага билдирмади, зоро ўзи айтмагандан сўнг кавлаштиришнинг нима кераги бор.

— Эҳтимол,— деди Зафар мужмал қилиб.— Турсун Фиёсовични касал дейишади. Ростмикин?

Ноила кинояли жилмайди.

— Сизам анои әмассиз-а, Зафар?— деди кулимсираб.— Ҳамма нарсани билиб туриб, ўзингизни билмаганга, гўлликка соласиз-а.

Зафар саволи ноўрин эканлигини, ҳамма гапдан Ноила бохабарлигини пайқадию хижолат бўлди. Лекин айтилган гап — отилган ўқ, деганларидек, гап милтиғининг тепкиси босилган, энди қайтариб олиш қийин эди.

Эшик қаттиқ тақиллади. Ноила бориб эшикни очди. Кийим-боши чанг, терлаб-пишган ўғли келди. Ноила-нинг юраги шувиллаб кетди.

— Яна бирпас ўйнамайсанми?— деди Ноила.

— Йўқ, қорним очди, овқат еб олай.— Бола шундай деб уйга кирди. Кирдию кўзи Зафарга тушди. Зафар кўришиш учун унга қўл узатди.

— Салом, полвон йигит.

Рашид Зафарга бир хўмрайиб қаради-да, онасининг қучоғига ўзини отди. Зафарнинг қўли узатилганча муаллақ қолди.

— Ойи,— дедп Рашид Зафарга тикилиб,— ойи, дадам келмадилами?

Бу гап Зафарга ҳам, Ноилага ҳам жуда қаттиқ таъсир қилди. Иккаласининг ҳам тили гўё қотиб қолганди. Зафар индамай ўрнидан турдию туфлисининг ипини ҳам боғламай зинадан югуриб тушиб кетди.

XXII

Умр оқар сувдай гап экан. Ана-мана дегунча ёз ҳам ўтиб, сентябрь эшик қоқди.

Мактабга келиб Зафарнинг биринчи учратгани Шоқосимов бўлди.

— Ҳа, ўртоқ Ҳакимов, — деди у Зафарга пешвоз чиқиб,— отпускалар яхши ўтдими? Қайси курортда дам олдилар?

— Раҳмат... Яхши,— деди Зафар гапни қисқа қилиб.
— Лекин, дўстим, бу ўқув йили сиз учун яхши келмади-ёв.

— Нега?— ҳайрон бўлди Зафар.

— Нега бўларди, Раҳимова мактабдан кетипти-ку!
Шоқосимовнинг бу гапидан Зафарнинг жаҳли чиқди.

Гарчи бу гапдан ўзининг хабари бўлса-да, биринчи кун, бунинг устига Шоқосимовдан бундай «хушхабар» эшиганидан кўнгли алланечук бўлиб кетди. Аммо сир бой бермасликка ҳаракат қилди. Ўзини бепарво тутиб:

— Кетса нима бўпти,— деди.

— Ҳа, энди... Айтдим-қўйдим-да...— деди Шоқосимов беўхшов тиржайиб.

— Ҳалиям эски бачканалигингиз қолмапти-да. Сут билан кирган, жон билан чиқаркан-да,— Зафар бошқа гапирмай йўлида давом этди. Аммо беш-олти қадам босиб тўхтади. Орқасига қайтиб Шоқосимовнинг олдига келди. Ичидан отилиб чиқаётган қаҳрини яширолмади.— Раҳимованинг кетгани ҳеч кимга на фойда, на зарар келтирмаса керак. Лекин Турсун Фиёсовичнинг директорликдан бўшагани ҳар ҳолда яхши бўлмапти. Энди у кишининг соясида юрганларни офтоб уриб, қуритиб қўймаса эди.

Шоқосимов йўғон лабларини пирпиратди. Нимадир демоқчи бўлди. Аммо Зафар гапининг жавобини кутмасдан жадал одимлар билан илгарилаб кетди. Унинг қаршисидан Санам келарди. Санамнинг устида чиройли сариқ атлас, оёғида оқ туфли, сочи жуда эҳтиёткорлик билан ғоят бежирим қилиб турмакланган.

— Салом, Зафар aka,— деди у қўл узатиб.

— Салом.

— Яхши дам олиб келдингизми, уйдагилар яхши юришиптими?

— Раҳмат. Ўзингиз қалайсиз, ойингиз тузукмилар?

— Раҳмат...

Зафар дарсини тугатдию Санамнинг олдига кирди.

Улар анчагача ҳар хил мавзуда суҳбатлашиб ўтиридинлар. Зафар қишлоқдаги янгиликлар, пахтанинг қандай сўлганлиги, мева-чеваларнинг сероблиги ҳақида тўлибтошиб гапирди. Санам эса: «Ўша ўзингиз билган ғалавонур шаҳар, ҳеч қаерга бормадим, ҳеч қанақа янгилик ҳам йўқ», деди.

— Ҳа, дарвоҷе, бугун ўқишга борсангиз керак-а?

— Бориб кўраман,— деди Санам.— Дарс бўладими-йўқми — билмадим.

— Тугаб қолдими ўзи ўқиш?

— Охирги курс бу йил.— Санам негадир қизариб ерга қаради.

— Жуда яхши,— деди Зафар.— Битириб олсангиз кутубхона билан хайрлашасиз-да,— Санам индамай елка қисди.— Бугун институтга бирга борамиз бўлмаса.

Санам ялт этиб Зафарга қаради.

— Нега?

— Ишим бор институтда. Бир ўртоғим билан учрашмоқчийдик... Ўша куни кечқурун улар биргаликда институтга боришли...

XXIII

Эшик қаттиқ тақијлади.

— Киринг,— деди Зафар.

Эшик қарс очилди-ю, Содиқнинг хумкалласи кўринди.

— Ие, ие, Содиқ! Қелсинлар, келсинлар, с приездом!

— Келдик,— деди Содиқ портфелини бир четга қўяркан.

Улар қучоқлашиб кўришдилар.

— Хўш,— деди Зафар,— қандай шамол учирди?

— Командировка. Министрликка учрашадиган бир иш чиқиб қолди.

- Келганингиз жуда яхши бўлди-да. Биласизми, бу-
гун менинг тугилган куним.
- Э, шунақами, табриклайман!
- Раҳмат, дўстим, раҳмат.
- Бўлмаса,— деди Содик,— сиз ишга борасизми?
- Ҳа.
- Ундаи бўлса, сиз ишга бориб келинг, мен ми-
нистрликка учрашиб кўрай, қани нима дейди. Кечқурун
бир ўтиришамиз.
- Албатта. Бир-инкита болаларни ҳам айтганман,
кечга томон келишади.
- Бу, менга қаранг, Зафаржон, фақат болаларми
ёки жононлардан ҳам келишадими?— деди Содик ку-
либ.
- Ҳеч шу одатингиз қолмади, қолмади-да, Содик.
- Ҳа, энди дунёning иши шу экан-да, нима қила-
миз.
- Улар чиқиб кетишди.
- Зафар дарсларини тугатиб кетаётган эди — Санам-
ни учратди.
- Табриклайман, Зафар ака,— деди Санам.
- Нима билан?
- Ахир бугун тугилган кунингиз-ку!
- Сиз қаёқдан биласиз?
- Биламан-да.
- Шунаقا денг...— Зафар бир зум ўйланиб қолди.
«Демак... Демак... У мени ростданам... Ҳатто туғилган
кунимгача билар экан-да...»— Раҳмат, катта раҳмат
сизга, Санамхон! Жудаям ҳушёр қиз экансиз.— Санам
индамай ерга қаради.— Агар вақтингиз бўлса, кечқу-
рун бизникига ўтинг... Ҳилола билан...— Ноилож қўшиб
қўйди Зафар.— Бирпас суҳбатлашиб ўтирамиз...
- ...Зафар уйга келиб у-бу нарсаларни тайёрлай бош-
лади. Ҳаял ўтмай Содик ҳам келди.
- Нима бўлди ишларингиз,— деб сўради Зафар.
- Ёмон эмас. Ваъда беришди, эртага битса керак.

Икковлашиб стол устини ноз-неъматлар билан яса-тишди.

Орадан кўп ўтмай Зафарнинг иккита ўртоғи келди. Улар билан иккита қиз ҳам бор эди.

Ҳовлида кимнингдир: «Зафар ака», деган овози эшитилди.

— Яна меҳмон.

Зафар югуриб чиқди. Остонада учта, ҳа, учтагина гул кўтариб Санам турарди.

— Келинг, келинг,— деди Зафар.

— Арзимаса ҳам,— гулни Зафарга тутди Санам.— Табриклийман!

— Раҳмат, минг раҳмат!

Зафар меҳмонларга Санамни, «бирга ишлаймиз», деб таништириди.

Санамга Содиқ танишдек туюлди. У қаерда кўрганини эслаб кетди. «Қаерда эди... қаерда... Ҳа, эсладим, бу ўша, худди ўзи, ҳуғ ўшандা безорилик қилган йигит шу. Зафар ака буни қаердан танир экан?»

Содиқ ҳам Санамни кўриши билан таниди. Танидию ичиди бир нарса шувиллаб кетди. «Бу Зафарнинг қизи экан-да, мен бўлсам... Э аҳмоқ... билганимда шундай қи-лармидим. Санам бўлган воқеани Зафарга айтса нима бўлади?.. Йўғ-е! Айтмас.... Унақа енгилтак қизларга ўх-шамайди-ку. Янаям билиб бўладими. Мол оласи сиртида, одам оласи ичиди дегандай... Аммо лекин Зафар ҳам чакана эмас, зап ажойибини топган экан-да...»

— Ҳа, Содиқ, нега сукут сақлаб қолдингиз? Қизиқ-қизиқ гаплардан гапириб ўтирангиз-чи, меҳмонлар зерикиб қолишди.

— Ҳаёл қизиқ нарса бўларкан-да, вақт-бе-вақт одамнинг фикрини олиб қочаверади.

— Ҳаёлни кейин биргалашиб сурамиз. Ҳозир Зафарга аталган тилакларингизни айтинг,— деди меҳмонлардан бири.

— Бўпти,— деди Содиқ,— дўстлар, мен шу қадаҳни

Зафар билан Санамхонларнинг бахти учун кутаришларингизни сўрайман.

Ҳамма «шундай бўлсин», деб қадаҳларни уриштиришди. Санам қизарib кетди, аммо ҳеч нарса демади. Зафар хам Санамга бир қараб қўйдию индамади.

Ўтириш анча вақтгача давом этди. Тўрда ўтирган жингалак сочли, қирғий бурун йигит гап қотди.

— Дўстим Зафар, энди бизга рухсат берсангиз.

— Ие, нега? Ҳали вақт эрта-ку.

— Иўқ, раҳмат, энди борайлик. Кеч бўп қолди,— деди унинг ёнида ўтирганчуваккина қиз.— Ие, қор ёғялти.

Ҳамма баравар дераза ёнига келди.

— Үҳӯ, лайлак қор-ку.

— Бу йил эрта тушдими қор?

— Ерлар оқариб қопти-ку.

Мехмонлар тарқалишди. Санам ҳам кетишга тараддуудланди. Зафар уни кузатиб қўймоқчи бўлди.

Улар кўчага чиқишганда қор тинмаганди. Биринчи қор бўлгани учун жуда хуш ёқар, одамнинг дилини яйратарди. Анчагача қорнинг айланиб ёғишини томоша қилиб жим кетишиди. Йўлаклар четидаги жонли тўсиқлар устига пахта тўқилгандай оппоқ. Ҳавонинг тозалиги, атрофнинг сукунати, унинг устига ичилгай озгина шампан Санамнинг юрагида болаликка хос шўхлик туйғуларини жўштирди. У бир сиқим қор олиб Зафарга отди.

— Қор бўрон ўйнаймизми?— Санам шундай деб Зафарга қор отиб қочди. Йигит ҳам чаққонлик билан бир ҳовуч қор олиб қизни қувлади.

— Ҳозир қорга белаб ташлайман,— деди Зафар кулиб.

— Етолсангиз агар...

Санамнинг шўхчан ҳазили Зафарнинг дилини ўйнатиб юборди. У югуриб Санамни ушлаб олди-да, оппоқ юзларига қор суро бошлади. Шунда унинг иссиқ нафа-

си Зафарнинг юзига урилди. Эти жимиirlаб кетди. У қор сепиши баҳонасида Санамни қучоқлади.

— Зафар ака...

Зафар ҳеч нарса демай уни қаттиқроқ қучди. Ўзига қаратди. Қорнинг ёруғида Санамнинг кўзлари ўтдек чақнаб кўринди. Қиз юзида йигитнинг иссиқ, ҳансира-ган нафасини сезди.

— Зафар ака... Нима қиляисиз... Қўйиб юборинг...— Санам шундай дерди-ю... аммо қаршилик кўрсатмас, кўрсатолмасди.— Ахир сиз... бошқани ..

— Санам!

Зафарнинг қўксидан отилиб чиққан бу нидодан икко-ви ҳам бирдан жим қотди. Фақат уларнинг кўзлари сўзлашарди.

Санам ўзини тутиб туролмади. Зафарнинг кўксига бошини қўйиб йиглаб юборди. У ўзини босолмас, ўпкаси тўлиб йиғларди. Зафар эса ихтиёrsиз равишда Санамнинг елкаларини, рўмоли остидан чиқиб турган, қорда нам бўлган соchlарини силарди...



ҚУЁШ МЕН ТОМОНДА

А Н О Р

Лопиллаб ёғаётган лайлак қор ҳали-бери тинадиганга ўхшамайди. Чошгоҳда куралган ҳовлини, томни, очилган йўлакларни яна қор кўмди. Шунга қарамай, ҳаво совуқ эмас.

Оёғини иссиқ сандалга тиқиб ётган Қаландарнинг икки кўзи дарчадан ташқарига қадалган. Бўралаб ёғаётган қор ғира-ширада чанг-тўзонга ўхшайди.

Бағдоди эшикнинг бир тавақаси очилиб, Жаннат хола кирди.

— Мунча ёғди-я, бу қор? Шу ёғиша эрталабгача одам бўйи бўлади,— деди кавушининг қорини остонаяга қоқар экан.— Қаландар, ухладингми?

Қаландар кўрпадан бошини сал чиқариб онасига қаради.

— Йўқ, эна. Нима?— деди.

— Қорди айтаман-да, болам, тинмаганини қара Вақт ҳам алламаҳал бўлиб қолди, отангдан дарак йўқ.

Эшак ўлгур нимжон, бирон жойда йиқилиб-нетиб, отангни сарсон қилган бўлмаса гўрга эди!

Қаландар кўрпани елкасигача туширди-да, каттадардай ёстиққа тирсаклади.

— Отам қаерга кетганлар ўзи?

Онаси камзулини ечиб, жойига кирав экан:

— Тегирмонбошига. Бирорда ишим бор, тез қайтаман, деб кетувди. Билмадим, нимага бунча ҳаяллади,— деди.

— Ҳа-а,— деди Қаландар.— Акам-чи? Акам қаёққа кетди?

— Қодир Хадича аммангникига кетди. Поччанг ўзини билмай ётганниш. «Қичкина болалар билан бир ўзим қўрқаман. Қодир чиқиб ётсин», деб юборибди амманг.

Аммаси — отасининг синглиси, беш-үн ҳовли нарида туради. Жуда қўрқоқ, эри тўйгами, улфатчиликками чиқса ҳам «болаларингиздан биронтаси келсин», деб янгасига одам юборади. Бир-икки марта Қаландар ҳам бориб ётган. Аммо аммаси уни кўп хушламайди. Буннинг сабабини Қаландар ўзича тушунади.

Болалигида Қаландарнинг ғалати одатлари бор эди. Онаси бўйнига осилиб фалончиникига олиб бор, пистончиникига кетдик, деб буйруқ берар эди. Жуда кўнгилчан, болалари раъйини қайтариб ўрганмаган онаси индамай Қаландар айтган жойга кетаверар эди.

Кузнинг қуёшли кунлари эди. Жаннат хола офтоб-рўяга пўстакчани солиб, тикиш қилиб ўтирап эди. Югуриб келган Қаландар онаси бўйнига осилди-да: «Аммамга», деди. Она бечора ўзи ҳам зерикиб ўтирган эканми ё ўғлини кўнглини қолдиргиси келмадими — ҳар қалай, индамай ўринидан турди. Қаландарни опичлаб, қайнинглисиникига йўл олди.

Хадича дастурхон ёзди, чой қўйди. Қаландар токчада тахланиб турган чойнак-пиёлаларни томоша қила бошлади. Қип-қизил гули лоладай яшиаб турган ҳумчойнакни даст кўтариб, онаси қаради-да: «Синдира...»,

деди. Жаннат хола «ҳай-ҳай» деб ўрнидан тургунча қўлидаги чойнакни токчадаги идишларга қарсиллатиб урди. Иккита чойнак, уч-тўртта пиёла чил-чил синди. Жаннат хола бечора жуда мулзам бўлди. Ўғлини койни, чаккасига бир шапалоқ урди. «Хафа бўлманг, аммаси, акангизга айтаман, янгисини олиб берадилар», деб қайнинглисига тасалли берган бўлди. Қайнинглиси ичидан зил кетган бўлса-да, сир бой бермади.

— Ҳа, майли, янга, бола-да ҳали. Катта бўлса жиянимнинг ўзи бундан ҳам яхшиларидан олиб беради аммасига,— деди чойнак-пиёлаларнинг синифини тераркан.

Қаландар шапалоқ тушган чап юзини ушлаганча, «Олиб бериб бўпман», дегандай бурчакда хўмрайиб турар эди. Шундан кейин дастурхонга совуққина фотиҳа ўқилди. Жаннат хола: «Бориб туриңг, аммаси», деб ўрнидан турди.

Жаннат холанинг қайнинглисисиникига охириги бориши эмас эди. Бундай воқеалар бир неча марта бўлди. Қанча пиёлаю чойнак, косаю лаганлар чил-чил синди. Охири аммаси Қаландарга қаттиқ дашном берди, лекин булар унга зифирча таъсир қилмас, аксинча, Хадича аммасининг жиғига кўпроқ тегар эди.

Булар ҳам майли-ю, бир куни жуда ёмон бўлди. Қаландар аммасининг ҳовлисида ўйнаб юрган эди. Товуқлар ҳам бир ярасин, деб аммаси катакни очди. Ўнтача товуқ қақағлаб, йиллаб қамоқда ётган бандилардай уй орқасидаги чорбоққа югурди. Қаландар товуқларнинг орқасидан чопди. Ўртада кетаётган катта қизил хўрозга унинг жуда ҳаваси келди. Хўроз у ён-бу ёнга дадил қарап, салобат билан қу-қулар, юришлари жуда мафрур эди. Унинг қизил патлари офтобда чўйдай товланар, ўроқдай эгилган думи турли рангда жилоланаар эди. Қаландар уни кузатиб турди. Бирдан хўрозни ушлагиси, рангдор патларини силагиси келди. Чорбоғни айлантириб роса қувди, аммо ушлаёлмади. Охири Қаландар

чарчади, ўпкаси оғзига тиқилгудай ҳарсиллар, базўр нафас олар эди. Хўроз эса бостирмаға чиқиб, «қўлингдан нима келди?» дегандек Қаландарга қараб овозини барала қўйиб қичқирди. Унинг бу қилиғи Қаландарга жуда таъсир қилди. «Шу битта хўрозга калака бўла-манми?» деб ўйлади. «Шошмай тур, ҳозир кўрсатиб қўяман сенга». У муштидай бир тошни олиб хўрозга ўқталди. «Оёғини мўлжаллаб урсам, чополмай қолади, кейин ушлаб оламан». Қаландар қўлидаги тошни жаҳл билан хўрозга отди. Бошини мағур кўтариб, атрофга аланглаб турган хўроз бир қағ дедию бостирмадан пастга қулаб тушди. Қанотини бир-икки силкиди-да, оёқларини чўзиб жим бўлиб қолди. «Қўлга тушмас экансан-а! Бопладимми?» Қаландар хўрозни аста ердан кўтарди. Унинг мўлжали нотўғри кетган, тош хўрознинг оёғига эмас, бошига теккан, у кўзларини олайтириб чўзилиб ётарди. Қаландар нима қиласини билмай турувди, бостирмадан ўтии олмоқчи бўлиб келаётган аммасига кўзи тушди. Юраги қинидан чиқиб кетаёзди. Ҳозир бобиллаб беринини сездию ўлик хўрозни бир чеккага улоқтириб, ўзи шаталоқ отиб қочди. Шошганда лаббай топилмас, дегандай ҳовлиққанидан хўрозни аммасига қараб отган эди. Оёғи остига бир нарса шалоп этиб тушганидан чўчиб кетган Хадича эс-хушини йигиб олиб қараса, катта қизил хўрози ўлиб ётиби.

— Вой-дод! Бу зумрашанинг дастидан на чойнак-пиёлам, на коса-товоғим, на хўрозим қолди! Вой-дод! Узингдан чиқсан балога қайга борай давога?!

У хўроз ўлигини кўтариб, Қаландарнинг орқасидан ютурди. Аммаси қувиб келаётганини кўрган Қаландар уйға кирмай, катта кўчага қараб қочди.

Ўшанда Хадича ўлик хўрозни янгасининг олдига ирғитиб, хўп жавраган, Қаландарнингиз бундан буён ҳовлимга қадам босса оёғини уриб синдираман, деб пўписа қилиб кетган эди...

Ана шу қилиқлари учун аммаси уни унча хушламас

эди. Бўйи чўзилиб, эсини танигач, бу одатларини ташлади, анча мулойимлашиб қолди. Лекин аммаси унга сира ишонмас, акаси билан янгасига гоҳ ҳазил, гоҳ чин қилиб: «Бунингиздан одам чиқмайди. Ё ўғри, ё каззоб бўлади», деб қўяр эди...

Қаландар ҳозир шуларни эслаб, ўзича кулиб қўйди. «Бечора аммам. Кўп ғашига тегдим-да шўрликни... Поччамга нима қилди экан? Анчадан бери ётипти...»

— Қаландар, ухламадингми, болам? Индамай қолдинг,— деди онаси.

— Йўқ,— деди Қаландар.— Узим, шунчаки хаёл сурисиб ётибман.

Ҳовлида қорни гарч-фурч босган оёқ товуши, кимнингдир «их-их» деган овози эшитилди.

— Отам келдилар чоги,— деди Қаландар деразадан ташқарига мўралаб.— Ҳа, ана, оғилга ўтиб кетдилар.

Жаннат хола ўрнидан туриб камзулини кийди. Пасайтириб қўйган чироқ пилигини кўтарди.

— Хайрият-эй, эсон-омон келдилар.

Шодиёр бобонинг оёқ товуши эшитилди. Жаннат хола эшикни очди.

— Келдингизми? Үлдим хавотир олиб! Мунча кеч қолдингиз?

— Ҳа, тутилиб қолдим. Устига-устак қорни қара, эшак базўр юрди, жуда қийнаб юборди-да. Болалар ухладими?

— Қаландар уйғоқ. Чакмонингиз қани?

Шодиёр бобо тўнини ечиб, хотинига узатди:

— Оғилга ечиб қўйдим.

— Оғилга?— деб ҳайрон бўлди Жаннат хола.— Нимага ундаи қилдингиз?

Шодиёр бобо бировнинг сўровига «ҳа» ё «йўқ» деб қисқа жавоб беришга ўрганган. Шунданми, эзма одамларни унча ёқтирмайди. Ҳозир ҳам хотинининг бу гапидан ғаши келди. «Ўзи не азобда келсаму бунинг эзмалик қилишини қара!»

— Ҳа, оғилга! Бўлдими?

Жаннат хола:

— Чой ичасизми? — деди астагина.

— Майли, дамлаб кел, бир пиёла иссиқ чой ичай.

Сал баданимга илиқ югурсин... Робияникига кирувдим...

— Яхши қипсиз, қандай, тузукми? Күёвингиз, қудалар саломат эканми?

— Сўраворди.

— Нима бало, Робиянинг дараги бўлмай кетди, ҳеч келай демайди...

Шодиёр бобо сандалга оёғини узатиб, ёстиққа ёнбошлади.

— Рўзгор-тирикчилик... Бу қишли-қировли кунда келиб-кетиш ҳазилми? Хадичаникидан хабар борми? Күёвинг сиҳати яхшимикан?

— Боя Эшпўлат келувди, Қодирни эргаштириб кетди.

Шодиёр бобо хавотир билан сўради:

— Нима, оғирлашиб қоптими?

— Йўқ. Энаси юборган экан, кечаси қўрқаман, Қодир келиб ётсин, депти.

— Ишқилиб ўзи шифо берсин-да,— деди Шодиёр бобо.— Табиб-пабибга кўрсатай деса — қўли калталиқ қиласди.

— Домиллага ўқиттириди-я.

— Икки-учта домиллага ўқиттириди. Бирон наф бўлмади. Қайтанга эшигидаги сигирдан айрилгани қолди.— Шодиёр бобо пиёлани хотинига узатар экан, ачиниш ила деди:— Бу домиллаларга ҳам хайронман. Тўрт марта куф-суф дейдию битта қўй сўрайди. Тавба қилдим, шуларнинг инсофу диёнатига ҳам ишонгинг келмайди.

Жаннат хола чуқур хўрсинди, сўнг дастурхонни йиғишитирди. Шодиёр бобо маҳсисини ечаркан:

— Жой сол, Қодир¹, жуда толиқиб кетдим,— деди.

¹ У хотинии ўғлининг номи билан чакирап эди.

Қаландар индамай ётар, у ҳам отаси чакмонини нима учун оғилхонага ечиб келганига ҳайрон эди. Шодиёр бобо бир жойдан келса, одатда дарвозадан кириши билан: «Қодир! Қаландар! Эшакка қаранглар!» деб бақиради. Бугун индамади. «Демак, бир гап бор. Отам нимадир олиб келган. Кўпинча бирон тансиқроқ нарса олиб келса шундай қиласди...» Унинг очқаганидан қорни қулдираб кетди. Оқшом ичгани бир коса атала-нинг кучи қанчага ётар эди? Лекин бошқа нима илож бор? Бирорларнинг уйида шу атала ҳам йўқ-ку. Ҳозир Қаландарнинг нимадир егиси келди. Бироқ нима ейди? Қамбағалнинг боласи сабр-қаноатли, чидамли бўлади. Ойда еган тўқ, кунда еган сук, дегани шудир-да.

Жаннат хола жой солиб бўлгач, лампанинг тепасидан пуфлаб ўчирди. Уй зимистон бўлди-қолди. Қаландар миқ этмас, ота-онасининг ухлашини пойлар эди. «Улар ухлаб қолишса, секин оғилни бориб кўраман. Қани, отам нима олиб келди экан!» У анча ётди. Отаси пиш-пиш қиласди. «Ухлади шекилли!»

Қаландар аста ўрнидан турди. Елкасига чопонини ташлаб, оёғига калиш илганча ташқарига чиқди. Жаннат хола буни сезди, аммо «ҳожатга чиқаётгандир-да», деган хаёл билан бир сўз демади.

Қаландар оғилга кирди-да, пайпаслаб отасининг чакмонини топди. Устунга осиб қўйган экан. Чакмонинг қўйин киссасини кавлади: ҳеч нарса йўқ. Иккинчисини кўрди: қаттиқ бир нарса қўлига тегди. Сесканиб кетди. Олиб у ёқ-буёгини пайпаслаб кўрди! Анор! «Яна бормикан?» Чакмон киссаларини титкилади — бошқа йўқ. «Биттагина анорни қаердан олдилар экан? Нима қиласдилар буни?.. Есаммикан? Кейин, эртага уришслар-чи?.. Ие, мен еганимни қаердан билиб ўтириптилар. Бари бир эртага ўзлари берадилар шуни. Ҳаммамизга бир тишламдан тегади. У нима бўларди. Ундан кўра бир шаҳар обод бўлсин. Эртага ҳеч нима кўрмагандай бўлиб ўтираман. Туя кўрдингми — йўқ. Вассалом».

Қаландар анорни шу ерда емоқчи бўлди. Бир-икки тишлиб, анорнинг пўстини артишга тутинди. Бироқ оғил совуқ эди, бунинг устига енгил кийинган. «Яхшиси, уйга кираман. Ҳамма ухлаб ётибди. Кўрпага кираману аста-секин ейман».

Уйга кириши билан «Қалаидар», деган овоз қулогига чалинди. Юраги шув этиб кетди. «Билган бўлса-я»— Қўлидан анорнинг тушиб кетишига сал қолди.

— Ҳа, Қаландар, мунча ҳаялладинг?— деди онаси.

Қаландар худди онаси кўриб қоладигандай анорни қўйнига тиқди. Онасининг гапига дарҳол жавоб топди:

— Қорним оғрияпти,— деди аста товуш билан.

— Үралиб ёт, босилиб қолади. Совқотгандирсан.

Қаландар индамай жойига кирди. Анорни ейин деса — онаси уйғоқ, емай деса — нафси қўймаяпти. Ахир гупиллатиб қор уриб турган қиши чилласида анор ейишнинг гаштига нима етсин!.. Анорни қучоқлаб, индамай ётди. Назарида онаси ухлагандай туюлди. Таваккал дедиу анорни гарчча тишилди.

— Қаландар?— деди онаси.

«Ҳали ухламаган экан-да».

— Қорним оғрияпти,— деди Қаландар,— қулдира-япти.

— Совқотяпсанми?

— Ҳа,— деди у.

— Ке бўлмаса ёнимга.

Қаландарнинг назарида ранги оқариб кетгандай бўлди. Бир зум гангид қолди.

— Йўқ, жойим яхши, ҳозир исиб қоламан. Ташқарига чиққанимга совқотдим-да,— деди ўзини қўлга олиб.

Иккови ҳам жим қолди. Бир чойнак чой ичгунча вақт ўтар-ўтмас Қаландар анорни яна бир тишилди. Жаннат хола ҳамон уйғоқ экан.

— Яна оғрияптими, Қаландар?

«Оббо,— дея ўйлади у,— нима бўлди энамга узи, мунча ухлаши қийин?»

— Ҳа,— деди астагина.— Устимга яна битта кўрпа ёпиб қўйинг. Иссикроқ бўлсин.

Жаннат хола тахмондан кўрпа олиб, Қаландарнинг устига ёди.— Бошларингни ҳам ўраб ётгин, исиб қоласан,— деди меҳрибонлик билан.

Қаландар бир оз сабр қилди-да, сўнгра анор ейишда давом этди. Энди Жаннат хола индамади. У гўё ухлаб қолган, ё анорнинг гарчиллаши икки қават кўрпадан эшитилмасди. Қаландар анорни еб, тамомлади. «Пўчоғини нима қилсам экан?.. Топдим, ташқарига олиб чиқиб ташлайман. Қорнинг остида қолиб кетади. Энам билиб қолса, яна қорним оғриди дейман». У аста ўрнидан турди, чопонини кийди. Эшикни иложи бори-ча фийқиллатмай очди. Совуқда узоқроққа боришга эринди-да, пўчоқни уйнинг орқасига улоқтириди...

Шодиёр бобо оғилга кириб молларга хашак солди. Устунда осиглиқ чакмонини олиб, киссасига қўл солди: анор йўқ! Ҳайрон бўлди. «Қим олиши мумкин? Ёки йўлда тушириб қўйдимми? Йўғ-э! Оғилга кириб, чакмонни ечганимда кўрувдим — турувди». Ғазаби қайнади. Сандалга чўғ солиши учун ўчоққа ўт қалаётган Жаннат холага яқин келди.

— Анорди ким олди?

Томдан тараша тушгандай берилған бу саволдан Жаннат хола каловлавб қолди.

— Анорди? Қайси анор?

— Чакмонди киссасида эди,— деди Шодиёр бобо жаҳл билан.— Кеча Тегирмонбошидан олиб келувдим. Аnavи куёв шўрлик неча кундан бери туз тотмай ётипти. Шунга олувдим бирордан сўраб. Оғзига ёқармикан, деб ўйловдим.

— Билмадим... Билмадим... Энди сиздан эшитяпман буни.

— Билмайсан!— деди Шодиёр бобо баттар тутоқиб.

— Шу Қаландаринг бир бало қилган.

Эрининг жаҳли чиққанидан юрак ҳовучлаб турған Жаннат хола базўр юрак ютиб, деди:

— Қўйсангиз-чи, қаёқдаги гапларни гапирасиз-а. Бечора болам кечаси билан ташқарига зир қатнаб чиқди. Қорни оғрипти. Ҳозир ҳам туролмай ётипти.

Шодиёр бобо ўзича гудранди: «Бир нарса жойида турмайди-я. Қанақа бола ўзи булар?..»

У деворга суюнган куракни олиб йўлакларни курай бошлади. Ҳовлиниң икки-уч қулоч жойини қордан тозалади. Кейин уйнинг ёнини, орқа томондан бостиrmага борадиган йўлакни очди. Важоҳат билан қор куар экан, қор ичида бир-иккита сарғиш-пушти нарса кўзига чалинди. Курак билан титкилаб қараса, анор пўчоги. Лоп этиб ҳаёлига хотини айтган гап тушди: «Қорни оғрипти. Ташқарига зир қатнаб чиқди...»

Шодиёр бобо куракни қор уюмига тиқдию ошхонага кирди.

— Менга қара, Қаландар кечаси билан ташқарига зир қатнаб чиқди, қорни оғрипти, дедингми?

— Ҳа,— деди Жаннат хола эрининг яна қайтиб келганидан ҳайрон бўлиб.— Нимайди?

— Буннингни ҳийласи кўп. Шу бир бало қилган. Катта ойна қани? Менга топиб бер!

— Ойнани нима қиласиз шу топда?

— Пишириб ейман! Бунча чайналдинг, топ дегандан кейин топ-да.

Жаннат хола индамай кичкина уйга кириб кетди-да, зум ўтмай, чинни товоқдай келадиган ойнани кўтариб чиқди. Шодиёр бобо ойнани олиб, Қаландар ётган уйга кириб кетди. Жаннат хола унинг орқасидан эргашди. Шодиёр бобо Қаландарнинг тепасига борди. Кўрпани кўтариб, унинг юзига термилди. Кейин ойнани ўғлиниң юзига рўпара қилди-да бақирди:

— Вой болам,вой болам! Болам-эй, болам-эй...

Бу овоздан Қаландар чўчиб уйғонди. Иргиб турмоқчи эди, бўлмади — пешонаси бир нарсага қарс этиб урилди. Тепасида катта ойнани кўрди. Аввалига Қалан-

дар ажабланди. Отаси нега бундай қилаётганига ҳайрон бўлди. Шодиёр бобо ҳамон додлар эди:

— Вой болам,вой болам...

Қаландар ойнада ўзини кўрди. Лаблари, оғзининг атрофлари қизил. Бу анорнинг доғи эди. Шунда у отасининг нима учун бунаقا қилаётганига тушунди.

Шодиёр бобо ўғлига қарамас, ўзича дод солар эди:

— Нафсигинангга ўт тушкур. Қасал одамга олиб келувдим-а, касалга. Шу бир дона анорни деб қанча одамга эландим-а кеча... Бу бўйнинг сингур қуритиби-қўйибди. Вой болам,вой бола-а-м!..— Қаландар нафси бузуқлик қилиб, бемаъни ишга қўл урганини чин дилдан туйди. Лекин энди бўлар иш бўлган, фишт қолиндан кўчган эди. У ҳозир отасидан ялиниб-ёлвориб узр сўрашга, бундан кейин мутлақо бунаقا ножӯя ишлар қилмаслик учун сўз беришга, қасам ичишга тайёр эди. Бироқ у отасининг феълини яхши билади. На ялиниб-ёлворишилар, на узр сўрашлар Шодиёр бобонинг ўткир газабини юмшатолмайди. Яххиси, индамагани маъқул: ўзи ўчади...

Ҳозир отасига Қаландарнинг раҳми келди. Унинг одамгарчилигига, совуқ демай, қор демай бемор учун малҳам бўларми, деб узоқ қишлоққа анор сўраб боргани, қишининг қирчилламасида анор топиб келгани учун отасига қойил қолди, ҳаваси келди. Гарчи отаси ҳозир унинг гаи-сўzlарига қулоқ солмаса-да, ўзича, дилида отасидай одамларга меҳрибон, ғамхўр бўлишга онт ичди. Унинг кўзлари отасига жавдираб термилар, бироқ қалби унсиз ҳайқирап эди.

Қаландар бир ҳафтача отасининг юзига қарай олмай юрди. Бора-бора отаси бу воқеани кулиб эслайдиган, ҳар замон-ҳар замонда, кези келганда: «Ҳа Қаландар, қорнинг оғрияптими?» деб ҳазиллашадиган бўлди. Лекин ана шу ҳазил ҳам унинг бўйнини хам қилиб қўяр эди...

КОРОВУЛ

Тўй бўлади, деган гапни эшитса Қаландарнинг авзойи бузилади. Тутун чиққан жойдан қолмайдиган Хадича аммаси эрига эргашиб тўй тўйлайди. Қаландар эса уларникига бориб, туни бўйи қоровуллик қиласди. «Хотин деган ҳадеб тўйга чопавермаса-да», деб ўйлар эди Қаландар,

Қаландар бир нарсага ҳеч тушунмайди. Қайси қариндошининг болалари ёлғиз қолса — уларга қарагани албатта Қаландар бориши керак. Кошки унинг бунга хоҳиши бўлса. Шуни деб ота-онасидан бир неча марта гап ҳам эшитган: «Сени одам деб келган амманг бечора! Бир кеча бориб ётсанг беклигингдан тушиб қолмайсан! Ё аммангнинг уйида илон кўрганмисан, жувонмарг! Катта одам бўлиб, қоровулликка яраб қоссану ўзингни бозорга соляпсанми. Эрта-индин болаларининг бўйи етиб қолар, бир умр сенга эланиб юрмас ахир...»

Қаландар бу гаплардан баъзан хафа бўлса, гоҳида парво қилмайди: «Энамнинг ҳар доимги матали-да. Аммамнинг юриши кўп бўлса, нима, мен унинг навчасиманми»¹.

Бугун ҳам эрталабдан ана шу «куй» чалинди. Ноңушта маҳали Жаннат хола Қаландарга:

— Қаландаржон, бугун амманг Терсакка тўйга бормоқчи экан...— деди.

Қаландар онасининг мақсадини тушунди:

— Уйига бориб ётмайман.

Аввалига онаси ҳам, отаси билан акаси ҳам кулиб юборди. Лекин зумрашадай ўғлининг гапини лоақал охиригача эшитмай, сўзини бўлгани Жаннат холага алам қилди.

— Нимага бормайсан? Сени бирор еб қўядими?

¹ Навча — хизматкор.

Қаландар жуда шўх-шаддод бўлиб ўсди. Онаси ҳам кўп-да, унинг раъйини қайтартмади. Отаси эса: «Майли, катта бўлиб, эси кириб қолар», дер эди. Аммо биповни-кида ётиб қолишни сира хуш кўрмайди. Болалигидаги ҳам онаси билан бирон жойга меҳмонга борса ётиб қолмас эди. Эсида: етти-саккиз ўшларда эди. Эрта баҳор кунлари онаси тоғ оралигидаги Қўзичи деган қишлоққа — бемор тоғасини кўргани борди. Ўйнаб келади, деб Қаландарни ҳам эргаштириди.

Қаландар кечгача қўни-қўшнининг болалари билан ўйнади. Оқшом тушгач, онасининг ёнига келиб, «кетамиз», деди. «Кеч бўлди энди, қандай кетамиз», деди Жаннат хола. Қаландар сўзида туриб олди. Онаси уришди, аллади, урди — фойдаси бўлмади. У йиғлар, фақат бир сўзини тақрорлар эди: «Кетамиз!» Ташқаридаги ёмғир пақирлаб қуяр, атроф зимистон эди. Уй эгалари ҳам кўп тавалло қилишди — бўлмади. Қаландар сўзидан қайтмади.

— Майли, болани кўп қийнаманглар,— деди Жаннат холага хаста тоғаси.— Бир томондан ўғил боланинг шундай бир сўзли бўлгани маъқул. Мен тузукман, худога шукур, бораверинглар.— Чол катта ўғлини чақириб тайинлади.— Тўриқ отни эгарла. Устингга босма чакмонни кий. Буларни кўйиб кел. Жаннат ҳам биронта чакмон ёпинсин. Қаландарни яхшилаб ўраб олинглар. Нам ўтмаса бўлди. Отга ҳеч нарса эмас. Нима, Булоқбоши қочиб кетибдими? Ана-мана дегунча бориб келасан. Тўрт чақирим жой-да. Қичаброқ ҳайда...

Ёмғир тинмай қуяётган зимистон кечада Қўзичидан Булоқбошига келгунча Жаннат холанинг лабларига учук тошиб кетган эди. Айниқса, қабристонлар ёнидан ўтаётганда юрагини баттар ваҳима босар, ҳозир қандайдир маҳлуқ келиб, уларни оғ-поти билан мажақлаб ташлайдигандай туюлар эди...

Онасининг авзойини кўриб Қаландар ўз қилиғидан ўзи ранжиди, бироқ нима қилсан? Бегона жойда ётиб

қолишни ёқтирмайди. Нега? Сабабини ўзи ҳам аниқ билмайди.

Қаландарнинг индамай қолганини онаси «сукут — аломати ризо» деб тушунди.

— Айланай ўзимнинг супра қулогимдан.

Қаландарнинг қулоғи катта. Жаннат хола уни эркалаганда шунга шама қилиб, «супра қулоқ ўғлим», дер эди. Она ўғлини шундай эркаладими, жаҳлидан тушар, буни Қаландар ҳам билар эди. Ҳозир ҳам бу сўзни эшитиб Қаландар: «Энам жаҳлидан тушди», деб ўйлади-да, ўзини бирмунча эркин тута бошлади.

— Шу совуқда тўйга бормаса нима қилади? Поччам борса бўлди-да, уйида ўтирсин болаларига қараб!

Шу пайтгача индамай чой ичиб ўтирган онаси гапга аралашди:

— Хўп, ўғлим,— деди у пиёлани шахд билан сандалга қўйиб,— айтамиз аммангга, бундан кейин бирон жойга бормоқчи бўлса, келиб сиздан маслаҳат олади. Агар сиз ижозат берсангиз боради, йўқса — йўқ!

Отасининг бу гапи Қаландарга онасининг қарғашидан ҳам қаттиқроқ таъсир қилди. Шодиёр бобо сизлаб гапира бошладими — тамом, қаттиқ жаҳли чиққан бўлади. Буни болалари ҳам билади.

Хонага оғир жимлик чўқди. Қаландар шол дастурхон попугини ўйнаб ўтирас, бошини кўтаролмас, ҳеч кимнинг юзига қарай олмас эди. Шодиёр бобо «и-ҳм» деб томоқ қирди. Бу — гап тамом, дегани эди.

...Қаландар кечгача ўйлаб юрди: «Нима қилсам экан? Бормасам бўлмайди. Борай десам...— Калласига ажойиб фикр келгандай Қаландар хурсанд бўлиб кетди.— Шошма! Шундай қилганига кечаси болаларини бир қўрқитайми? Ота-онасига айтса айтар. Зўр бўлса қоровулликка бошқа чақирмай қўя қолар. Баҳонада шу машмашадан қутулиб оламан. Айниқса, анави лапашанг Эшпўлати ўлгудай қўрқоқ. Ёзда чигиртканинг чи-

риллашидан ҳам қўрқади. Ҳозир-ку — қиши, нима кўнга — ваҳима гап кўп».

Кечқурун у наридан-бери овқатландиую отланада бошлиди.

— Мунча шошмасанг? — деди Жаннат хола ҳайрон бўлиб. Одатда Қаландар бирон жойга боришга қўнса ҳам ҳадеганда туравермас, онаси: «Бунинг суюги гап билан қотган, уч-тўрт қарғиши эшитмаса кўнгли жойига тушмайди», деб таъна-дашном бергандан сўнг ноилож қўзгалар эди. — Чой-пойингни ичиб ол, борарсан...

Қаландар онасининг гапига эътибор бермай чопонини, телпагини кийди.

— Борайлик эртароқ, жонажон аммамизнинг эркаторйларини бўри еб кетмасин яна.

— Нафасингни иссиқ қил! — деди Жаннат хола жаҳл билан. — Бунча совуқ гапирасан! — Сўнг ўзига-ўзи: — Кимга ўхшади ўзи бу ер юткур! Авломизда бунақа капассассиқ одам йўқ эди-ку, — деди.

Қаландар индамай чиқиб кетди.

Эрталабдан бери шарқдан эсаётган шамол анча зўрайган, қор олиб келар эди. Совуқ одамнинг юзларини ачиштирап, шамол эса аъзойи бадани зирқиратар эди. Аммасининг уйи юқори тарафда бўлгани учун Қаландар шамолга қарама-қарши борарди. Шамолнинг қаттиқлигидан қадами унмас, бошини эгиб олган, ҳатто нафас олиши ҳам қийин эди.

Бу йил баҳор келса Қаландар ўн тўртга қадам қўяди. Аммо у ёшига нисбатан анча бўлали, юришлари, гапиришлари ҳам бир қадар салобатли эди. Танимаган одам унга камида ўн беш-ўн олти ёш берар эди.

У чопонини енгларини бир-бирига тиқиб, кучли шамол зарбини енгиб, катталардай йирик-йирик қадам ташлаб борар эди...

Икки укаси билан сандалнинг бурчагида кўрпачага бурканиб ўтирган Эшпўлат дарвоза тақиллаганини эшитиб чўчиб тушди. «Ким келди экан?.. Энамга айт-

дим-а, Қаландар тоғам келмай, кетманг, деб...» Дарвоза баттар тақиллади. Эшпўлат на бориб очишини билади, на индамай ўтиришини. Дарвоза забтига олиб тақиллайвергач, эшикдан бошини чиқариб мўралади.

— Эшпўлат, ҳо Эшпўлат...

Эшпўлат таниди — Қаландарнинг овози. Танидию баданига қон юргургандай бўлди.

— Қаландар тоғам келди,— деди укаларига қараб.— Мен бориб дарвозани очай.

Сандалга оёғини тиқиб, майиз еб ўтирган укалари унинг гапидан сапчиб турди-да, иккови бараварнига қичқириб юборишид:

— Қаландар тоғам келдилар, Қаландар тоғам келдилар...

Эшпўлат дарвозани очди. Қаландар ичкарига кираркан, жиянига важоҳат билан тикилди:

— Нима, ухлаб қолдингми? Сенларни қўриқлаш учун шу бўронда базўр келсаму сен дарвозани очмасанг. Бўлмаса ўзларинг ётаверинглар, мен овора бўлиб нима қиласман. Энангга айтиб қўй шуни.

Қаландар шундай деб изига қайтмоқчи бўлди. Бундан қўрқиб кетган Эшпўлат ялина бошлади:

— Жон тоға, кетманг. Шамол билан тақиллатганингизни эшитмай қопмаи. Жон тоға, кетманг?..

— Аҳволимни кўрдингми?— деди Қаландар телпагининг муз бўлиб қолган жунларини кўрсатиб.— Сен бўлсанг иссиққина сандалда роҳат қилиб ётибсан... Майли, бугун қоламан. Лекин билиб қўй, бундан кейин отаонанг бирон жойга кетса сираям келмайман.

Қаландар уйга кириб чопонини, телпагини ечди-да, ўзини сандалга урди. Совуқдан келгани учунми, сандалнинг иссиғи унча билинмади.

— Қачон келсам сандалларинг эски ўчоқдай музлаб ётади. Шунча ўтинни нима қиласизлар? Қишнинг чилласида ёқиб сандалга солсанглар бўлмайдими? Отанг

энангдан, энанг отангдан хасис. Ўзининг болаларидан ҳам қизғанади ўтинни.

— Иссик-ку,— деди Эшпўлат бурнини тортиб.— У Қаландарга қарши гапиришдан қўрқарди. У-бу десам кетиб қолиши мумкин, деб ўйлар эди.

Қаландар қўлларини ҳам сандалга тиқиб, кўрпани қўкрагигача кўтарди:

— Қорни оч одамга так-так ўтдан қилинган нон ҳам буғдой нондай кўринар эмиш. Иссик сандал кўрмаган сен бечорага манави нимфирма ўчоқ ҳам иссиқ кўрина-веради-да. Бизларнига бир бор — сандал қанақа бў-лишини кўрасан. Шунинг учун уйларингга одамнинг оёғи тортмайди.

Қаландар уйга синчиклаб разм солди. Тўрга шолча тўшалган. Сандал атрофига эски-туски, энасининг айтишича, «аҳмоқ кўрпачалар» солинган. Етти болорли, вассажуфт уй. Токчаларда сопол идиш-товоқлар, тавадонда эса икки-учта чинни коса, чойнак-пиёла. Юқоридаги катта тахмонда эски сандиқ. Қаландарнинг хаёли оғди: «Сандиқда нима бор экан?»

— Менга қара, Эшпўлат, сандиқларингда нима бор?

Эшпўлат аввал бурнини тортди, кейин Қаландарга юзланди.

— Билмайман.

— Нимага билмайсан? Қалити қаерда, ол-чи, очиб кўрамиз.

Эшпўлатнинг юраги така-пука бўлиб кетди. Қалитнинг қаердалигини билмайди. Аммо, шундай деса, Қаландар ишонмайди, алдаяпсан деб кетиб қолиши мумкин.

— Билмайман қаердалигини.

Қаландар ўрнидан туриб бир нарса қидираётгандай токчаларни кўздан кечира бошлади.

— Сен нимани биласан ўзи? Уни сўраса — билмайсан, буни сўраса — билмайсан... Йўқ, сен ҳамма нарсани биласан, фақат айтмайсан, муғомбурсан. Энанг та-

йинлаб кетган, тоғанғ нимани сўраса «билмайман», дегин деб. Шундайми?.. Майли, билмасанг билма... Мен кетдим.

У ёлғондан эшик томон йўналди. Қўрқиб кетган Эшпўлат югуриб бориб, Қаландарни қучоқлаб олди.

— Жон тоға, кетманг, тоғажон, илтимос.

Ҳамон сандал бурчагида майиз титкилаб ўтирган укаларининг ҳеч нарса билан иши йўқ, акаси билан тоғасининг ҳаракатларига ҳайрон эди.

— Билмайсанми калитнинг қаердалигини?

— Үлай агар билмайман,— деди Эшпўлат.— Билсам олиб берардим. Нон урсин, билмайман.

— Ҳа, бўлди-бўлди, кўп қасам ичаверма. Майиз билан ёнғоқ борми? Ё униям билмайсанми?

Хадича опа тўйга кетаётганда Эшпўлатга тайинлаб кетган эди: «Қаландар тоғанғ майиз, ёнғоқ, туршак сўраса билмайман, дегин. Хўими? Яна лалайиб ҳаммасини олиб бермагин. Агар жуда қўймаса эпам шуни бериб кетдилар, деб бир қисим майиз бергин. Бўлмаса у очофат битта ҳам қолдирмай еб кетади». Ҳозир Эшпўлат онасининг ана шу гапларини эслади. Аммо майиз йўқ, билмайман, деёлмади. Тоғасининг кетиб қолишидан жуда қўрқар эди. Эшпўлатнинг ўйланиб қолиши сабабини Қаландар ўзича англади: «Аммам ўлгур худо урган зиқна-да. Бу Эшпўлат бечорани ҳам, «тоғанғга майиз берсанг терингга сомон тиқаман», деб қўрқитган. Шошма, шундай қилганига мен ҳам бир боплай...»

— Менга қара, Эшпўлат,— деди Қаландар сандалга келиб ўтиаркан.— Қеча оқшом Пирмат бобонинг эшагини бўри ёриб кетганмиш, эшитдингми?

У зимдан жиянини кузатди. Эшпўлатнинг ранги бирдан ўзгарди.

— Эшитмадим. Ростданми?— деди тутилиб.

— Ҳа,— деди Қаландар бепарво оҳангда.— Эрталаб отам шундай деди. Қейин Пирмат бобоникига бордик. Рост экан. Оғилининг эшигини бузиб кирибди-да, битта

қўйини ебди, иккита эчкисини чала ярим қипти, охири эшагининг қорнини ёриб чиқиб кетибди.

Қаландар гапирган сари Эшпўлатнинг ранги оқарап, икки укаси эса кўзларини жавдиратиб, сандалнинг ичи-га кириб борар эди. Қиши куни бўлгани учун аллақачон қоронги тушган, шамол оч бўридай увиллар, ташқари жуда ваҳмали эди.

— Тоғам келди, чой-пой дамлайин ҳам демайсан-а, Эшпўлат.

— Ошхонага боришга қўрқаман,— деди у.

— Ҳа, майли, чойни қўявер, энди кеч бўлди. Майиз билан озроқ ёнғоқ ол, еймизу көйин ётамиз.

Эшпўлат энди ҳеч иккиланмай жойидан турди, тўрдаги кичкина тахмончадаги қизил сандиқчани очиб бир ҳовуч қора майиз билан бир сиқим чақилган ёнғоқ олди. Ёнғоқ билан майизни кўрган укалари бирдан ташланди:

— Менгаям майиз!

— Ёнғоқ!

— Ҳозир едиларинг-ку сенлар,— деди Эшпўлат ука-ларига дўқ қилиб.

— Қўй, еса ер, сенга нима?— деди Қаландар.— Яна обке, ҳаммамиз еймиз. Бир маза қиласайлик, жиян.

Эшпўлат иштонини ҳўл қилиб қўйган боладай бўза-риб қолди.

— Ҳа, нимага кўзинг жўлайиб қолди? Энангдан қўрқяпсанми?

— Эртага келиб уришадилар... — деди Эшпўлат бў-шашиб.

— Қўрқма, уришмайди. Э, менга қара, Эшпўлат, энанг уришса индамай ўтираверасанми? Тура солиб қоч. Қани етиб кўрсинг-чи... Бўл тез, обке майиздан. Кеч бўлди, ётамиз.

Эшпўлат онасининг важоҳатини кўз ўнгига жонлантириб, жойидан жилолмай қолди.

— Тоға...

— Нима?— деди Қаландар бақириб.— Обкемайсанми? Бўлмаса, ўзингдан кўр.

У иргиб ўрнидан турди. Буни кўриб, кетиб колади, деб ўлади шекилли, Эшпўлат югуриб эшикка борди.

— Кетманг, жон тоға.

Шу маҳал атай қилгандай шамол баттар увиллади. У айвондаги бир нимани учирив кетдими, ишқилиб ташқарида «тарақ» этган овоз эшитилди. Бу овоз Эшпўлатга ичиди бир нарса ёрилгандай бўлиб туюлди.

— Бўлмаса, айтган ишни қил-да. Боядан бери капкatta одамни лақиллатасан,— деди Қаландар оҳиста жойига ўтирас экан.

Эшпўлат бўйнидан бирор арқон солиб тортгандай мажолсиз, қизил сандиқча томон юрди. Яна бир ҳовуч майиз билан ёнгоқ олиб келди.

Қор, бўрон эрталабгача тинмади. Қаландар билан Эшпўлат эса тонггача ухламади. Укалари сандалнинг у кўзига, бу кўзига оёғини тиқиб ухлаб қолишиди...

Хадича опа устки кийимларини ечдию қизил сандиқчани очиб кўрди. Кўрдию ранги қув ўчиб, бирдан бақириб юборди:

— Вой шўрим, бир сандиқ ёнгоқ-майиз тамом бўтия!

У тез-тез юриб келиб Эшпўлатнинг қулоғидан буради.

— Ҳе, зумраша, мен сенга нима деб кетувдим?! Нимага кўрсатдинг?

Оғриқнинг зўридан Эшпўлат додлаб юборди. Бахтига отаси келиб қолди.

— Ҳа, нима гап ўзи?— деди Ҳайдар ака.

— Бир сандиқ майиз-ёнгоқни еб кетибди ер юткур! Яна қора майиз, ғалвирак ёнгоқ эди. Битта-яримта келса олдига қўяман, деб асрраб юрган эдим.

Эшпўлат отасига мўлтайиб термилди. Ҳайдар аканинг раҳми келиб кетди.

— Қўйвор қулоғини,— деди у хотинига кескин.— Еса

епти-да. Бунча бобиллайсан! Майиз-ёнғоғинг боладан ҳам азизми?! Майиз-ёнғоқ керак бўлса ўтиргин эди уйда!

— Ҳозир бораман. Ҳаммасини айтаман ота-онасига!
Эшпўлат қўрқиб кетди. Ростдан ҳам онаси борса-я, унда Эшпўлат нима деган одам бўлади? У бирдан онасига ёпишди:

— Жон энажон, борманг. Борманг!..
Хадича опа ўғлини силтаб ташлади:
— Йўқол кўзимдан!..
— Қани шу ердан силжиб кўр-чи!— деди Ҳайдар ака.— Оёғингни уриб синдираман! Уят, номус деган нарсани биласанми? Еса текинга ебдими — уйингга қоровуллик қилган.

— Қоровуллик қилса, бор-йўғимни еб кетадими?
— Қоровул бўлгандан кейин билганини қилади. Билдингми? Энди чида...

Эшпўлат гоҳ отасига, гоҳ онасига жавдираб қарап, тўлиб келаётган ўпкасини аранг босиб турар эди. Хадича опа жавраб-жавраб уйни йиғиштиришга кириши:

— Шунча майиз-ёнғоқ тамом бўпти-я...
Туни билан қоровуллик қилиб уйқудан қолган Қаландар бу пайтда ўрик ўтин чўғи солингган иссиқ сандалга орқасини тоблаганча ширин туш кўриб ухлаб ётар эди...

КУЗАТИШ

— Илоё оқ пошшонинг уйи куйсин! Ниятига етмасин! Келиб-келиб менинг боламга кучи етадими? Бошқалардай беш-олтита ўғлим бўлсаям майли эди-я... Ер юткур Юсуфбойнинг иши бу. Ўзининг бешта ўғли хўқиздай семириб ётипти. Ӯшалар борсин!

Жаннат хола сандалда ўтириб Қодирнинг кийимларини ямар экан, тинмай қарғанар, гўё шу билан кўнглини бўшатиб, аламини енгиллатар эди. Хотинининг дод-фарёди хомуш ўтирган Шодиёр бобонинг ўртанган

кўнглини баттар ачитар, ярасига туз сепар эди. «Онада. Ўғлим энди вояга етиб қўлтиғимга кирав, деб турганида мардикорликка олиб кетса... Алам қилмайдими? Бироқ дод-фарёднинг нима фойдаси бор? Бу билан бирон нарса ўзгариб қоладими? Сабр қилишдан, ўғлимнинг жонини омон сақлашни сўраб оллога ёлворишдан ўзга нима илож бор?» Шодиёр бобо шу хаёллар билан хотинига таскин берди:

— Қўй, энди, хотин, кўп ўксинма. Кўпга келган тўйда.

— Ота бўлиб сиз шундай деб турганингиздан кейин...

-- Жаннат хола эрига таъна қилди: — Шунча одамнинг боласи кетяпти-ю, лекин биронтаси индамайди-я.

Бу гап Шодиёр бобонинг нафсониятига тегди.

— Нимага индамас экан?! Шу гап чиққандан бери жанжал-ку. Кечак оқшом гузарда бўлган тўполондан ха-баринг йўқ. Ериқул: «Ўғлимни ҳеч қаерга юбормайман», деб дод солди. Ҳатто элликбошига таёқ ўқталди. Ҳўш, нима фойда берди? Катта ўғлининг ёнига кичигини ҳам ёзиб қўйди.— Шодиёр бобо оғир хўрснди.— Ҳамма иш уларнинг қўлида. Барининг тили бир. Пешонамизга худо шуни ёзган бўлса нима қилайлик, ахир. Ҳамма индамай, қўл қовуштириб ўтирибди, деб ўйлайсан чофи... Боши тошдан бўлсин. Омон бўлса, бир-икки йилда келиб қолар. Кўрмагандай бўлиб кетамиз.

Жаннат хола кўзини тикишдан узмай:

— Кошкийди бир-икки йилда келса...— деди бўшашиб. Назаримда бир-икки йил ҳам жуда узоқ туюлди, яна кўзига ёш олди.— Бир-икки йил... Э-ҳе, бир йилни айтинг! Болагинамни бир кун кўрмасам уйқум келмайди...

Шодиёр бобо ўзи айтган гапга ўзи ҳам унчалик ишонмаса-да, хотинига сир бермади.

— Элликбоши ҳам, юзбоши ҳам айтди-ку, бир-икки йилда келади деб. Алдамас ахир, туппа-тузук одамлар-ку.

Шодиёр бобонинг «Туппа-тузук одамлар-ку» дегани Жаннат холанинг ловуллаб турган юрагидаги ўт устига ёғ сепгандай бўлди.

— Сиз ҳам ўлгудек соддасиз! «Туппа-тузук одамлар» эмиш! Алдамас эмиш... Шу гапларга ишониб ўтирибсиз-а! Ахир бу ер юткур элликбошию юзбошиларни энди кўряпсизми? Агар уларда инсоф, диёнат бўлса, алдамаса, нимага ўзларининг болаларини жўнатмайди? Бойларнинг ўғиллари нимага бормайди?

— Бас қил, хотин,— деди Шодиёр бобо ичидан келган ўқсикни босолмай.— Ҳамма нарсани била туриб, яна ғапирасан-а. Куйган юрагимни баттар куйдириб нима қиласан?! Менга осон деб ўйлайсанми? Қодир ёнимда бўлса, эрта-индин Қаландарнинг ҳам бўйи етиб қолади — булар менинг икки қўлтифимдаги икки тирговичим, суюнчиғим-ку.

Шодиёр бобо оғир уҳ тортиб, ғапиролмай қолди. Дарду аламларини сўз билан ифодалашга ожиз эди.

— Кийимларини иссиқроқ қил. У ёқларни совуқ дешигади. Ишқилиб, эгам ўз паноҳида асрасин...— Сўнг муҳим бир гап эсига тушгандай, хотинига яқинроқ сурилиб ўтирди.— Менга қара, хотин,— деди сирли оҳангда.— Тунов куни Самарқандга борганимда чойхонада бир гап эшитувдим.

Жаннат хола: «Нима гап экан?», дегандек қўлидаги тикишини ҳам қўйиб эрига ўзланди.

— Жizzахни биласанми? Хуррам бўламнинг пирлари бор-ку, Яҳёхон, ўшаларнинг юрти. Ўша ерда қўзғолон бўлган эмиш.

— Қўзғолон нима?

— Халқ оқ подшога қарши бош кўтариб чиққанмиш.

— Ё тавба, ё қудратингдан! Подшогаям қарши чиқадиганлар бораканми?— деди Жаннат хола ҳайрон бўлиб.

— Ахир ўрисларнинг ўзиям Николай подшодан но-

рози эмиш-да... Подшони тахтдан агдармоқчи бўлиб юрганиш.

— Қаёқдаги мишишларга ишониб юрасиз-а! Қўйинг, бундай гапларни гапирманг.— Битта-яримта ғаламис эшитиб қолса — бошингизга бало бўлади.

— Шундайку-я, лекин ўша чойхонада бу гапларни бир ўрис айтди-да. Ўзбекчани чала-чулпа билар экан. Ленин дейди, большовой, дейди. Яна бир нималар дейди, инқилобми, ишқилиб шунга ўҳшаган гапларни кўп гапирди. Гапларига яхши тушунмадим, аммо «подшо тахтидан тушади» деган гапини аниқ фаҳмладим... Бордию шундай бўлса, мардикорликка олиш ҳам бекор қилиниб қоладими, деб ўйлайман-да, хотин...

Шодиёр бобо гапини тугатмасидан эшик очилиб Қодир кирди. Уни кўриши билап Шодиёр бобо гапидан тўхтади.

— Келдингми? Ўтири, бирпас дамингни ол, кейин Қаландар билан бирга опангникига бориб келинглар. Улар билан ҳам хайрлашиб келмасанг, опангнинг ўнкаси қозондай бўлиб юради...

Эрта баҳор. Офтобрўя қирлардан қор кетиб, ер яшил тус ола бошлаган. Ўқтин-ўқтин эсган шабада эса қишинииг аллақаерда яширинган сўнгги заҳрини олиб келади, изғирин кишининг юзларини ачиштириб ўтади.

Қош қорайиб, одам одамни танимайдиган бўлиб қолган. Қодир билан Қаландар Тегирмонбошидан — опасиникидан келмоқда. Катта кулранг ҳанги эшакка иккови мингашиб олган: Қодир олдинда; Қаландар орқада. Сергап опаси ҳадеганда рухсат беравермади. «Қутлуғ уйдан қуруқ оғиз кетиш яхшимас. Ош дамлайман, еб кетасанлар», деб туриб олди. Қаландарнинг поччаси ўзига тўқ одам, бундан опаси ҳам хурсанд. У хурсандлигини яширолмас, ҳар доим гап орасида бунга ишора қилас, ҳатто билинар-билинмас мақтаниб ҳам қўяр эди. Ҳозир укаларига ош дамлаши ҳам уларга меҳрибонлик ниқобидаги манманлик эди. Буни Қодир

билан Қаландар ҳам пайқади. «Ошга вақтимиз йўқ. Отам тез қайтинглар деб тайинлаган», деса ҳам опаси унамади: «Отамга опам бир ошам еб кет, мардикорликка кетсанг, шу билан қачон ош ейсан, деб қўймадилар, дегин, хўпми? Отам яхши одам. Индамайдилар».

— Отам уришадилар энди,— деди Қаландар.— Жуда кеч қолиб кетдик-да.

— Опамнинг одатини отам ҳам, энам ҳам билади-ку. Пўқ деганингга қўймаса. Бир гапга тушса кечгача тинмайди.— деди Қодир эшакка хала босиб.— Ҳавоям анча совиб қопти. Совқотмаяпсанми?

— Йўқ...

Совқотяптими-йўқми — буни ҳозир Қаландарнинг ўзи ҳам билмайди. Чунки унинг хаёлида бошқа нарса: икки кўзи ҳув рўпарада— баланд уватдаги катта жийдада. Шу жийда тагида ажина бор, кечаси ўтган одамга ташланади, айниқса ёш болаларнинг йўлини тўсар эмиш, деб эшитган. Ёнида акаси борлиги кўнглига таскин берса-да, бари бир юрагининг аллақаерини шубҳа, хавотир безовта қилар эди.

— Ака, сиз ажинани кўрганмисиз?

— Кўрмаганмаи. Йўқ нарсани қандай кўриб бўлади? Қўрқма, қўрқсанга қўша кўринар, деганлар...

— Карим бова кўрган экан-ку. Ёзда, айни пешинда мана шу жийданинг тагида сочини тараб ўтирган экан-ку? Карим бова шартта сочидан бураб олган эмишку? Кейин ажина Карим бовага, «тила тилагингни», деганмиш. Карим бова тилла сўраган экан, кўп тилла берганмиш. Шундан кейин бой бўп кетган дейишади-ку?..

Бу гапни Қодир ҳам эшитган. Аслида уни эшитмаган ҳеч ким қолмаган. Карим бобо қандай қилиб бадавлат бўлиб кетганини бирон киши билмайди, бироқ шунақа гап тарқалгани рост. Бошқа пайт бўлганда Қодир, «кўрса кўргандир», деб қўя қолар эди. Аммо ҳозир бун-

дай деса, укасининг қўрқуви баттар ошишини аниқ се-
заб турибди.

— Бу гаплар ҳаммаси ёлғон. Карим бованинг ўзи
тўқиб чиқарган. Ажина ҳаммага тилла бераверса, бу
дунёда камбағал қолмас эди,— деди.

— Ҳаммаям қўрқмай унинг сочидан бураб ололмайди-да,— деди Қаландар ўз сўзидан қайтмай.— Устига
устак ажина жуда сассиқ бўлар эмиш. Сассигига одам-
зод чидай олмас эмиш. Кимки чидаб, сочидан бураб ол-
са, шунга берармиш тиллани...

Қодир ичидаги укасининг соддалигидан кулди. Айни
вақтда унинг синчковлигига, кузатувчанлигига, хотира-
сига ҳаваси келди. Қачон қандай гапни эшитса — ҳам-
маси ёдда қолади.

— Ажина бўлса ҳам сен билан менга иши йўқ.
Отамнинг гаплари эсингдами, жин-ажинанинг иши мул-
лалару эшонлар билан. Биз билан нима иши бор! Қола-
верса, ҳозир опамникида мусаллас ичдик. (Поччаси
қўймай Қодирга бир пиёла мусаллас ичирган эди.)
Ажина бунақа нарсадан қўрқади. Билдингми? Шунинг
учун бунақа гапларга парво қилма. Энди сен ҳам катта
йигит бўлиб қолдинг. Йигит деган ҳар нарсадан чўчиб,
хавотир олиб юрмайди. Дадил, довюрак бўлиш керак.—
Улар баҳайбат жийда ёнига келган эди.— Ана, қара,
ҳеч нарса йўқ.

Қаландар акасининг белидан маҳкам ушлаб олган,
эшак тумшуғини ерга тираганча йўрғалаб борар эди.

— Менга қара, Қаландар,— деди Қодир.— Эртага
мен жўнаб кетаман. Энди сен дадил бўл, отамнинг ёни-
га кир, у-бу ишларда ёрдам бер. Отам қариб қолдилар.
Энди сендан бошқа суюнчиғи йўқ. Мен қайтиб келгуним-
ча, ўрнимни билдирумай тур. Бўлмаса отам ҳам, энам
ҳам ўзини тоза олдириб қўяди. Тушундингми?

Акасининг кетишини ўйласа, Қаландарнинг юраги
шиғиллаб кетади. «Эртага жўнайди. Қаерга олиб бора-
ди? Нима иш қилдиради? Қачон қайтиб келади?» Бу са-

волларга Қаландар сира жавоб тополмас, ҳатто тасаввур ҳам қилолмас эди. Акасининг ўзи-чи? Унинг ўзи биладими қаерга олиб кетишларини?

— Ака, қаерга олиб боришар экан? Нима иш қилдирар экан? Биласизми?

Қодир укасига сездирмай хўрсинди. Қаердан ҳам билсин. Ҳўш, билганда нима? Бари бир эмасми? Қодир меҳнатдан қўрқмайди, қийинчиликлардан чўчимайди. Фақат кексайиб қолган касалманд отасини, муштипар онасини, ҳали қўлидан бирон иш келмайдиган укасини ёлғиз қолдириб кетаётгани алам қилади? Энди уларнинг ҳоли нима кечади? Ҳовлига ким қарайди? Токларнинг тагини ким чопади? Кузда ким кўмиб, баҳорда ким очади? Ёлғиз отасига оғирлик қилади бу ишлар. Гарчи озгина бўлса ҳам бари бир чопиш керак. Ахир бор-йўқ умид шу бир қатор токдан-ку! Ҳосил тузук бўлган йилларда бир халта майиз олар эди. Бу нима ҳам бўларди. Қодир йил — ўн икки ой тинмайди. Ёзда одамлар эшигидаги мардикорлик қиласар, топган тўрт-беш тангасига буғдой олар эди. Энди ўша бир халта майиз ҳам йўқ. Сотай деса сигирдан бўлак моли бўлмаса. Мен келгунча булар қандай кун кечиришади? Қаландарга қийин бўлади-да. Ҳамма иш шунинг зиммасига тушади...

— Ким билади, дейсан. Бирорлар Сибирь деган жойга олиб боради, дейишади. У ер қалин ўрмон эмиш. Мардикорларга дарахт кестиармиш. Қишин-ёзин ердан қор аримасмиш. Йил — ўн икки ой офтоб чиқмас эмиш.

Қодирнинг галларини эшитиб борар экан, Қаландар даҳшатга тушди, акасига ачиниб кетди.

«Офтоб бўлмаса қизиқ экан-ку. Дунёда шунаقا жойлар ҳам бор эканда-а... Үзимиз уч ой қишида қанча қийналамиш. У ёқда сирам қўёш чиқмаса. Акам бечора нима қилади?.. Дарахт кестиармиш. Қаҳратонда дарахт кесиш ҳам осонмас-да».

Қаландар қишида акаси билан Эшмат бобонинг таш-

ландиқ боғига ўтинга борганини эслади. Кесиб кетилган дарахтларни кундаков қилишган эди. Кетмонни ерга урса муз сачраб юз-кўзига тегади. Ўшандада Қаландарнинг бармоқлари совуқдан букилмай қолган эди. Қодир унга раҳми келиб: «Бор, сен уйга кетавер. Қўлингни исит», деган. Қаландар йифидан ўзини базўр тутиб уйига келган, қўлини иссиқ сандалга тиққан, совқотган бармоқлари иссиқда нина санчилганга ўхшаб роса азоб берган эди. «Тоза изфирин бўлса керак у ёқлар. Қора совуқ ёмон-да. Акам шўрлик қўлини қаерда иситиб олади? Сандал борми-йўқми? Мардикорлликка олгандан кейин тиним билдиғармиди... Акам бирон жойини совуққа олдириб қўймай, эсон-омон келсин-да, ишқилиб...»

— Қани, хотпн, бўл энди, тикишингни қўй, ҳаракатингни қил. Қун кеч бўлди. Овқатнингга унна. Мен тўртбешта мўйсафидни айтиб келай. Ҳадемай болаларинг ҳам келиб қолади. Оқсоқолларнинг олдига бир товоқ ош қўйиб, оқ фотиҳасини олайлик...

Шодиёр бобо чопонини елкасига ташлаб, ташқарига чиқди. Пешинга қадар ҳаво очиқ, қуёш чиқиб турган эди. Баҳор ҳавоси эмасми, дарров осмонни булут қоплади. Қунботардан аччиқ изфирин эсди...

Ун чоғли мўйсафид келди. Улар битта пиёлада кўк чойни айлантириб, гурунг қилиб ўтиришиди. Аммо ҳамон Қодир билан Қаландардан дарак йўқ. Бундан Шодиёр бобонинг жаҳли чиқди. Жаннат хола эса ўзини қўярга жой тополмайди — ичини ит таталайди. Нима қиларини билмай дам-бадам дарвозага бориб келади.

— Нима бўлди-я, мунча ҳаяллади булар,— деб ўзи-га-ўзи гапиради.

— Маҳмадона Робия гап бериб ўтиргандир-да. Энам билан отам зиқ бўлиб кетгандир, тезроқ бора қолинглар, демайдими!..

Шодиёр бобонинг гапи оғзида қолди — дарвоза ғийқ этиб очилди.

— Қелди!— деди Жаннат хола болаларига пешвоз чиқиб.— Мунча кеч қолдиларинг, болам?

— Опам, бир чуқум ош еб кетмасанг бўлмайди, деб туриб олди,— деди Қодир. Қаландар эшакни оғилхонага етаклаб бораркан, онасиға қарамай:

— Қизингизни феълини биласиз-ку, бир гапга тушса уч кун жағи тинмайди. Ҳаммани ўзига ўҳшаган бекорчи, деб ўйлайди чоғи,— деди.

Жаннат хола Қаландарнинг гапига эътибор бермади.

— Кира қол, болам,— деди Қодирга.— Мўйсафидлар кутиб қолиши. Намозгар бўлмай келишувди...

Оқсоқоллар тургандан сўнг уй ичи сандал атрофиға жам бўлди. Ҳамманинг нигоҳи Қодирда. Айниқса, онаси ундан сира кўзини узмайди. Қодирга қараб туриб дув-дув ёш тўқади. Буни ҳеч кимга билдирамаслик учун оқ чорсисининг уни билан кўзларини астагина артиб қўяди. Икки кўзи ўғлида-ю, хаёли аллакандай нотаниш жойларда. «Шўрлик болам, қаёқларга олиб кетади энди? Ким билади у ёқлар қанақа совуқ...» Жаннат хола ўзича қаҳратон қишини, қор бўронни, туф деса туфуги музлаб қоладиган қора совуқни тасаввур қиласди. Одамнинг бадан-баданидан ўтиб, суюгигача зирқиратиб юборадиган бу аччиқ совуқда кетмон чопаётган ўғлини кўради. Қодир кетмонни ерга урса, майда-майда муз парчалари кўчади-да, кетмоннинг бети чаппа қайтиб кетади. Бир пиёла чой ичгунча ўтган фурсатда Қодирнинг қўллари совуқдан кўкариб, кетмоннинг дастасини ушлаёлмай қолади. Тепасида турган шопмўйлов киши алланима деб унга дўқ уради. «Ишла, чоп», деб имо билан буйруқ беради. Жаннат хола беихтиёр инграб юборди. Буни бирор сезди, бирор сезмади. «Илоё уйгинаси куйсин оқ подшонинг!.. Қариганимда энди бу кўргилик ҳам бормиди пешонамда? Э, худо, ишқилиб, ўзинг асрар паноҳингда...»

Оғир жимлик ҳукмрон. Шодиёр бобо икки қўлинни

ҳам сандалга тиқиб, кўзлари юмилинқираб хаёл сурисиб ўтирибди. Қаландар бўлса эртага шу пайтда акаси қаерда бўлишини, усиз уйлари ҳувиллаб қолишини ўйлайди. «Акам борадиган жойда овқатлари тузукмикан ишқилиб? Отам совуқ кунда кучли овқат сийиш керак, дейдилар доим... Бу ердан узоқмикан-а Сибири?..»

Жаннат хола йиғламоқдан бери бўлиб ўғлининг кафтларини силаб-сийпайди:

— Узингни эҳтиёт қил, болам. Оёқ-қўлингни совуқ-қа олдириб қўйма тағин...

Гапининг давомини гапиролмади. Пиқиллаб йиғлади. Шодиёр бобо ер остидан унга хўмрайди. Аммо Жаннат хола ўзини тиёлмади.

— Бўлди-да, энди,— деди Шодиёр бобо кескин.— Йиғлаганинг билан иш битадими? Обидийда қиласавериб боланинг ҳам кўнглини эзиб юбординг-ку! Нима, Қодир ёш болами? Ақл-хуши жойида.

Жаннат хола дока рўмолининг учи билан кўз ёшларини артди.

— Бегона юртларда... Болам бечора мусофири бўлиб...

— Нима қипти? Ёлғиз ўзи кетаётгани йўқ-ку. Қишлоғимиздан, ҳамсоя қишлоқлардан ҳам йигитлар бор.

Қодир миқ этмас, отасининг ҳам, онасининг ҳам аҳволини, гапларини ўзича тасаввур қилар, тушунар, аммо на унисига, на бунисига бирон нарса дейишдан ожиз эди. Аввал онасининг юзиға термилди. Шу пайтгача эътибор қилмаган экан: ҳали элликка кирмаган бўлишига қарамай, юзларини, пешонасини ажин қоплабди, кўп йиғлаганидан бўлса керак, кўзларининг ости, қовоқлари шишинқираб, салқиган. Юзлари кичкина бўлиб қолгандай, кўзларида эса чуқур бир маъюслик. Сўнгра отасига қаради. Отаси онасидан ўн ёш катта. Баъзи элликдан ошган одамларнинг юзи ялтираб, хўрознинг тожисидай қип-қизил бўлиб туради. Лекин Шодиёр бобонинг юзлари сўлғин, қарашлари ғамгин. Икки йил олдин терлама билан оғриди. Шундан кейин ўзини бир-

дан олдириб қўйди. Илгари жуда эпчил, чайир, бақувват эди. Ҳозир ҳам— юзидами, қарашларидами — ўша ўқтамлик, ички дадиллик сақланиб қолган. Аммо дастлаб қараган ҳар қандай кимса Шодиёр бобони камида олтмишдан ошган, деб ўйлайди. Қодир ана шунга — отасининг тезда кексайиб қолганига ачинади, раҳми келади. «Меҳнат, оғир меҳнат эзиб қўйган отамни. Болалигиданоқ кўп қийинчиликлар кўрган-да. Ўзи айтиб берган-ку».

Қодир хаёлини йигиштириб олиб, укасига қаради. Қаландар! Унинг феъл-автори, дангаллиги, чўрткесарлиги отасига ўхшаб кетади. Очифи, баъзан Қодир укасига ҳавас қиласди. У эндинга ўн тўртга кирган бўлса ҳам кўп нарсага фаҳми етади, нима буюрса «хўп» дейди, қўлидан келса-келмаса бажаришга уринади. Баъзи тенгдошлари сингари « билмайман, қилолмайман», деб ўтирамайди.

Укасидан Қодирнинг кўнгли тўқ. «Менинг йўқлигими билдирамайди. Отамнинг ишини қўлидан олади...» Шу фикрини онасига айтиб, унинг кўнглига тасалли бeroқчи бўлди.

— Гам чекманг, эна, менинг мардикорликка боришим — юртга келган тўй. Мана, Қаландар катта бўлиб қолди, ўрнимни билдирамайди.

— Э, болам-а,— деди Жаннат хола хўрсиниб,— ўнта бўлса ўрни бошқа, деган гап бор. Ахир сизлар ўнта эмас, иккитагинасизлар.

Шодиёр бобо секин томоқ қирди. Бу — ганини тугатинглар, дегани эди.

— Ётинглар энди. Вақт кеч бўлди. Ҳали эртага узоқ йўл юрасан. Дамингни ол. Энангга қолса эрталабгача ҳеч кимни ухлатмай, сенга термилиб йиғлаб ўтираверади. Ҳадеб йиғлайверишининг ҳам хосияти йўқ. Минг марта гапирган билан қулоғига кирмайди...

...Шодиёр бобо бомдод намозини ўқидию Қодирни ўғотди. Нонушта қилиб бўлгач, Шодиёр бобо ўғлига оқ

йўл, сиҳатлик тилади. Сўнг ризқ-насибанг шу ерда қолсин, эсон-омон қайтиб келгин деб, битта бутуни нонни Қодирга тишлатди.

Қодир аввал отаси, сўнг Қаландар билан, охирида онаси билан қучоқлашиб хайрлашиди. Жаннат хола унинг юз-кўзларидан, пешонасидан ўпаркан, бир оғиз ҳам гапиролмас, пиқ-пиқ йиғлар эди...

Қодир тўрвасини елкасига ташлаб катта кўчага қараб юрди. У ўн беш қадам юргач, ортига ўғирилди. Унинг қарашлари тийрак, ўқтам бўлса-да, кўзларида ёш ялтираб кетди. Қаландар акасига ҳам ачиниш, ҳам ҳавас билан термиларкан, у муюлишдан ўтиб кетгунча кўз узолмади. Ҳзи билмаган ҳолда, акаси кетган томонга икки-уч қадам ташлади. Унинг бу ҳаракатида: «Хотиржам бўлинг, ака, йўқлигингизни билдиrmайман. Отаэнамга ёрдам бераман, қўлтиғига кираман», деган қатъий ваъдаси мужассам эди.

ҚУЁШ МЕН ТОМОНДА

Қаландар тонг саҳарлаб йўлга тушди. Қишлоқ этағидан ўтадиган сойнинг кечувига боргандা хўroz қич-қиргани эшитилди.

У миниб кетаётган жийрон қашқага қамчи босди. «Тезроқ ҳаракатингни қил, Қаландар, бой билиб қолса орқангдан одам қўяди...»

...Чошгоҳга бориб Қаландар жуда зерикди. Устигаустак қорни очди. Салкам бир йилки, аҳволи шу. Тоғматоғ, қирма-қир мол орқасидан эргашиб юради. Аммо на оёғидаги чорифи янги бўлди, на қорни тўйиб овқат еди... «Бой мени гўдак билиб, алдаяпти. Қачонгача бу аҳволда юраман?»

Қўй-эчкиларни ариқдан сугорди-да, тевачакка ётқизди. (Тоғ этағида кичкина бир тепалик бўлиб, шохлари тарвақайлаб кетган катта садақайрағоч унга соя ташлаб туради. Ҳар кун пешинда Қаландар қўй-эчки-

ларни шу ерда соялатиб, кун қайтгунча дам беради.) Кейин ўзи нариги бетдаги тол тагида соялаб ўтирган кекса чўпон олдига кетди.

Бу чўпоннинг ёши етмишга яқинлашиб қолган, у Зиёдулла бойнинг отаси даврида бу хонадонга қарол бўлиб келган. Қаландар баъзан-баъзан бу чол билан суҳбатлашар, айниқса, отасини соғиниб юраги сиқилган кезлари у билан гурунглашиши хуш кўрар эди.

— Ассалому алайкум, отахон!

— Ваалайкум ассалом, ке, улим.

Чол совуқ сувга қотган нонни ивитиб еб ўтирад эди.

— Ке, болам, нонга қара.

Чол нон ивитилган сопол косани Қаландарга яқинроқ суриб қўйди.

— Бунинг отини ўрдак шўрва дейди, эшитганмисан?

— Ҳа,— деди Қаландар,— бизнинг қишлоқда ҳам шундай дейишади.

— Камбағал ўзининг кўнглини ўзи обод қилиш учун ўрдак шўрва, деб атаган-да бу таомни.

Қишлоқдан чиққан беш-олти отлиқ тоғ томон ўрлаб борар эди.

— Бойнинг ўғиллари-ку,— деди кекса чўпон.

— Қаёққа кетишияни экан?

— Қаёққа борарди дейсан, тоққа чиқяпти-да. Икки қир ўтгандан сўнг бир булоқ бор. Суви яҳдай. Қагта тол соя солиб турибди. Тангадай офтоб тушмайди. Улар ҳозир ўша ерга боришади. Битта қўйни сўядн. Йилқибоқарлар қимиз келтириб беради. Хуфтонгача салқинда ўтириб қимижхўрлик қилишади.

Бу гап Қаландарга ғалати таъсир қилди.

— Ия,— деди у.— Сиздай кекса одам эртаю кеч тинмайсиз. Еганингиз — ўрдак шўрва. Улар бўлса, қила-диган ишининг тайини йўғу...

Чол маънодор кулимсиради.

— Ахир улар бой, бойваччалар-да. Бизнинг пешона-мизга оллоҳи карим шуни ёзган.

— Нимага шундай, бова?
— Замон зўрники, болам. Бошқа илож йўқ. Сен билан менинг дастимиз калта.

Қаландар ўйланиб қолди. «Фалати замон-ку. Нимага шундай бўлиши керак?»

— Қачонгacha шундай бўлади? Нимага меҳнатни биз қиламизу роҳатини улар кўради?

Чол атрофига олазарак кўз ташлаб олиб, Қаландарга насиҳат қилди:

— Бу гапларни менга айтдинг, бошқага айта кўрма, бўтам.

Қаландар бойнинг ўғиллари кетган томонга термиларкан, ўзининг қишлоғи, Юсуфбой, унинг болалари, кариндош-уруглари хаёлидан кечди. «Улар ҳам шу-да. Қанча одамни ишлатади. Аммо у шўрликлардан биронтаси қорни тўйиб овқат емайди. Буям майли-я, сал нарсага сўкиш, ҳақорат эшитади, калтак ейди».

Қайси кунги воқеа эсига тушди.

Қаландар қўйларни қўрага қамади-да, отларнинг тагини тозалашга киришди. Зиёдулла бойнинг ўзи билан тенгқур ўғли келиб, тегажоқлик қила бошлади.

— Бияни эмяпсанми, Қаландар?— деди бойвачча ҳиринглаб.

Қаландар бир ўқрайиб қаради-ю, индамади. Бойвачча яна бир-икки масхара қилди. Аммо Қаландар унинг қилиқларига эътибор бермади. Бойвачча, отасига тақлидан қўлини белига қўйиб Қаландарга дўқ ура кетди:

— Ҳой, етимча, мана бу ерни яхшилаб тозаламабсан-ку! От ётса қорни ифлос бўлади! Кейин уни ким ми-нади?!

Етимча дегани Қаландарнинг ҳамиятига тегди.

— Нимага мени етимча дейсиз? Ота-энам бор.

Бойвачча кинояли кулди.

— Вой-бў, ориятлари келдими? Ота-эналари борми?— У бирдан ёшига ярашмаган ҳолда жиддий тус ол-

ди.— Ўчир овозингни! Айтган ишни қил! Итдан тарқаган.

Қаландар ҳам бўш келмади.

— Мунча одамни ҳақорат қиласиз? Менга иш буюрманг, хўжайин сиз эмас, отангиз.

— Менга қара, ҳей кўппак! Бу хонадоннинг ҳаммаси, ҳатто ҳув аваби итим ҳам сенга хўжайин! Билдингми?!?

Қаландар қўлидаги курекка суюниб, бойваччага нигоҳини қадади.

— Эшигингизда ишласам гуноҳкорманми? Ҳар доим сўқасиз, масхара қиласиз, кўнглингизга келган ишни буюрасиз. Андиша қилиб индамайман. Андишанинг отини қўрқоқ қўйманг-да, индамас экан, деб одамни эзаверманг-да. Ахир, қурбақани боссангиз ҳам вақ этади.

Бу гапларни эшитиб турган бойнинг катта ўғли Қаландарга яқинроқ келди.

— Ҳей, қурбақа, менга қара! Кўп вақиллайверма! Елкангдан оғиз очиб қўймайин яна. Тилинг чиқиб қоптими? Ким берди сенга бу тилни? Текин нон сени қутуртириб юбориби-ку!

Қаландар ҳам ҳақини бериб қўядиганлардан эмас.

— Нимага текин бўлар экан? Саҳардан хуфтонгача сурув қетидан тикан босиб юрган ким?!

— Ўчир овозингни!

Бойвачча шундай деб Қаландарнинг қулоқ-чаккаси-га шапалоқ тортиб юборди.

Бу Қаландарга жуда алам қилди. Ўша куни кечаси билан ухлаёлмай, қийналиб чиқди. Бу ҳақсизлик, адолатсизликнинг сабабларини ўйлаб-ўйлаб ўйига етолмади. «Тавба... У ёқда — оқ подшо эзса, мардикорликка онса, бу ёқда — бойлар бунақа қилса... Нимага энди ҳар доим шундай бўлиши керак? Камбағалларнинг гуноҳи нима?»

У шу хаёллар билан ўрнидан турди. «Қетаман! Бунга чидаб ўтирмайман! Кечқурун бойдан ҳақимни ола-

ман-да, кетаман! Нима бўлсаям ота-энамнинг ёнида бўлганим дуруст...»

Қаландарнинг фикри қатъий эди. Ўзи кейинги вақтларда зерикиб, юраги сиқилиб юрган эди. Кекса чўпон билан бўлган бу суҳбат баттар таъсир қилди. Тошайтошай, деб турган сабр косасини тамоман тошириб юборди. У гўё ҳозир тўппа-тўғри бойнинг олдига борадигандек чол билан чала-чулла хайрлашди-да, дадилдадил қадам ташлаб илгарилаб кетди...

Оқшом қўй-эчкиларни қўрага қамади-да, Қаландар бойнинг олдига йўл олди. Бой шом намозини ўқиб бўлиб мудраган кўйи тасбеҳ ўтириб ўтиради.

— Ассалому алайкум, бой ота,— деди Қаландарostonada туриб.

Бой эринибгина кўзини очди. Саломга алик олиш ҳам малол келгандек, ижирғаниб қўйди.

— Ҳа, ўғлим...

Қаландар куни бўйи ўйлаб, пишитиб қўйган режасини дадил гапирди.

— Бой ота, ҳақимни берсангиз. Бир уйга бориб, ота-энамни кўриб келсам. Балки акам ҳам келиб қолгандир...

Бой тасбеҳни ҳовучига олиб, нималарнидир пичирлади, юзига фотиҳа тортиди. Сўнг тасбеҳни кимхоб камзуленинг ички киссасига солди-да, ўрнидан турди. У олтмишдан ошиб қолган бўлса-да, соқоли ҳали у қадар оқармаган, ҳаракатлари ҳам енгил, чаққон эди.

— Э, ўғлим, соддасан-да,— деди у жилмайиб,— аканг ҳали қаёқдан келади? Оқ подшо мардикорларни дарров қўйиб юборармиди?!

— Бир йил бўлди ахир,— деди Қаландар куюниб.

— Бир йил нима деган гап... У ёқда иш кўп. Биринки йилда адо бўлмайди.— Бой Қаландарнинг елкасига қўлини қўйиб, уни эркалаган бўлди.— Сен хавотир олма, ўғлим. Мардикорликка кетганларнинг қачон келишини мен яхши биламан. Улар қайтди дегунча ҳа-

қингни бериб, от-арава билан уйингга кузатаман. Унгача кўнглингни бўлмай ишлайвер. Хўпми? Ҳа, баракалло! Бор энди, ўғлим.

Бойнинг адл қомати, юз ифодасидаги қандайдир улуғворлик, чертиб-чертиси гапириши ҳар қандай одамни ҳам сеҳрлаб қўяр, ўткир, дадил нигоҳи эса сухбатдошини ошкора таъқиб қиласр эди. У билан мунозара гапиришган одам таслим бўлганини, унга ён бериб қўйганини ўзи ҳам сезмай қоларди. Ҳозир Қаландар ҳам шу аҳволга тушди. Бойга қарши бир нарса деёлмади. Индамай чиқиб кетди. «Ҳар доимги гапи... От-арава билан кузатиб қўяр эмиш. Биламан, қанақа қилиб кузатишингни! Лоақал ҳақимни берса ҳам майли эди...»

Қаландар ҳужрасига кирди-да, ўйга толди. Бойнинг жавобидан юраги баттар сиқилди. «Оқ подшо мардикорларга ҳали-бери жавоб бермайди. Иш кўп... Наҳотки шу гап рост бўлса? Унда акам қачон келади? Йўқ, ёлғон! Бой мени алдаяпти, ҳеч нарсани билмайди, тушунмайди бу гўдак, деб лақиллатяпти!.. Акам келган! Қетаман! Ҳақимни бермаса ҳам кетаман! Бари бир бой менга ҳеч нарса бермайди...» Отасининг гапи эсига тушки: «Бойларнинг ҳаммаси бир гўр, ўғлим, оқ ит, қора ит — бари бир ит... Қурумсоқ бўлмаса бой бўладими? «Отам рост айтган экан. Мен бўлсам... маҳмадонагарчилик қилиб ўтирибман-а! Отамга гап қайтариб... Қари билганини пари билмас, деган гапни нега ўйлададим?»

Ўшанда отасининг сўзига қулоқ солмай, ўз билгича иш тутганидан ҳозир жуда хижолат бўлди. «Отами қаттиққўл дейишади. Йўқ, аксинча, жуда ҳам кўнгилчан. Бўлмаса ўшанда менинг раъйимга қарармиди? Ҳеч каерга бормайсан, деб туриб олиши мумкин эди-ку». Унинг кўз ўнгига отасининг нуроний сиймоси гавдаланди. «Кечиринг, отажон! Энди сўзингиздан чиқмайман...»

Қаландарнинг боши ғувиллаб кетди. Нима қиласрини билмай қолди. Кетмай деса, бир кун ҳам қолишга тоқа-

ти йўқ. Кетай деса... «Нима бўлса бўлди. Кетаман! Қочиб кетаман!»

У чорифини ечди-да, кирлигидан асл ранги қанақалиги билинмай кетган бўз кўрпачага чўзилди. Мириқиб керишди. Иккала қўлини боши остига қўйиб шифтга термилиб ётди. Хаёлидан турли-туман фикрлар кечар эди. Шошма-шошма! Нимага энди ҳақимни олмай кетаман?! Бир йил ишлаб-а! Бир йил тофма-тоғ, тошматош кезиб, оёғимни яра қилиб мол боқаману ҳеч нарсасиз икки қўлимни бурнимга тиқиб кетаверамани? Отам, энам нима дейдн? Хўп, улар тушунишар, кечиришар. Лекин бошқалар-чи? Одамларнинг юзига қандай қарайман?» Бегона жойга бориб пул топиб келиш осонмас, ўғлим. Қўй, нима бўлса ҳам шу ерда, ёнимда бўл. Бир кунимиз ўтар. Аканг ҳам келиб қолар, насиб бўлса...» деганларида отамнинг гапига кирмовдим. «Сиз кекса бўлсангиз, акам у ёқда. Мен кўча чангитиб юрсам яхшими? Кўйинг, бориб ўша бойникида озроқ ишлаб келай. Меҳнат ҳақимга бирор нима берар ахир. Ўлдими, ҳеч қурса биронта эчки-печки берар-ку. «Сиз мени ҳали ҳам гўдак, қўлидан ҳеч иш келмайди, оғзидағи ошини олдириб қўяди, деб ўйлайсиз. Ундеймас, ота, мен бойда ҳақимни қолдирмайман. Албатта ундириб оламан. Ўшанда кўрасиз», деб катта гапириб қўйған эдим. Бир йил йўқ бўлиб кетиб шумшайиб борамани? Эшитганлар бу куннингдан баттар бўл, демайдими. Пуқ, индамай кетавериш ўғил боланинг иши эмас! Ишладингми, ҳақингни ундириб ол! Қандай қилиб? Хўш? Шундай сўроқ туғилди. «Ростдан ҳам қандай қилиб ундириш керак?»

Қаландар шартта ўрнидан турдию ҳужранинг кичкинагина туйнугидан отхонага қаради. «Шу отлардан бирини миниб кетсан-чи! Бирон киши билиб қолмасмикан? Аммо билиб қолса борми, нақ теримга сомон тикиди-я... Саҳар турману хўроз қичқирмасдан йўлга тушаман. Таваккал!»

...Қодирнинг мардикорликка кетганига бир ойдан ошди. Шундан бери Шодиёр бобонинг ҳам, Жаннат холанинг ҳам ҳаловати йўқ. Жаннат хола ўтиrsa ҳам уф тортади, турса ҳам, оқ подшони қарғашдан чарчамайди:

— Илоё уйгинаси куйсин Никалайнинг. Энди шу балоси бормиди? Ҳа, бўйгинаси қора ерда чирисин! Подшо бўлмай гўрсўхта бўлсин...

Шодиёр бобо хотинига таскин беради-ю, ўзи ичидан зил кетади. Лекин буни на хотинига, на Қаландарга билдиради.

Ота-онасининг аҳволига қараб Қаландарнинг юраги эзилади, уларга раҳми келади. Қандай қилиб уларга ёрдам беришни, кўнглини олишни ўйлади.

Бир куни Алимат акадан «Вағаштилик Зиёдулла бойга молбоқар керак эмиш. Кўп саховатли бой дейишиади», деган гапини эшишиб қолди. Ўйлаб-ўйлаб, шу бойникига бориб ишламоқчи бўлди. «Ҳарна тўрт-беш танга топиб келарман, ота-энамга ёрдам бўлади-ку, кўча чангитиб юришдан нима фойда?»

Фикрини отасига айтди. Шодиёр бобо қалин соқолини оҳиста силар экан, ер остидан ўғлига қаради.

— Қимдан эшиздинг бу гапни?

— Алимат акадан.

— Ҳам,— деди Шодиёр бобо салмоқлаб,— эшитувдим. Менга ҳам айтувди. Лекин, ўғлим, ҳолва деган билан оғиз чучимайди. Вағаштига бориб, яна унинг устига бойнинг эшигида юриб биринг иккита бўлишига кўзим етмайди. Ҳали ёш боласан.

— Таваккал-да, ота.

— Ишлайман десанг шу ерда ҳам иш топилади. Ана, ўзимизнинг Юсуфбойга одам керак эмас дейсанми? Қерак.

Юсуфбойни эшишиб, Қаландарнинг баданига чумоли ўрмалагандай бўлди. Икки ойча илгари бойнинг боғидағи толдан битта таёқлик кесиб олгани учун ундан роса

сўкиш эшигига иш сўраб борадими?

— Қўйинг, ота, шу бойни. Ундан ёруғлик чиқармиди? Ўлгудай қурумсоқ. Тошдан сув чиқса чиқади, аммо Юсуфбойингиздан томчи ҳам чиқмайди.

Шодиёр бобо ўғлининг соддалигидан кулиб қўйди.

— Нима, Зиёдулла бой мол-мулкини навчаларига бўлиб берарканми?

— Анча инсофли дейишяпти-ку.

— Ҳе, ўғлим, айтаверади-да. Бойларнинг ҳаммаси ҳам бир гўр. Оқ ит, қора ит — бари бир ит.

— Ҳар ҳолда бир бориб кўрай-чи, ота...

...Қаландар жийрон қашқани йўрттириб борар экан, ана шуларни ўйлар, хаёлан отаси билан суҳбатлашар эди.

«Мана, ота, бой хизмат ҳақимга шу отни берди».

«Ростданми? Ундей бўлса, Зиёдулла бой чиндан ҳам инсофли, диёнатли одам экан-ку».

«Отам гапимга ишонармикан? — дея ўйларди Қаландар.— Еки ростини айтсаммикан?.. Йўқ, бўлмайди. Отам бунақа нарсаларни ёмон кўради. Сира ҳам қинғир иши ақўл ургани қўймайди... Аслида бу ўғирлик ҳам эмас-ку. Бир йиллик меҳнатим бир от пулига наҳотки етмаса? Етади, ошиб ҳам қолади...»

«Акам келдимикан? Ўзгариб кетгандир. Оқ подшо жонини олиб қўйгандир бечора акамнинг. Озиб-тўзиб кетганми?» Назарида акаси унинг йўлини пойлаб ўтиргандай туюлди. Отнинг жиловини силтаб, қамчи босди.

Тонг ёриша бошлади. Қаландар ўнг томондаги қишлоқقا разм солди. «Бешкалми? Ҳа, яқин қолди». Қишлоқ томондан қўй-қўзиларнинг маърагани, хўроzlарнинг басма-басига қичқириши, безовта бўлган итларнинг асабий вовуллаши барадла эшитилади. Кимдир боласини қарғади... «Ҳа, бўйнигинанг остингда қолсин. Бола деганинг қулоғига битта-иккита гап кира қолса-да...»

Қаландар у ёғини эшитмади, эшитгиси келмади. «Нега баъзи хотинлар бунча кўп қарғанади? Не-не азобда катта қилган боласини аямай қарғайди-я. Яхшиямки, аёлларнинг қарғиши ўтмайди. Отам шундай деган».

Қаландар беихтиёр онасини эслади. «Йўқ, менинг энам ундан ўтмайди. Ҳеч ҳам қарғамайди. Жуда тўполон қилсан: «Ҳа, омон бўлгур, ҳа, уйинг буғдойга тўлгур», деб уришади. Лекин ҳеч маҳал анави аёлга ўхшаб қарғамайди... Онам ҳам йўлимга кўз тикиб ўтиргандир...»

Қаландар Ёмонжардан ўтганда қуёш мўралади. Тоғларнинг учидаги ҳали эриб улгурмаган қорлар қуёш шуъласида шишадай ялтирайди.

Атроф ям-яшил. Уватлардаги, қўш кирмаган ангорлардаги қалин майсалар қуёшнинг заррин нурларида яшил баҳмал каби товланади. Қаландар шундагина баҳорнинг намхуш, аммо ёқимли, киши дилини қитиқловчи ҳидини туйди. Бу ҳид, атрофдаги кўркамлик, унинг устига бир йилдан бери соғингани қадрдан қишлоғининг таниш йўллари дилига қувонч, юрагига қувват бағишилади. Ҳозир отаси, онаси билан дийдор кўришувини эслаб Қаландарнинг юраги ҳаприқиб кетди. Бир маромда йўрғалаб бораётган жийрон қашқага ачитиб-ачитиб қамчи босди. От чопиб кетди. Узангига оёғини тираб олган Қаландар ўзини ажбир чавандозлардай ҳис қилди. Ҳозир у шу қадар дадил, жасур, кучли эдикни, назаридан Зиёдулла бойнинг одамлари орқасидан қувса ҳам еголмас, изидан қайтара олмас эди.

Бу фикр хаёлига келиши билан у ортига ўгирилиб қаради. Йўқ, ҳеч ким кўринмади. Ургутга кираверишдаги баланд тепаликдаги Бибипари қайрағочи, деб аталаидиган якка қайрағочдан бир қарич юқорида турган қуёшга кўзи тушди. Шунда Вағаштида эшитгани бир ҳангомани эслади.

Бир куни Ургут бозорида бир вағаштилик битта испанзалик билан ниманингдир устида тортишиб қолибди. Униси у дебди, буниси бу дебди. Охири гап тополмай

қолган вағаштилик одамларга илтижо билан бундай дебди:

— Қаранглар, ахир қуёш ҳам бунинг ёнини олади. (Вағашти Ургутнинг кунботар томонида, Испанза эса кунчиқар тарафида.) Биз эрталаб бозорга келаётганимизда қуёш пешонамизга уриб қиздиради. Бозор-ўчарни битириб қайтаётганимизда эса у томонга ўтиб олади-да, яна пешонамизни куйдиради. Бунга-чи? Ундан эмас. Ёу бозорга келаётгандан қуёш орқасида бўлади. Қайтиб кетаётганида яна бунинг ғамини еб, орқа томонга ўтиб олади.

Тўплланганлар бу гапдан роса мириқиб кулишади:

— Ҳа, шундай бўлса тортишиб нима қиласан? Қуёш ҳам бунинг ёнини олиб тургандан кейин бизнинг қўлимиздан нима келар эди?— деб масхара қилишади.

Қаландар бу ҳангомали эслаб ўзича кулиб кўйди. «Хайрият, қуёш ҳозир мен томонда. У ҳам менинг ёнимни олмоқда».

Жийрон қашқа ҳар қарич жойи Қаландарга беш бармоғидай таниш бўлган Булоқбоши қишлоғи кўчасидан йўртиб бормоқда эди...

ҲАЛОЛИ БЎЛСИН...

Қаландар Тахтақорача довонининг тепасига чиқдида, отдан сакради. «Юқорига кўтарилгунча от жонивор ҳам қора терга тушиб кетди. Бирпас дам берай, ўзим ҳам манави кўкаламга бир оз чўзилай». У отининг айл-пуштасини бўшатди, оғзидан сувлигини чиқарди. Хуржунини кўм-кўк майсазорга тўшаб, устига чалқан-часига чўзилди.

Отда юравериб икки сони оғриб қолган экан, ҳозир оёқларини узатиб ётганда маза қилди. Майин шабада тоғ ўт-ўланларининг, ёввойи бодом гулининг ёқимли ҳидини олиб келди. Қаландар чуқур-чуқур нафас олар экан, кўнглида ажиб тотли бир туйғупи туйди. Руҳи текик тортди. Ҳалигина хаёlinи ўртаган «Бой билиб қол-

са нима қилади? Орқамдан одам юборса-чи? Отам нима дейдилар» деган ўйлар мисоли баҳор булутларида тезда тарқаб кетди. «Келса келар... Нима, мен бироннинг ҳақига хиёнат қилдимми? Ўзимнинг меҳнат ҳақимни олдим, холос».

У ўрнидан туриб ўтириди. Отига қаради. Жийрон қашқа эринибгина ўтлар эди. Унинг ёнидаги ёввойи бодом дараҳтида бир зарғалдоқ куйиб-пишиб сайдайди:чув-чув-чув, чу-ли-ли-лил... Қаландар зарғалдоқнинг сайрашини ёқтиради. Мириқиб эшилди. Жийрон тумшүфини ердан кўтармай пишқирди-да, думини қаттиқ силкитди. Бирдан чўчиган зарғалдоқ «Чув» дея учиб кетди. «Энди туриш керак,— деб ўйлади Қаландар.— От ҳам кавзаниб олди. Вақт кетяпти. Қоронғи тушмай Қайнарга кириб борсам тузук...

— Сизни бир отлик сўрайапти,— деди Жаннат хола чолига.

Пешин намозини ўқиб, тасбеҳ ўгириб ўтирган Шодиёр бобо ҳайрон бўлди.

— Ким экан? Танимадингми?

— Йўқ. Бегона одам. Илгари кўрмаганман.

Шодиёр бобо дарвозага чиқди. Отлик ўттиз-ўттиз беш ёшлардаги норғул йигит эди. У Шодиёр бобони кўриши билан отдан иргиб тушди-да, салом берди.

— Қани, ичкарига,— деди Шодиёр бобо.

Меҳмоннинг отини сайисхонага боғлаб, охурга хашак ташлади. Уйга кириб, ҳол-аҳвол сўрашдилар.

— Сўраганинг айби йўқ, меҳмон,— деди мезбон.— Сизни танимайроқ турибман.

Меҳмон кулимсиради.

— Ҳа, танимайсиз. Мен Вағаштидан келдим. Зиёдулла бойнинг новчасиман.

Зиёдулла бойнинг номини эшитиб, Шодиёр бобонинг юраги шувиллаб кетди. «Ҳа, тушунарли», деб ўйлади ўзича. Аммо меҳмонга сир бермади.

— Ҳа-а, шундайми, хуш кўрдик, келсинлар,— деди вазминлик билан.

— Мени бу ерга бой отам юбордилар... Сизнинг Қаландар деган ўғлингиз у кишининг эшигига бир йилча ишлаган экан... Уч-тўрт кундан бери дараги йўқ эмиш. Охири мени шу ёққа юбордилар: «Бориб хабар ол-чи, балки уйига боргандир», дедилар. Бойнинг бир жийрон қашқа оти ҳам йўқ. Қаландар уни миниб кетмадими-кан, деган хаёлдалар. Тўғри, ўғлингиз от миниб кетадиган даражада эмас, ҳали ёш. Лекин, ҳар қалай болада, қизиқиб минган бўлса от у ер-бу ерда йиқитиб-пиқитиб кетган бўлмасин тағин. От-ку гўрга-я, боланинг ўзи омон бўлса, бас, дедилар бой отам.

Шодиёр бобо ўйланиб қолди. Ўғлининг, «бой иш ҳақимга шу отни берди», деб алдагани жаҳлини чиқарди. Айни вақтда мана бу йигитнинг Қаландарин менсимай гапиргани алам қилди.

— Олинг, меҳмон, чойдан ичинг, нонга қаранг,— деди ўйчан.— Қаландарнинг қачон чиқиб кетганини ҳеч ким билмас эканми?

— Йўқ... Бир-икки кун эътибор беришмапти. Тоғда молларни боқиб юргандир-да, деган хаёлга боришипти. Лекин орадан уч-тўрт кун ўтибди ҳамки, ўглингиздан дарак бўлмапти.

«Нима десам экан? Ўғлим уйга келгани йўқ. Бой отангга бориб айт, ўғлимни топиб берсин, десаммикан... Йўқ, бу номардлик бўлади. Бор гапни айтаман. Менсимай гапиргани учун ҳам бўлган воқеани айтиб бераман. Нима қиласди бой? Нари борса, отини қайтариб оладида. Эрта-индин Қаландар келади, элтиб бер отини, дейман. Тавба, «От-ку гўрга-я, боланинг ўзи омон бўлса, бас», эмиш. Бой бирорвинг боласига ачиниб қопти-да. Агар оти йўқолмаганида-ку Қаландарни бўри еб кетсаням эсига келмасди-я... Ҳа, майли, бу йигитда нима айб? У хўжайини айтган ишни қилади-да». Шодиёр бобо шу-

ларни хаёлидан ўтказар экан, чойдан бир ҳўплаб меҳмонга деди:

— Бой отангизга бориб айтинг, Қаландар ҳам, жийрон қашқа оти ҳам омон. От Қаландарни йиқитиб кетгани йўқ, йиқитиб кетолмайди ҳам. Камбағалнинг боласи пишиқ, чайир бўлади... Эрта-индин отини олиб бориб берамиз. Үғлингнинг бир йил ишлагани учун ҳақ берадими-йўқми — бу бой отангизнинг имонига ҳавола.

Шодиёр бобо бир оз қизишганини меҳмон сезди.

— Бова, сиз хафа бўлманг, бой отам ҳеч нарса деганлари йўқ. Отни қайтариб берсин, деган гап у кишининг хаёлига ҳам келган эмас. Фақат үғлингизнинг эсон-омонлигини билгани келдим, холос.

— Қуллуқ! Бой отангизга шуни айтиб қўйинг. Отни эрта-индин етказамиз,— деди яна таъкидлаб Шодиёр бобо.

Бошқа гапга ўрин қолмаган эди. Меҳмон анча фаросатли йигит экан, буни сездию мезбондан рухсат сўради.

Меҳмонни кузатиб қайтган Шодиёр бобонинг авзойни кўриб Жаннат хола чўчиб кетди.

— Ким экан? Нима дейди?

Шодиёр бобо индамади. Жаннат хола саволини яна қайтарди.

— Үғлингни сўраб кепти,— деди Шодиёр бобо кескин.— Бу бола мени эл олдида бош кўтаролмайдиган қиласди.

— Мундай тушунтириб гапирсангиз-чи! Нима гап ўзи?

— Нима гап бўларди?! Үғлинг бойнинг отини ўғирлаб келган экан. Шуни сўраб кепти!

— Вой, шўрим, вой, шўргинам қурсин! Қандай қилиб ўғирлапти?— Жаннат холанинг ранги бўз бўлиб кетди.— Энди нима қиласми? Бу яшшамагур бой билан ўйнашадими-а! Бир бало қилиб қўймаса гўрга эди. Қодиримни олиб кетишгани етмасми? Энди буни ҳам...

— Бас қил!— деди Шодиёр бобо.

Чол-кампир жим бўлиб қолди. Жаннат хола дока рӯ-молининг учи билан кўз ёшларини артди. Шодиёр бобо бир кафт носни жаҳл билан тилининг тагига ташлади-да, қўзини юмганча хаёл суреб кетди.

— Қайнардан қачон қайтаман, девди?

— Эрталаб келиб қолар...

Қайнарда отасининг Исмоил деган жияни бор. Қаландар шуникига боряпти. Ота-онасига: «Қайнарга бориб, Исмоил акамлардан бир хабар олиб келаман», деган. Отаси ҳам: «Бойнинг моли кетидан юравериб чарчаган, майли борса бориб келсин. Икки-уч кун кўнглини ёзиб, айланиб келар», деган ўй билан индамади. Лекин Қаландарнинг режаси бошқа эди.

Бир кечада меҳмон бўлгач, эртаси куни отасининг жиянига мақсадини айтди:

— Отам юбордилар. Мана шу отни сотиб, пулига қўй олиб берар экансиз.

Исмоил ака Қаландарнинг гапига ажабланмади. Факат қўйларни ёлғиз ўзи тоғдан қандай олиб ўтиб кетишини ўйлаб қолди.

— Ростми шу гапинг?— деди Исмоил ака.

— Бўлмаса-чи,— деди шоша-пиша Қаландар.— Агар ишонмасангиз, майли, сотманг. Акамнинг келишига қўй керак бўлар эмиш-да.

Бу гап Исмоил аканинг кўнглидаги озгина шубҳани ҳам тарқатиб юборди.

— Менга қара, Қаландар, хўп, отни бозорга элтиб сотдик, пулига қўй олдик ҳам дейлик. Лекин битта ўзинг уч-тўртта қўйни қандай ҳайдаб кетасан? Тоғ ошиб ўтгунча чарчамайсанми, қўрқмайсанми?

Қаландар кулиб, Вағаштида Зиёдулла бойнинг қўйларини тоғма-тоғ ҳайдаб ўрганиб қолганини айтди.

— Бўлмаса бундай қиласиз,— деди Исмоил ака,— отни сотиб, пулига қўй оламиз. Кейин бизарди эшагимизни миниб, қўйларни ҳайдаб кетасан. Ўзим бир бор-

ганимда олиб келарман ёки биронта келувчи бўлса бериб юборарсизлар...

Эртаси куни намози асрда Қаландар Булоқбошига беш қўйни ҳайдаб кириб келди. Уни йўлда кўрганлар турли фикрга бордилар:

«Шодиёр бобонинг шу улидан бир бало чиқади-да».

«Гўр бўлади, шу аҳволда кетаверса ўғридан бошقا нарса бўлмайди».

Қаландар ҳеч кимга парво қилмади. У дарвозани очиб, қўйларни ҳайдаб кирганда онаси сайисхонада сигир соғаётган эди. Қаландарни кўриб ҳанг-манг бўлиб қолди. Тиззалирининг орасидан пақири пақ этиб тушиб кетди.

— Буларни қаердан олдинг?

Ўғлининг саломига Жаннат хода шу савол билан жавоб берди.

— Қаердан олардим, сотиб олдим.

— Вой шўрим, яна нима балони бошлаб келдинг?!

Ховли тўридаги дараҳтларнинг тагини чопаётган Шодиёр бобо кампирининг овозини эшитиб сайисхонага қарадиую Қаландарни кўрди. Кетмонини жойида қолдирди-да, у томонга йўл олди. Эшакнинг тўқимини ечаётган Қаландар отасига пешвуз юрди.

— Ассалому алайкум.

— Ваалайкум,— деди Шодиёр бобо эшитилар-эшитилмас.— Қимнинг қўйлари бу? От қани? Эшак кимники?

Отасининг дарғазаб важоҳати Қаландарга ҳамма нарсани равшан қилди.

— Яна кимнинг қўйини ўғирлаб келдинг?

— Ҳеч кимнинг қўйини ўғирлаганим йўқ. Булар ўзимники, сотиб олдим. Эшак Исмоил акамники. Узлари миниб кет, дедилар,— деди бир оз тутилиб.

— От қани? Бойнинг оти қани, ярамас?— деди Шодиёр бобо ғазаб билан.

Қаландар отасининг қаттиқ жаҳли чиққанини сезди.

Ортиқча тушунтиришу изоҳларнинг ўрни эмаслигини англади.

— Отни сотиб, пулига шу қўйларни олдим...

— Кимдан сўрадинг буни? Бироннинг отини ўғирлаб миниб келишни, яна бозорга чиқариб сотишни ким ўргатди сенга? Дастингдан бош кўтариб юра оламанми ёйўкми?

Шодиёр бобо толдан бир хивич синдириб олдию Қаландарнинг бош-кўзи демай савалай кетди. Хивич аъзойи баданини ачиштиrsa ҳам Қаландар миқ этмас, на узр сўрар, на отасининг юзига қарай олар эди.

— Аканг йўқлигига ёнимга кирасан, унинг ўрнини билдирамай турарсан, деб ўйловдим! Шуми менга теккан фойданг?! Эртага саҳар тургин-да, қўйларни Зиёдулла бойга элтиб бер!

...Зиёдулла бой Қаландарнинг гапларидан негадир завқланиб кетди.

— Отам бериб юбордилар, дегин...— Қаландар «шундай» деган маънода бош ирғаб қўйди.— Менга қара, ўғлим, ростданам отни қўрқмай миниб кетдингми?— Чамаси Қаландарнинг ишлари бойни қизиқтирас, шунинг учун бўлган воқеани ҳаммасини батафсил эшигиси келар эди.— Қани менга бир бошдан сўзлаб бер-чи. Отни қандай миниб кетдинг, қайси бозорга олиб бориб сотинг, қўйларни ким олиб берди. Ҳаммасини айтиб бер-чи?..

Қаландар тутила-тутила бўлган гапларнинг ҳаммасини сўзлаб берди. Бой унинг ҳикоясини тинглаб ўтирас экан, гоҳ кулар, гоҳ ёш бола бўла туриб, шундай ишларга ақли етганига ҳайрон қолар, унинг топқирлигига, довюраклигига тан берар эди. Қаландар ҳикоясини тутгатди ҳамки, бой индамай ўтиради.

— Бой ота, энди менга рухсат берсангиз, борай,— деди Қаландар.

Бой қалин мош-гуруч соқолини силаб, Қаландарга

термилди. Унинг бу қарашида болага ҳавас, балки ҳа-сад зохир эди. У ўзининг ўғилларини бирма-бир тасав-вур қилиб кўрди. «Хўш, улардан қайси бири манави гўдак қилган ишларни эплай олади? Егани — олдида, емагани — ортида. Аммо биронтаси бирон ишга бўйин бермайди. Ҳамма нарсага ўзим чопишим керак. Манави бола-чи? Уларнинг укаси тенги. Қилган ишларига эса катта одамнинг ҳам ҳаваси келади. Ўғлинг бўлганга яраша шунаقا дадил, қўрқмас, уддабурро бўлса-да». Бой ичидан зил кетди. Унинг тўрт ўғли бор. Лекин бир-биридан ношуд, бўш-баёв, сира бойнинг ўғлига ўхша-майди. «Нимага шундай? Уларни эрка қилиб ўстирдим-ми?.. Э, тавба, фарзандни беришга бердинг-а, аммо...» Бу фикридан ўзи ҳам чўчиб кетгандай ҳушёр тортди.

— Менга қара, ўғлим,— деди Зиёдулла бой товуши алланечук товланиб.— Сенга рухсат бераман. Аммо битта шартим бор: қачон вақтинг бўлганда бизникига келиб тур, хўпми? Сен менга ёқиб қолдинг. Ўғилларим қатори ўғлим бўласан... Ҳозир бориб дамингни ол. Бу оқшом меҳмон бўл. Эрталаб йўлга чиқасан. Олиб келган қўй-ларингни эса қайтариб олиб кет.

Бойнинг бу гапларидан Қаландар ҳайратга тушди. Қаҳратон қиши куни қуёш бирдан исиб, бутун қору муз-ларни эритиб юборгандай туюлди. Рўпарасида савлат тўкиб ўтирган одам ўзи билган: «Ҳақимни беринг. Уйга бориб келай», деганда масхара қилган Зиёдулла бой эмас, қандайдир хушфеъл, олижаноб бир инсон эди.

«Балки бу гаплари ҳам калака қилишнинг бир йўли-дир», деган фикр кечди Қаландарнинг хаёлидан.

— Йўғ-э, бой ота, қўйлар сизники. Мен қайтариб олиб кетолмайман.

— Мен айтдимми, олиб кетавер,— деди бой вазмин.

Қаландар бойнинг боқишлиарида, юз ифодасида сох-таликин кўрмади. Унинг гаплари самимийга ўхшарди.

— Отам қўймайдилар. Бари бир яна қайтариб юбо-радилар,— деди Қаландар.

— Отангга тушунтири. Бой отам чин дилдан менга бердилар, дегин. Қўрқмасдан отни миниб кетибсанми, шунча ишларга ақлинг етиб бажарибсанми — ҳалолинг бўлсин!

— Бой ота...

— Шунча ишни қилган йигит латтачайнар бўлмаиди! — бой энди кескин гапирди. — Агар отанг ишонмаса, одам қўшаман. Бирга бориб, отангга бор гапни айтиб, тушунтириб келади.

Қаландар Зиёдулла бойдай одам ўзини «йигит» деганидан ичида суюниб кетди. «Демак, мен хам йигит бўпман-да». Шу фикр хаёлидан ўтиши билан негалир қаддини ростлади. Аммо бу хаёлини бойга билдирмасликка интилди...

— Ҳимматингизга раҳмат, бой ота, аммо мен қўйни ололмайман.

— Сабаб?

— Сиз «ҳалолинг бўлсин», деганингиз билан, отам рози бўлмаса, ҳалол бўлмайди.

Тонг саҳарда Қаландар Вагаштидан чиқиб Булоқбоши қишлоғи томон йўл олди...

СОМОН

Қаландар ит қувган соқовдай ҳаллослаб, қора терга тушиб келди. Иssiқдан юзлари бўғриқиб кетган, нафас ололмай ҳансирали. Нон ёпаётган Жаннат хола ранг-рўйини кўриб қўрқиб кетди.

— Сенга нима бўлди, болам? Бирор урдими? Ё кучук-пучук қувдими?

— Йўқ... Йўқ. Боққа бораман, майлими? Молларга ям қарайман.

Қишлоқдан уч-тўрт чақирим юқорида — шундоққина тоғ этагида боғ бор. Қаландар бир сигир билан бир бузогини ана шу боғ атрофидаги уватларда боқади.

У эргалаб барвақт туради-да, сигир-бузогини даштга етаклаб чиқади. Пешинда сояга олади. Баъзи кунлар тенгқурлари билан ўйинга қизиқиб кетиб, молларни сүфориши, сояга олиш эсидан чиқиб кетар, оқибатда ё онаси, ё онаси койир эди. Бундай пайтларда: «Бормайман, молларнинг орқасидан тикан босиб юриш жонимга тегди», деб хархаша қиласарди. Шунинг учун бугун онаси Қаландарга жуда ҳайрон қолди.

— Ҳа, болам, даштга мунча ошиқиб колдинг?

— Ҳа, нима?! Бормайман десаям қўймайсиз, бораман десаям. Нима қиласай бўлмаса?

Жаннат хола Қаландарга қараб кулди. «Ҳа, болам-а, мениям ўзингга ўхшаган гўдак, деб ўйлаяпсан чоғи. Кошки билмасам дардингни. Жўраларинг билан ваъдалашиб келгансан. Дарди бало — ўйин». Шуларни Қаландарга ҳам айтмоқчи бўлди, аммо ўғлининг шаштини қайтаргиси келмади. «Майли, бора колсин. Отам раҳматли ўғил боланинг шашти синмасин, дердилар. Бир марта синдими тамом, кейин эгилувчан бўлиб қолади».

— Менга кара, Қаландар, манави иссиқ ионни ол. Жўраларинг билан ейсан.

Қаландар ялт этиб онасига қаради. «Жўраларим боришини қаёқдан билди экан!»

— Қайси жўраларим?

— Қайсилигини ўзинг биласан, улим,— дея жилмайди онаси.— Ҳеч нима деяётганим йўқ-ку. Боравер, фақат ёлғон гапирма. Мен сенга ҳар доим айтаман, қаёқ-қа борсанг, ким билан ўйнасанг ҳам, тўғрисини айт. Ростини айтсанг, индамайман, койимайман ҳам.

Қаландар индамади. Қилган ишидан пушаймон бўлиб ер чизиб қолди. Онаси буғи чиқиб турган иккита ионни чит рўмолга туғиб берди.

— Эшакни миниб ол. Тагингга қопни ташлаб олсанг, бир оз сомон ҳам супуриб келар эдинг... Моллар сувсиз қолмасин. Хўпми?

· Ҳозир Қаландарга онаси жуда меҳрибон, мунис кў-

риниб кетди. Дунёдаги ҳамма оналардан ўзимнинг энам яхши, деган фикр кечди хаёлидан.

Қаландар кулранг эшагини қишлоқнинг тупроқли кўчасидан йўртириб кегди. «Салим бормикан ё ҳали уйидамикан?..»

Ҳаш-паш дегунча боққа етиб келди. Тўғри ишкомга караб борди. Салим йўқ, ҳали келмапти. Тугунни ишкомга илди-да, эшагининг қозигини уватга қоқди. «Салим келгунча молларни суфориб тураман».

— Қани, олиб келдингми?— деди ҳовлиқиб Қаландар Салим келгач.

Салим бамайлихотир:

— Йўқ, энам бермадилар,— деди.

Салимнинг отаси савдогарчилик ишлари билан Ургут, Жума, Самарқанд бозорларида тез-тез қатнар, у ердан турли ўйинчоқлар олиб келиб сотар эди. Салим бу ўйинчоқларни ота-онасига билдирмаӣ, жўраларига кўрсатиб мақтанар эди. Боя ҳам: «Отам кеча жудаем қизиқ бир нарса олиб келдилар. Иккита тахтачанинг учига ип тортиб одамча шакли ясалган ўйинчоқни ўрнатган. Тахтачанинг пастини ҳаракатга келтирса, одамча ҳар хил ўйинга тушади, деб роса мақтанди. У Қаландарга шуни олиб келиб кўрсатишга ваъда берди.

— Мен бўлса энамга ёлғон галириб, ҳовлиқиб югуриб кепман-а,— деди Қаландар тарвузи қўлтиғидан тушиб.

— Энам билиб қолдилар-да. Бўлмаса олиб келардим.

— Ҳа, майли,— деди Қаландар.— Мен иссиқ нон келтирганман. Юр, ариққа бориб оқизоқ қилиб еймиз.

Икки ўртоқ ариққа бориб, иссиқ нонни сувга ботириб маза қилиб ейишли. Кўкрагини ерга бериб ётганча мириқиб сув ичишиди. Кейин ариқ ёқасидаги кўкаlamзорга чалқанча ётиб осмонга термилишиди. Осмон чексиз, қанча тикилиб қарасанг ҳам адогини кўриб бўлмайди.

Этак томондан енгил шабада эсди. Атрофии чангга ўхшаган ғубор ўради.

— Салим,— деди Қаландар ёнбошига ўгирилиб,— бедана овламаймизми? Этакдан шабада бўляпти, қара, бедананинг рави келганга ўхшайди.

— Ушлашни биласанми?

— Ҳа, сен билмайсанми?

— Йўқ, бирон мартаям ушламаганман.

Қаландар иргиб ўрнидан турди.

— Юр, сенга ҳам ўргатаман. Анави уватда кўп бўлади, ўтларнинг орасида.

Қаландарнинг гапи Салимни қизиқтириб қўйди. Бедана ушлашни ўрганишга астойдил киришмоқчи бўлди. Баланд уват бўйлаб иккови икки тарафга кетди. Қўлини орқасига қилиб олган Қаландар катталардай оҳиста юриб борар, буталар, хас-ҳашаклар орасига синчковлик билан кўз югуртирав эди. Салим ҳам Қаландардек қўлларини орқасига қилди. У беданани кўришга ошиқарди. Кутимаганда унинг оёғи остидан бир нарса парр этиб кўтарилди. Салимнинг юраги шиф этиб, ичи муздай бўлиб кетди. Қўрқди. Беихтиёр Қаландарга қаради. Жўрасининг аҳволидан Қаландар қиқирлаб кулади.

— Ҳа, жўра, нима бўлди? Учириб юбординг-ку. Зўри экан-да лекин. Менга қара, Салим, эҳтиёт бўл, бедана эркаклардан қочади, ўзини жуда ҳушёр тутади.

Яна қидиришда давом этишиди. Салим ҳар бир бута, ўт орасига қарашга, синчилаб кўришга ҳаракат қиласарди. Бир маҳал сариқ тикан остида муштдай бир нарсага кўзи тушди. Сесканиб кетди. Дарҳол ўзини қўлга олди. Қаландар ўргатгани эсига тушиб, юришдан тўхтамади. Аммо ҳалиги нарсадан кўзини узмасди. Ростдан ҳам бедана! Қўксини ерга босганча тумшугини юқорига кўтарган, икки кўзи Салимда, милдираб турибди. Гўё: «Қани, нима қилар экан», деб Салимни кузатиб тургандай.

Салим ўн беш қадамлар нарига ўтди-да, эҳтиёткорлик билан Қаландарни чақирди.

— Кўрдингми?— деди Қаландар.

— Секин,— деб шивирлади Салим.

— Оббо, жуда уста бўп қопсан-ку. Қаерда?— Қаландар оёқ учидаги югуриб келди.

— Ҳув анави ерда, сариқ тиканнинг тагида пусиб ётипи.

— Энди мундай, жўра,— деди Қаландар ҳансирааб.— Сен келган йўлингдан қайтасан, кўзингни беданадан узма. Лекин билиб қўй, қўлинг билан кўрсатма. Орқангга қилиб кетавер қўлингни. Мен кетингдан бораман. Ўша сариқ тиканга борганда астагина: «Ана шу», деб қўйсанг бас. У ёғини ўзимга қўйиб беравер...

Таниш сариқ тиканга борганда Салимнинг юраги гупиллаб урди. Бедана ҳамон ҳалиги алпозда кўкрагини ерга бериб ётарди. Астагина: «Ана шу», деди. Буни Қаландар ё эшилди, ё эшилмади. Лекин беданани кўрди. Индамай беш-олти қадам ўтди. Қайси томондан олишни чамалади. «Сен кетавер», деди Салимга астагина. Ўзи эса орқасига қайтди. Қадамини тезлатди, тўғри сариқ тиканга қараб бораверди. Салим унинг ҳаракатларини кузатаркан: «Ҳозир учирив юборади», деб ўйлар, ҳаяжонини босолмас эди. Қаландар сариқ тиканга етганда эпчиллик билан ерга энгашди. Энгашдии дарров ўрнидан турди. Салим югуриб келди. Қаландарнинг қўлида бедана типирчилаб турарди.

— Менга бер, менга бер,— деди Салим.— Битта кўрай.

— Шошма, мунча ҳовлиқасан. Қанотини юлиш кепрак.— У бедананинг иккала қанотидан уч-тўртта узун патларини юлиб ташлади.

— Ма, пурчаси экан¹.

Салим беданага ҳайрат билан термилди. Бедана ҳам

¹ Пурча — нар.

ундан кўзинни узмасди. Жонивор худди: «Мени қўлга туширган сенсан», деяётгандай мўлтирас эди.

Кун ботишига бир арқон қолганда сомон йиғишга тушди. Бойнинг даласидаги сомонни йиғишириб кетишиган, аммо ўрнида анча майда сомон қолган эди. Қаландар паншаха билан тўкилган сомонларни йиғди. Ана-мана дегунча икки қоп тўлгулик сомон тўплади. Уларни қопга яхшилаб тиқди, оғзини каноп билан боғлади. Бир оз дам олиш учун копга ўтириди-да, пешона терини кафти билан сидириб ташлади. Шундагина чарчаганини ҳис қилди. Бу пайтда қуёш тоғ чўққиси устида қип-қизил баркашдай бўлиб ёниб турарди. Қаландар қуёшга узоқ термилди. «Ўша тоғ орқасида ҳам ҳозир кун ботяптиմикан? Қуёш ғалати нарса-да, шунча баланддан ҳаммаёқни ёритади, қизитади-я... Қуёш бўлмаса нима бўларкан? Қоп-коронғи. Бир кун қуёш чиқмаса... Одамлар ваҳимага тушиб қолишса керак...»

Қаландар ўрнидан турди. Қуёш тоғ ортига думалаб кетган, унинг қизғиши нурлари жануб томондаги тоғ чўққиларида, узун дараҳтлар учидагина қолган. «Энди қайтиш керак. Кеч бўлиб қолди». Эшагини ечиб келди. Арқонга икки қоп сомонни линг қилиб боғлади. Кейин эшакка ортмоқчи бўлиб кўтарди. Аммо сомон оғир эди. Қаландар қолларни сал қимирлатди-ю, эшак устига озод кўтариб ташлаёлмади. Яна уринди. Бўлмади. «Энди нима қилдим... Ким ортишади? Яқин атрофда ҳеч ким кўринмайдиям. Бир қопини ташлаб кетсаммикан? Биттаси эшакнинг устида турмайдиям. Нима қилсан экан? Икковиниям қолдираими? Шунча овора бўлиб йиғдим, энди ташлаб кетаманми?»

, Узоқдан бир отлиқ кўринди. У тўғри Қаландар томон келарди. Қаландар отлиқни кўрдию хурсанд бўлиб кетди. «Шу одамдан илтимос қиласман. Ким экан? Бегона бўлса-чи? Ўлдими, ортишиб юборар». Отлиқ яқинлашди. Йўргалаб келаётган жийроннинг устидаги Юсуфбойнинг қоровули Шоди акани Қаландар таниди. «Ҳар қалай,

ўзимиздан экан». Шоди ака қамчининг тасмасини ел-касига ташлаганча отини жадаллатиб келарди. Қаландар унинг важоҳатини кўриб ҳайрон бўлди. Шоди аканинг қовоқлари ўюлган, жаҳли чиққанидан лаблари асабий қимтилган эди.

— Ассалому алайкум,— деди Қаландар унга пешвоз чиқиб.

Шоди ака отдан ирғиб тушди-да, камарига осилган пичоғини қинидан чиқариб, Қаландарнинг сомон тиқилган қопларини, арқонини кесиб-кесиб ташлади. Қаландар нима йўлганини тушунмас, ўзини йўқотиб қўйган эди.

— Шоди ака... Шо-ди а-ка!

— Э Шоди акангни...— дея ўшқирди у.— Нима бу?!— Кесиб ташланган қопни у ёқдан-бу ёқقا тепди. — Ким айтди сенга сомон олсин деб.

— Мен...

— Инқиллама! Нима, энангнинг хирмоними бу, ташиб кетаверасан?!

Азбаройи аччиғи чиққанидан Шоди аканинг қора юзи жигарранг тус олган, бақувват гавдаси титрарди. Қаландар гангиб қолди. «Ахир мен ҳеч қачон сомон олганим йўқ. Бугун биринчи марта келишим. Униям ангорнинг юқидан супурдим. Тайёр сомонга текканим йўқ», демоқчи бўлар, бироқ қўрқув, ҳаяжоннинг зўридан тили калимага келмасди.

— Жуна ҳозир, бу ердан! Иккинчи сомон олганингни кўрсам оёғингни уриб синдираман!

Шоди ака отига минди-да, қишлоққа йўл олди. Қаландар серрайганча қоровулнинг ортидан қараб қолди. Хаёлида турли, бир-бирига мутлақо алоқасиз фикрлар чувалашар, ичини аччиқ бир алам тирнар, алланима томоғини фиппа бўғиб қўйган эди. Негадир қўлига нон туғиб берган онасини, жўраси Салимни эслади. Салим ёдига келиши билан сергак тортди. Титилиб ётган сомонлар, қопнинг майда-майдада қилинган парчалари ораси-

дан нимадир изларди. У беданасини қидирарди. Мана, топди. Бир уюм сомон тагида экан. Онаси нон ўраб берган оқ чит рўмолчага туғиб қўйған эди уни. Шошилиб рўмолчани ечди. Ечса... бедана ўлиб қолти. Қаландар уни кафтлари орасига олди. Ихтиёrsиз равища Шоди ака кетган тарафга боқди. Унинг бу қарашида нафрат, ғазаб, айни вақтда ўзининг ожизлигидан, кучсизлигидан қаттиқ ўкиниш туйгуси мужассам эди. Қоровулга қарши гапирмагани, бор гапни очиқ-ойдин, дангал айтмагани, лапашанглик қилгани учун у ўзини-ўзи койир, бунга сари баттар эзилар эди. Шу алпозда қанча турди— билмайди, бир маҳал кўксидан кучли бир ўкирик келдию ҳўнграб йиғлаб юборди. Бу йифи кенг дашт бўйлаб ёйилди. Лекин ҳеч ким эшитмади...

ИНҚИЛОБ

— Тур, Қаландар, кеч қоласан, улим, жўранг ҳам ҳадемай кеп қолади.

Ҳар кузда Қаландар Жумабозорга сомон олиб бориб сотади, пулига қишлиқ кийим-кечак олади. Бугун ҳам қишлоқдош жўраси Равшан билан бозорга бормоқчи. Ётиш олдидан отасига: «Саҳарда уйғотинг» деб тайинлаган.

Қаландар эринибгина кўзини ишқалади. Ҳозир унинг тўйиб-тўйиб ухлагиси келар эди. Лекин начора? Туриши керак, бозорга бориши, сомон сотиб келиши зарур. Шундай қилиб ота-онасиға ёрдам беради. Ҳарна-да! Арғамчига — қил қувват.

— Турдингми, болам, манави қаймоққа нон тўғраб еб олгин. Йўлда очқаб қоласан бўлмаса.

Ховли этагидан оқадиган ариққа бориб Қаландар қўл-бетини ювди. Сув шишадай тиник, қордай совуқ эди. Куз суви ўзи шунаقا бўлади — бир ҳовучини олиб юзингга сепдингми, тамом, бутун уйқунгни қочириб юборади. Одам қушдай енгил тортади.

Қаландар бир-икки бурда нонни қаймоққа ботириб еди. Сайисхонадаги таранг қилиб сомон тиқилган қопларни линг қилаётган Шодиёр бобо чақириб қолди.

— Қани, улим, бўлдингми, кела қол.

Ота-бала қопларни эшакка ортди.

— Тўн-пўннингни олдингми?— деди Шодиёр бобо.

Шу маҳал кўчадан Равшанинг «Қаландар!» деб чақирган товуши эшитилди.

— Ҳозир,— деди Қаландар.

Тўнини икки қоп ўртасига — тўқимнинг устига ташлади-да, отасининг ёрдами билан эшакка минди. Қўчага кузатиб чиқсан Шодиёр бобо «Эсон-омон бориб келинглар. Илоё бозорларингни берсин!» дейя тилак билдириди.

Икки жўра йўлга тушиб. Тун пардаси ҳали тарқалмаган. Кузнинг аччиқ шабадаси этни жунжиктиради. «Аслида чопонни тагимга солмай, кийиб олсам бўлар экан», деб хаёлидан ўтказди Қаландар. Юлдузлар чараклаб ётибди. Қаландарнинг кулранг эшаги бир марамда йўргалайди, бундан унинг завқи келади. Аммо узоқ йўл, устига устак икки қоп орасида худди ариққа тушиб олгандай ўтиравериш Қаландарни зериктириди: оёқлари увишиб қолди.

— Равшан,— деди,— бирпас пиёда юрмайми? Менинг оёғим тоза қотиб қолди.

— Шу қоронғида, ўйдим-чукур йўлда пиёда юриб бўладими?

— Сенинг оёғинг увишмадими?— дейя сўради Қаландар.

— Йўқ, жуда линг қилиб ортибсан-да, сал бўшатиш керак эди. Бир томонингга ёнбошлаб ол.

— Бўшатсанг эшакнинг қорнига тушиб кетиб, икки томонидан қисади. Қейин қандай юради бу жонивор.

— Э, қизиқ экансан,— деди Равшан,— эшакдай жони қаттиқ ҳайвон бўлмайди. Бирпастга ўлиб қоладими? Мана, менинг эшагим, ўлгани йўқ, индамай кетяпти-ку.

— Шунинг учун тез юролмаяпти-да,— деди Қаландар.

дар.— Иккита катта қопни ҳам сени кўтарса, яна унинг устига жониворга азоб берсанг.

— Эшак бўлгандан кейин минади-да.

Қаландар хаёл билан банд, эшаги жадал йўргалаб борар эди. Равshan анча орқада қолиб кетди. Қаландар нима қиларини билмай қолди. Кетворай деса, шеригни ёлғиз ташлаб кетиш яхшимас, қараб турай деса — эшагининг ёмон одати бор: устига юк ортилганда, айниқса чарчаган бўлса, ҳайдаса йўргалаб кетаверади-ю, бир жойда тўхтадими — тамом, дарров ётади. Кейин турғизиш қийин, энг ёмони салга кураги ёпишиб қолади. Ҳозир Қаландар шундан хавотирда.

— Ишш,— деб эшагини сал секинлатди. Кейин орқасига ўгирилиб бақирди.— Равshan, тезроқ ҳайда, хала бос.

— Тоза чарчаб қолди, сафана,— деди Равshan.— Бир оз дам берамизми?

— Кейин икковимиз қандай ортамиз қопларни?

— Бир бало қилармиз, жуда ортолмасак битта-яримта ўтиб қолар. Бизлардан бошқа ҳам бозорга бораётган бордир ахир. Ўзимиз ҳам сал дам оламиз. Оёғим увишиб қолди, дединг-ку, ўзинг ҳам.

— Шундайку-я, кечга қоламизми дейман-да. Эрталабки бозордан қолмаслик керак.

Равshan сўзида туриб олди:

— Қолмаймиз ҳалиям. Бемалол етиб борамиз. Жиндай дам оламизу яна йўлга тушамиз-да.

Улар бир чеккага ўтиб қопларни туширдилар. Эшакларнинг айилини бўшатиши, ўзлари уватга чопонни ташлаб чўзилдилар. Иккови ҳам индамай осмонга термилиб ётди. Атроф жимжит. Аллақаерда қора чигиртканинг чириллагани эшитилади. Қаландар юлдузларнинг жимир-жимирини томоша қилиб ётди. Кўлмакка майда тошча ташласа, сув юзи майин мавжланади. Юлдузларнинг жимирлаши ҳозир Қаландарга ана шу мавжларни эслатди. У икки кафтини боши остига қў-

йиб, осмонга термилганча кўзини юмди. Узоқдан кучукнинг забтига олиб ҳургани, қарама-қарши томондан эса әчкининг зор қақшаб маърагани эшитилди. «Яна, салгина юриб, кейин дам олсак бўларди-да. Мозордан узоқлашар эдик... Дам олиб ўтиришнинг ҳам кераги йўқ эдик аслида. Равшаннинг отасиям қизиқ, шунча олис йўлга оғир қопларни шалпиллатиб ортадими?! Эшак жониворнинг қорнини икки томонидан сиқиб, юргани қўядими? Дам олиб ўтирмай етиб олсак бўлар эди...»

Эшаклар уватда қолиб кетган ҳас-хашакни терғилаб қуртиллатиб ейди.

— Анави тўп бўлиб турган юлдузни кўрдингми?— деди Равшан, жимликни бузиб.

— Ҳа. Ҳулкар-да шу.

— Ҳулкари шуми? Тавба, юлдузларнинг ҳам оти бор-а, униси-чи?— деб Равшан қатор турган учта юлдузга ишора қилди.

— Тарози,— деди Қаландар.

— Тарози? Ие, юлдузният тарозиси бўладими?

Ҳозир отасининг гапи Қаландарнинг эсига тушди.

— Бўлмасам-чи,— деб отасининг гапини такрорлади,— ҳамма жойда тошу тарози бор. Беўлчов дунё йўқ.

Равшан жўрасининг билағонлигига қойил қолар, аммо сир бой бергиси келмас эди.

— Менга қара, Қаландар, бозорда сомон неча пул экан, биласанми?

Қаландар катталардай салмоқлаб гапирди:

— Қаёқдан билай? Борсак кўрамиз-да. Бозорнинг кўтаришига қараб сотамиз-да.

— Шунча овора бўлиб борганимизга арзирмикан ишқилиб?— деди Равшан. Унинг овозидан норозилик, афсусланиш туйғуси сезилди.

Равшанларнинг оиласи ўзига анча тўқ. Шунинг учун у ёзда унчалик сомон ҳам супурмас, бозорга ҳам жуда кам борар эди. Борганда ҳам жўраларига қизиқиб, пул учун эмас, шунчаки томоша қилиб келиш мақсадида бо-

парди. Кеча Қаландар бозорга борамиз, деганда ҳам аввалига кўнмади. Аммо Қаландар у-бу нарсаларни гапириб қизиқтиргач, борадиган бўлди. Унинг бозорга бо-ришидан Қаландарга манфаатдорлик — шерик топилгани. Саҳарлаб ёлғиз йўлга тушишдан қўрқади. Аслида ўзи у қадар қўрқмайди ҳам, аммо ота-онаси розилик бермайди, ёлғиз ўзини бозорга жўнатишга кўнгли бўлмайди. Узоқ йўл, билиб бўладими, эшак чарчаб ётиб қолиши мумкин, устига устак нечта қабристоннинг ёнидан ўтади. Ёш бола тугул катта одам ҳам кечаси қабристон ёнидан ўтишга чўчииди.

Қаландар ҳам бозорга борадиган бўлса аввал ҳамроҳ топади. Йўқса на отаси, на онаси рухсат беради. Айниқса, онаси: «Гўрга, тўқ бўлмасак — оч ўтирамиз, янги бўлмаса — эски киямиз. Лекин битта ўзингни бозорга юбормайман. Агар битта-яримта ҳамроҳ топилса — «майли», дейди...»

— Ҳа, индамай қолдинг? — деди Равшан.

— Нимаям дердим. Арзиса арзимаса бориб келамида. Орқага қайтармилик. Ҳам сомон сотамиз, ҳам томоша қиламиз. Буям бир эрмак-да, деб бирор ухлаб ётган қайнонасининг бурнига чўп суққан экан.

Қаландарнинг гапидан Равшан қиқирлаб кулди.

— Шунаقا, жўра, — деди Қаландар салмоқлаб.

— Энди йўлга тушамизми? Вақт кетяпти. Эртароқ борсак, эртароқ қайтамиз.

...Тонг бўзарганда сомон бозорга келиб, қолларни эшакдан туширишди. Тўртта қопни бир-бирига суяб тикка қилиб қўйишиди.

— Сен шу ерда ўтириб тур. Мен эшакларни саройга қўйиб келай, — деди Қаландар. Кейин ўзининг эшагига миниб, Равшаннинг эшагини етаклаб кетди.

Равшан атрофга аланглади. Одамлар ҳар ер-ҳар ерда тўртта-бешта бўлиб суҳбатлашади. Бирор афсуслан-

гандек калласини чайқайди, бошқаси ҳаҳолаб кулади.
Нима гап эканлигига Равшанинг ақли етмайди...

Улар чошгоҳгача ўтиришди, аммо сомонни сотишол-
мади. Бир-икки киши шунчаки кўриб кетди-ю, лекин ба-
ҳосини сўрамади. Қаландар хуноб бўлди.

— Жуда bemavrid кепмиз-да, жўра,— деди.

— Нимага?— деб ҳайрон бўлди Равшан.

Бозорни кўрмайсанми, сомонга харидор йўқ.
Билмадим, нима гап — ҳамма бир-бири билан шивирла-
шиб гаплашади. Шунча бозорга келиб, бугунгидай узоқ
қолмаган эдим. Эшакдан туширганим заҳоти харидор
пайдо бўлар эди. Таъба...

Равшанинг кайфияти бузилди. У сомонни қандай
қилиб қайтариб олиб кетамиз, деган хавотирда эди. Бу
гандан Қаландар кулди.

— Қайтариб олиб кетамизми? Эсинг жойидами?

— Нима қиласиз бўмаса?— деди Равшан.— Бирор
бу нима, деб сўрамаса. Устига устак ҳаво айниятни.
Ишқилиб қорми, ёмғирми қуйиб юбормаса бўлгани. Ке-
йин кўрасан томошани...

Қаландар жўрасига далда берди:

— Кўп куюнма. Бозорга кирган нарса сотилмай қол-
майди. Эчким беш тангадан кам бўлмайди, деб ўтирап-
мидик. Кўтарганига сотиб кетаверамиз-да...

Пешинга бориб уларнинг сомонига бир чол харидор
бўлди. Оппоқ соқолли, лекин кўриниши ва ҳаракатла-
ридан бардамлиги сезилиб турган бу чол Қаландарнинг
қўлини маҳкам сиқиб силкита бошлади.

— Бор барака, де, ўғлим. Кечки бозор-да.— Қалан-
дар аввал индамай турди. Чол баттар силкилади.— Қа-
ни, бўлдими? Ҳадемай бозор тугайди — бундан ҳам қо-
ласан. Бўлдими?— Равшан жўрасига жавдираб терми-
лар, э, бўлди, деб қўя қол, агар бу чол ҳам айниса кейин
ҳеч кимга сотолмаймиз, дегиси келар эди. Қаландар
ҳам жўрасининг фикрини тушунди шекилли, ортиқча
ўжарлик қилмади.

— Боринг, барака топинг,— деди.

Чол сомон ҳақини санади-да, пулни Қаландарнинг кафтига урди.

— Сен ҳам барака топ, ўғлим. Яхши кунларинга буюрсин,— у шундай деб, арава ёллагани чиқиб кетди.

— Арzon кетди,— деди Қаландар,— сув текин-а!

— Э, қўйсанг-чи, шуям катта гап. Яна бир оз турсак, шу пулга ҳам сотолмасдик,— деди Равшан шошиб, гўё Қаландар фикридан қайтиб қоладигандай.

— Майли, бўлар иш бўлди. Борига барака-да, нима дединг?

...Икки жўра сомоннинг пулига у-бу нарса ҳарид қилди. Сўнг эшакларини олгани саройга боришли.

— Равшан, сен эшакларни ташқарига етаклаб чиқавер, мен саройбонга пулини бериб келай.

Қаландар анча ҳаяллади. Равшаннинг юраги сиқила бошлади: «Тезроқ кела қолмайдими энди. Ўзи-ку кечга қолдик. Қачон етиб борамиз уйга...»

— Кетдикми, жўра,— деди қувноқлик билан югуриб келган Қаландар.

— Мунча ҳаялладинг?

— Э, сўрама, жўра, зўр бўпти. Янгилик эшитдим.

— Нима гап?

— Инқилоб бўпти.

— Инқилоб? Инқилобинг нима?— деб тушунмай сўради Равшан.

— Оқ подшо тахтдан қулабди.

Қаландар тинмай гапирап, инқилоб нима эканини, бу билан қандай янгилик бўлишини аниқ тушуниб етмаса ҳам, ўзича севинар, севинчини яширолмас эди. У оқ подшони ёмон кўради, айниқса, акаси мардикорликка кетгандан сўнг ундан қаттиқ нафратланар эди. Шунинг учун ҳозир саройбондан: «Оқ подшо тахтдан қулабди», деган гапни эшитиши билан хурсанд бўлиб кетди.

— Ким айтди сенга?— деб сўради Равшан.
— Саройбон,— деди Қаландар.— У аник билар экан.
Ўзиям жуда бамаъни одам. Ёлгон гапирмайди у. «Энди камбағалларга яхши бўлади», деди. Биласанми, Равшан, оқ подшо қулаган бўлса, акам ҳам келади энди. Уларни оқ подшонинг одамлари олиб кетган эди-да.

Қаландар тезроқ уйига етиб олгиси, бу хушхабарни ота-онасига етказгиси келар эди.

— Қани, жўра, эшагингга хала бос, чоптири. Тезроқ етайлик уйга... Акам бечора келадилар энди. Инқилоб бўлганини эшитганмикан? Қандай яхши-а, акам кела-дилар, Қодир акам!..

Икки жўра йўлга тушди. Пешинга яқин ҳаво айниб турган эди. Кунботар томондан келган шамол қора бу-лутларни турли томонга тарқатиб юборди. Чарақлаб қу-ёш кўринди. Унинг нури ўткир, тиниқ эди.

Жўмабозордан чиқиб Дарғомдан ўтгунча икковининг ҳам пешонасидан тер чиқди. Қаландар елкасига офтоб иссиғи ўтганини сезди.

— Қизиб кетяпман, жўра,— деб чопонини ечиб олди.
Равшан индамади. Зиёдулла бойнинг жийрон қаш-қасини миниб кетаётганида қуёшга қарагани, ўшанда қуёш ўзи томонда бўлгани Қаландарнинг ёдига тушди. Беихтиёр яна қуёшга термилди. Унинг қип-қизил гарди-ши жуда чиройли кўринди, елкасини қиздираётган исси-ғи эса ёқимли эди. «Инқилоб, инкилоб бўпти! Қандай яхши. Энди турмушимиз яхши бўлиб кетади. Саройбон амакн айтди-ку!..»

Қаландар тинмай эшагига хала босар, уни чоптириш-га ҳаракат қилар эди. Бироқ, назарида, йўртиб бораёт-ган эшакнинг юриши унмаётгандай, йўл ҳам жуда узоқ-дай туюларди...

МУНДАРИЖА

ИНТИЗОР	3
ҚҮЁШ МЕН ТОМОНДА	96

На узбекском языке

МАМАТКУЛ ХАЗРАТҚУЛОВ

ГОРЕНИЕ души

Повести

Тақризчи: *Абдуғафур Расулов*

Редактор *С. Облоқулов*

Рассом *В. Шумилов*

Расмлар редактори *А. Мамажонов*

Техн. редактор *Э. Сайдов*

Корректор *Ш. Собирова*

ИБ 2931

Босмахонга берилди 19.08.85. Босишга рухсат
этildи 19.11.85. Р-22071. Формати 70Х108^{1/32}, Бос-
махона қосози № 3. Адабий гарнитура Юқори бос-
ма. Шартли босма л 7,0. Шартли кр.-оттиск 7,35.
Нашр л.7,3. Тиражи 60000. заказ. №1830 Баҳоси
45 т.

Ғафур Ғулом иомидаги Адабиёт ва санъат нашри.
ёти, 700129 Тошкент, Навоий кӯчаси, 30.

Нашриётлар, полиграфия ва китоб савдоси ишлари
бўйича ЎзССР Давлат комитети «Матбуот» поли-
графия ишлаб чиқариш бирлашмасининг Боскор-
хонаси Тошкент — 700129. Навоий кӯчаси, 30.